

Aatsitassanut tunngasunik suliaqarneq pillugu Inatsisartut inatsisaat

Kapitali 1

Siunertaa

§ 1. Aatsitassarsiorluni misissueqqaarnerup, misissuinerup aamma aatsitassanik piiaanerup aammalu tamatumunnga atatillugu ingerlatassanik suliaqarnerup naapertuuttumik sunniuteqarluartumillu ingerlanneqartarnissaat, Inatsisartut inatsisaanni tunngavissaatinneqarpoq. Tamatuma saniatigut pissutsinik aatsitassarsiorluni ingerlataqarnernut pingaaruteqartunik naapertuuttumik maleruagassiinissaq tunngavissaatinneqarpoq.

Imm. 2. Inatsisartut inatsisaanni naatsorsuutigineqarpoq, suliat inatsimmiisinneqartut inuiaqatigiit peqqissuunerannik ajoqusiisannginnerat, sillimaniarneq, avatangiisit, pisuussutinillu atuinerit, inuiaqatigiinnilu piujuartitsineq eqarsaatigalugit illersorneqarsinnaasumik ingerlannissaat, aammalu naapertuutissasut naleqqullutillu nunat tamat akornanni periusiinut akuerisaasunut.

Kapitali 2

Atuuffissai

Nunami sumiiffinni atuuffissai

§ 2. Inatsisartut inatsisaat, nunami akisussaaffeqarfiusumi aamma imaani akisussaaffeqarfiusumi, nunavittap sumiiffiini aamma Kalaallit Nunaata killeqarfik aningaasarsiornikkut akisussaassuseqarfigmaani , atuuppoq.

Ingerlatassat

§ 3. Inatsisartut inatsisaat ingerlatassanut makkununnga atuuppoq:

- 1) Misissueqqaarnek, aatsitassarsiorluni misissuineq, aatsitassanik piiaaneq aamma aatsitassanik ilisimatuussutsikkut misissuinerit kiisalu ingerlatassat tamatumunnga atasut.
- 2) Ingerlatassanut Inatsisartut inatsisaanni pineqartunut ilaasunut nukissiornermut attuumassuteqartunut kiisalu ingerlatassat tamatumunnga atasut.
- 3) Aatsitassarsiorluni ingerlataqarnerit pillugit nunap iluata toqqorsivittut aamma siunertanut allanut atorneqarnera kiisalu ingerlatassat tamatumunnga atasut.
- 4) Misissuinerit aammalu allatigut ingerlatat, ingerlatanut nr. 1-3-mi taaneqartunut pingaaruteqartut.

Imm. 2. Inatsisartut inatsisaat ingerlatassanut makkununnga atuutinngilaq:

- 1) Najukkami aatsitassarsiorluni ingerlatat.
- 2) Ingerlatat ikummatissiassanut tunngasut.

3) Nunap iluata toqqorsinermut allanullu siunertanut, aatsitassarsiorluni ingerlatanut imaluunniit ingerlatanut tamatumunnga atasunut tunngassuteqanngitsunut, atorneqarnera.

Sanaartukkat aaqqissuussinerrillu

§ 4. Inatsisartut inatsisaat sanaartukkanut aaqqissuussinernullu § 2 naapertorlugu sumiiffinni inissimasunut, aammallu ingerlatassanik Inatsisartut inatsisaanni pineqartunut ilaasunik suliaqarnermut atatillugu atorneqartunut, atuuppoq.

Sinerissap avataani suliaqarfiit, sinerissap avataani umiarsuit aamma sinerissap avataani suliaqarfiit eqqaanni isumannaallisaanermut killeqarfiit

§ 5. Inatsisartut inatsisaat sinerissap avataani suliaqarfinnut, takuuk § 18, aamma sinerissap avataani umiarsuarnut, takuuk § 19, imaani akisussaaffeqarfusumiittunut, nunavittap sumiiffianiittunut imaluunniit Kalaallit Nunaata aningaasarsiornikkut oqartussaaffigisaaniittunut, aammalu ingerlatanik Inatsisartut inatsisaat malillugu akuersissummi pineqartunut ilaasunik suliaqarnermut atatillugu atorneqartunut, atuuppoq.

§ 6. Inatsisartut inatsisaat sinerissap avataani suliaqarfinni imaani akisussaaffeqarfusumiittuni, nunavittap sumiiffianiittuni imaluunniit Kalaallit Nunaata aningaasarsiornikkut oqartussaaffigisaaniittuni isumannaallisaanermut killeqarfinnut, atuuppoq.

Imm. 2. Isumannaallisaanermut killeqarfiup iluani Inatsisartut inatsisaat umiarsuarnut, pramminut, imaatigut angallatinut allanut, timmisartunut, qulimiguulinnut, droninut aamma silaannakkut angallatinut allanut, sinerissap avataani suliaqarfinnut angallattakkanut aamma sanaartukkanut aaqqissuussinernullu angallattakkanut allanut, imaatigut angalaartunut, tissiarlutik ingerlaartunut, kalinneqartunut imaluunniit tamatumunnga atatillugu kisaqqasunut, imaluunniit allatut iliorlutik isumannaallisaanermut killeqarfimiittunut, kiisalu aalisarnermut atortunut, kisanut, pituttornermut atortunut allanut, atortunut allanut aamma pigisanut allanut, atuuppoq.

Imm. 3. Umiarsuit, imaatigut angallatit, tunisassiornermut atortut aamma silaannakkut angallatit ilaalu ilanngullugit imm. 2-mi taaneqartut Kalaallit Nunaanneersuunersut, Danmarkimeersuunersut, Savalimmiuneersuunersut imaluunniit nunanit allaneersuunersut apeqqutaatinnagu, Inatsisartut inatsisaat atuutissaaq.

Umiarsuit, imaatigut angallatit, tunisassiornermut atortut aamma silaannakkut angallatit allat ilaalu ilanngullugit taakkualu ingerlataat

§ 7. Inatsisartut inatsisaat sinerissap avataani umiarsuarnut allanut, umiarsuarnut allanut, pramminut allanut, imaatigut angallatinut allanut, sinerissap avataani suliaqarfiit angallattakkanut allanut aamma sanaartukkanut aaqqissuussinernullu angallattakkanut allanut aamma timmisartunut, qulimiguulinnut, droninut aamma silaannakkut angallatinut allanut, imaani akisussaaffeqarfusumiittut, nunavittap sumiiffianiittut imaluunniit aningaasarsiornikkut oqartussaaffigisamiittut imaluunniit taakkua

silaannartaanniittunut, aammalu ingerlatanik Inatsisartut inatsisaat malillugu akuersissummi pineqartunut ilaasunik suliaqarnermut atatillugu atorneqartunut, aamma atuuppoq.

Imm. 2. Umiarsuit, imaatigut angallatit, tunisassiornermut atortut aamma silaannakkut angallatit ilaalu ilanngullugit imm. 1-imi taaneqartut Kalaallit Nunaanneersuunersut, Danmarkimeersuunersut, Savalimmiuneersuunersut imaluunniit nunanit allaneersuunersut apeqqutaatinnagu, Inatsisartut inatsisaat atuutissaaq.

§ 8. Ingerlatassani Inatsisartut inatsisaanni pineqartunut ilaasuni ilaatigut ilaatinneqarput, imaani akisussaaffeqarfiusumi, nunavittap sumiiffiani aamma Kalaallit Nunaata aningaasarsiornikkut oqartussaaffigisaani taakkualu silaannartaanni ingerlataqarnerit makkua, taamaattoq takuuk imm. 2 aamma 3:

- 1) Ingerlatanik Inatsisartut inatsisaat malillugu akuersissummi pineqartunut ilaasunik suliaqarneq.
- 2) Ingerlatanik Inatsisartut inatsisaat malillugu akuersissummi pineqartunut ilaasunik suliaqarnermut atatillugu imaatigut ingerlaarneq aamma umiarsuit aamma angallatit allat atorlugit ingerlatanik allanik suliaqarneq.
- 3) Ingerlatanik Inatsisartut inatsisaat malillugu akuersissummi pineqartunut ilaasunik suliaqarnermut atatillugu timmisartorneq aamma timmisartut, qulimiguullit, dronit aamma silaannakkut angallatit allat atorlugit ingerlatanik allanik suliaqarneq.

Imm. 2. Ingerlatassat Inatsisartut inatsisaat malillugu akuersissummi pineqartunut ilaasut, ingerlatassat Inatsisartut inatsisaat malillugu akuersissut malillugu pisinnaatitsissummik pigisaqartumit imaluunniit pisinnaatitsissummik pigisaqartup isumaqatigiissuteqarfigisaanit suliarineqarpata, ingerlatassanut imm. 1-imi taaneqartunut ilaatinneqarput.

Imm. 3. Ingerlatanik Inatsisartut inatsisaat malillugu akuersissummi pineqartunut ilaasunik suliaqarnermi, takuuk imm. 1 aamma 2, Inatsisartut inatsisaat malillugu akuersissut malillugu pisinnaatitsissummik pigisaqartumut aamma pisinnaatitsissummik pigisaqartup isumaqatigiissuteqarfigisaannut, taassuma imaluunniit taakkua ingerlataat imaluunniit taakkununga tunngasut Inatsisartut inatsisaanni, aalajangersakkani Inatsisartut inatsisaat malillugu aalajangersagaasuni imaluunniit Inatsisartut inatsisaat malillugu akuersissutini, akuersissuteqarnerni imaluunniit aalajangiinerni atugassarititaasuni maleruagassiivigineqarsimappata, aatsaat Inatsisartut inatsisaat atuuppoq.

Imm. 4. Inatsisartut inatsisaata imm. 1-3-mi nassuiarneqartut atorneqarnerani, Inatsisartut inatsisaat malillugu akuersissut malillugu pisinnaatitsissummik pigisaqartoq imaluunniit pisinnaatitsissummik pigisaqartup isumaqatigiissuteqarfisai, Kalaallit Nunaanni imaluunniit Danmarkimi inatsisit, ingerlatassanut pineqartunullu imm. 1-3-mi taaneqartunut atuuttut, malinnissaannut pisussaajunnaarsinneqanngillat. Inatsisartut inatsisaat aamma inatsisit allat imminnut naapertuutinnippata, inatsisit allat atuuttariaqarluartut immikkut mianerisassat tunngavilersuutaasinnaanngippata, Inatsisartut inatsisaanni aalajangersakkat aammalu aalajangersakkat atugassarititaasullu Inatsisartut inatsisaat malillugu aalajangersagaasut atuutissapput.

Avatangiisinik, silap pissusaanik pinngortitamillu allanngutsaaliuineq

§ 9. Inatsimmi allatut allassimasoqanngippat, Inatsisartut inatsisaanni avatangiisinik allanngutsaaliuineq pillugu maleruagassani aamma ilaatinneqarput silap pissusaanut tunngasunut illersuinissaq aammalu

pinngortitamik illersuinissamut ilaatinneqarput.

Imm. 2. Tamanna aamma taarsiinissamut akisussaaffeqarnermut allatullu mingutsitsinermut aamma avatangiisini allatut sunniinermut akisussaaffeqarnermut aammalu avatangiisini ajoqusiinermut taarsiisarneq pillugu inatsimmi maleruagassat pillugit Inatsisartut inatsisaanni maleruagassanut atuuppoq.

Kapitali 3

Nassuiaatit

Aatsitassat

§ 10. Aatsitassat paasineqassapput tassaasut aatsitassanit atortussiassat allat, ikummatissiassanit (uulia aamma naturgassi) allaanerusut, tamarmik.

Imm. 2. Ikummatissiassat paasineqassaaq tassaasut ikummatissiassat nalinginnaasumik tassaasut C_nH_{2n+2} , tassani $n < 25$.

Ingerlatassat, akuersissutit, pisinnaatitsisummik pigisaqartut, akuersissuteqarnerit aamma pilersaarutit

§ 11. "Aatsitassarsiorluni ingerlataqarnerit" paasineqassapput tassaasut, ingerlatassat Inatsisartut inatsisaanni pineqartunut ilaasut.

§ 12. "Akuersissutit" paasineqassaaq tassaasut akuersissutit imm. 2 – 5-imi taaneqartut ilaat, ingerlatassat Inatsisartut inatsisaanni pineqartunut ilaasut suliarinissaannut akuersissut Inatsisartut inatsisaat malillugu Naalakkersuisunit tunniunneqartoq.

Imm. 2. . "Misissueqqaarnissamut akuersissut" paasineqassaaq tassaasoq, aatsitassanut tunngatillugu misissueqqaarnermik suliaqarnissamut akuersissut, takuuk § 28.

Imm. 3. "Aatsitassarsiorluni misissuinissamut akuersissut" paasineqassaaq tassaasoq, aatsitassarsiorluni misissuinermik suliaqarnissamut akuersissut, takuuk § 34.

Imm. 4. "Piiaanissamut akuersissut" paasineqassaaq tassaasoq, aatsitassanik piiaanermik suliaqarnissamut akuersissut, takuuk § 43.

Imm. 5. "Ilisimatuussutsikkut misissuinernut" paasineqassaaq tassaasoq, aatsitassanut tunngatillugu ilisimatuussutsikkut misissuinernik suliaqarnissamut akuersissut, takuuk § 62.

§ 13. "Pisinnaatitsisummik pigisaqartooq" paasineqassaaq tassaasoq, Inatsisartut inatsisaat malillugu akuersissut Naalakkersuisunit tunniunneqartoq malillugu pisinnaatitsisummik pigisaqartooq, takuuk § 12.

§ 14. "Akuersissuteqarneq" tassaasoq, ataqatigiinnerani allatut pisoqartussaasimanngippat, ingerlatassanik Inatsisartut inatsisaanni pineqartunut ilaasunik imm. 2-3-mi taaneqartunik suliaqarnissamut Inatsisartut inatsisaat malillugu akuersissuteqarneq Naalakkersuisunit nalunaarutigineqartoq.

Imm. 2. "Ingerlatassanut akuersissuteqarneq" paasineqassaaq tassaasoq aatsitassarsiorfimmuut pilersaarummut, takuuk § 15, imm. 1, matusinissamut pilersaarummut, takuuk § 15, imm. 2, imaluunniit

ingerlatassanik aalajangersimasunik suliaqarnissamut akuersissuteqarneq, takuuk § 22, imm. 3, aamma § 120, imm. 1.

Imm. 3. "Avammut annissinissamut akuersissuteqarneq" paasineqassaaq aatsitassanik Kalaallit Nunaanniit annissinissamut akuersissuteqarneq, takuuk § 22, imm. 3, nr. 1, aamma § 75.

§ 15. "Aatsitassarsiorfimmur pilersaarut" paasineqassaaq tassaasoq, pisinnaatitsissummik pigisaqartup aatsitassanik piiaanissaanut aamma piiaanissamut akuersissut malillugu tamatumunnga atatillugu ingerlatassaannut, pisinnaatitsissummik pigisaqartup pilersaarutaa, takuuk § 77.

Imm. 2. "Matusinissamut pilersaarut" paasineqassaaq tassaasoq, pisinnaatitsissummik pigisaqartup aatsitassanik piiaanermik kingusinnerusukkur unitsitsinissaanut aamma matusinissaanut aammalu piiaanissamut akuersissut malillugu tamatumunnga atatillugu ingerlatassaannut, pisinnaatitsissummik pigisaqartup pilersaarutaa, takuuk § 80.

Imm. 3. Ingerlatassanur pilersaarut" paasineqassaaq tassaasoq, akuersissut malillugu ingerlatassanik aalajangersimasunik suliaqarnissamut pisinnaatitsissummik pigisaqartup pilersaarutaa, takuuk § 120, imm. 1, ilanngullugu ilaatigut aatsitassarsiorfimmur pilersaarut imm. 1, aamma matusinissamut pilersaarut, takuuk imm. 2.

Aalajangersakkat aamma atugassarititaasut

§ 16. "Aalajangersakkat aamma atugassarititaasut" paasineqassappur tassaasut, ataqatigiinnerani allatut pisoqartussaasimanngippat, aalajangersakkat aamma atugassarititaasut Inatsisartut inatsisaat malillugu aalajangersagaasut. Taakkunani ilaatigut ilaatinneqarput nalunaarutini, qinnuteqaatinut suleriaatsini allanilu suleriaatsini Inatsisartut inatsisaat malillugu aalajangersagaasuni aalajangersakkat, akuersissutitut aamma akuersissuteqarnernut Inatsisartut inatsisaat malillugu tunniunneqartunut atugassarititaasut nalinginnaasut, akuersissutitut aamma akuersissuteqarnernut Inatsisartut inatsisaat malillugu tunniunneqartunut atugassarititaasut aamma Inatsisartut inatsisaat malillugu aalajangiinerni aalajangersakkat aamma atugassarititaasut.

Pisinnaatitsissummik pigisaqartup isumaqatigiissuteqarfigisai

§ 17. "Pisinnaatitsissummik pigisaqartup isumaqatigiissuteqarfigisaa" paasineqassaaq tassaasoq, pisinnaatitsissummik pigisaqartup ingerlatassanik pisinnaatitsissummik pigisaqartumut akuersissummi pineqartunut ilaasunik suliaqarnerani, pisinnaatitsissummik pigisaqartup nioqqutissanik imaluunniit sullissinernik pilersuisua, ilanngullugit sanaartugassanur akigititaasunur sullissinerit imaluunniit siunnersortitut sullissinerit. Pisinnaatitsissummik pigisaqartup isumaqatigiissuteqarfigisaani aamma pisinnaatitsissummik pigisaqartup isumaqatigiissuteqarfigisaata isumaqatigiissuteqarfigisai ilaalu ilanngullugit, pineqartunut ilaatinneqarput.

Sinerissap avataani suliaqarfiit

§ 18. "Sinerissap avataani suliaqarfiit" paasineqassaaq tassaasut, umiarsuit, prammit, angallatit allat, platformit aamma aqqissuussinerit allat, imaani sumiiffimmi aalajangersimasumi imaluunniit sumiiffinni

aalajangersimasuni arlalinni tulleriinni ingerlatassamik ataatsimik arlalinnilluunniit suliaqarnermut atorneqartut:

- 1) Imaani sumiiffimmi misissueqqaarneq, aatsitassarsiorluni misissuineq aamma aatsitassanik piianeq.
- 2) Aatsitassanik, imaani sumiiffimmi imaluunniit nunami sumiiffimmi piiarneqartunik suliareqqineq.
- 3) Aatsitassanik, imaani sumiiffimmi imaluunniit nunami sumiiffimmi piiarneqartunik uninngasuuteqarneq.
- 4) Suliffiup atortuinik, atortussanik, nioqqutissanik imaluunniit pigisanik imaani sumiiffimmi imaluunniit nunami sumiiffimmi ingerlatassanik Inatsisartut inatsisaanni pineqartunut ilaasunik suliaqarnermut atatillugu atorneqartunik tigusineq, uninngasuuteqarneq, allamut usiliussineq imaluunniit nassiussineq.
- 5) Inuit imaani sumiiffimmi imaluunniit nunami sumiiffimmi ingerlatassanik Inatsisartut inatsisaanni pineqartunut ilaasunik suliaqarnermut atatillugu suliaqarnermik imaluunniit ingerlatassanik suliaqartut assartorneqarnerannut, uninngaarfinut imaluunniit unnuisarfinut atatillugu tikiffissap sumiiffia, paarlaaffissap sumiiffia imaluunniit aallarfissap sumiiffia.
- 6) Inuit imaani sumiiffimmi imaluunniit nunami sumiiffimmi ingerlatassanik Inatsisartut inatsisaanni pineqartunut ilaasunik suliaqartut ineqarfii.

Imm. 2. "Sinerissap avataani suliaqarfiit angallattakkat" paasineqassaaq tassaasut, sinerissap avataani suliaqarfiit suulluunniit, imaatigut angallallugit, tissiartillugit imaluunniit kalillugit inissiffissamut allamut nuunneqarsinnaasut, aammalu piffissami atuuffissaanni sumiiffinni arlalinni imaluunniit assigiinngitsorpassuarni atorneqartussatut eqqarsaatigineqartut.

Imm. 3. "Sinerissap avataani suliaqarfiit aalaakkaasut" paasineqassaaq, sinerissap avataani suliaqarfiit, sinerissap avataani angallattagaanngitsut, takuuk imm. 2.

Sinerissap avataani umiarsuit

§ 19. "Sinerissap avataani umiarsuit" paasineqassapput tassaasut, umiarsuit, prammit aamma angallatit allat, sinerissap avataani suliaqarfiunngitsut, takuuk § 18, aammalu sinerissap avataani suliaqarfinnut atatillugit ingerlatanik suliarinniffusut.

Avatangiisini ajoqusiineq

§ 20. Avatangiisini ajoqusiineq paasineqassaaq:

- 1) Nunamik, imaani, immap naqqanik aamma nunap iluanik, imermi imaluunniit silaannarmi mingutsitsineq.
- 2) Silap pissusaanut tunngasunut mingutsitsineq imaluunniit allatigut pitsaanngitsumik sunniineq.
- 3) Pinngortitami, ilanngullugit inuit, uumasut imaluunniit naasut, allatut annertuumik pitsaanngitsumik sunniineq imaluunniit annertuumik akornusersuineq.

Imm. 2. Kapitali 14 malillugu akisussaasuusoq paasineqassaaq tassaasoq ingerlatassamik Inatsisartut inatsisaanni pineqartunut ilaasunik suliaqartoq, aqutsisoq imaluunniit suliarineqarneranik nakkutiginnittoq.

Najukkami aatsitassarsiorluni ingerlatassat

§ 21. Najukkami aatsitassarsiorluni ingerlatat paasineqassaaq tassaasoq, aatsitassat pillugit annikitsumik aatsitassarsiorluni ingerlataqarnerit pillugit Inatsisartut inatsisaat aamma Kalaallit Nunaanni sanaartornernik suliaqarnernut aamma attaveqatigiinnermi suliaasanut ilaalu ilanngullugit atugassanik aatsitassanik piianeq.

Kapitali 4

Maleruagassat nalinginnaasut

Namminersorlutik Oqartussat aatsitassanut pisinnaatitaanerat aammalu ingerlatassanut akuersissummik tunniussisarnissaq imaluunniit akuersissuteqartarnissaq pillugit piumasaqaatit

§ 22. Namminersorlutik Oqartussat aatsitassanik Kalaallit Nunaanni nunap iluaniittunik atuinissamut piiaanissamullu piginnittussaataapput.

Imm. 2. Ingerlatassat makkua akuersissutit Inatsisartut inatsisaanni maleruagassat malillugit Naalakkersuisunit akuerineqartut malillugit taamaallaat Kalaallit Nunaanni suliarineqaqqusaapput:

- 1) Aatsitassanut tunngatillugu misissueqqaarneq § 28 malillugu tamatumunnga akuersissut tunniunneqartoq malillugu aatsaat ingerlateqqusaavoq.
- 2) Aatsitassarsiorluni misissuineq § 34 malillugu akuersissut tamatumunnga tunniunneqartoq malillugu aatsaat ingerlateqqusaavoq.
- 3) Aatsitassanik piianeq § 43 malillugu akuersissut tamatumunnga tunniunneqartoq malillugu aatsaat ingerlateqqusaavoq.
- 4) Aatsitassanut tunngatillugu ilisimatuussutsikkut misissuinerit, imm. 3 aamma 4 malillugit allatut pisoqartussaasimanngippat, § 62 malillugu akuersissut tamatumunnga tunniunneqartoq malillugu aatsaat ingerlateqqusaavoq.

Imm. 3. Ingerlatassat makkua akuersissuteqarnerit makkua Inatsisartut inatsisaanni maleruagassat malillugit Naalakkersuisunit nalunaarutigineqartut malillugit aatsaat Kalaallit Nunaanni ingerlateqqusaapput:

- 1) Aatsitassanik Kalaallit Nunaanniit annissineq aatsaat piiaanissamut akuersissut aamma Inatsisartut inatsisaat imaluunniit avammut nioqquteqarnissamut akuersissuteqarneq § 75, imm. 1 imaluunniit 2 malillugu tamatumunnga nalunaarutigineqartoq malillugu aatsaat pisinnaavoq.
- 2) Ingerlatassat allat aatsitassanut tunngatillugu misissueqqaarnermut, aatsitassarsiorluni misissuinerimut, piianerimut imaluunniit ilisimatuussutsikkut misissuinerimut tunngassuteqartut, imm. 3, nr. 1 malillugu akuersissummi ilaatinneqanngitsut, ingerlatassanut akuersissuteqarneq malillugu taamaallaat suliarineqarsinnaapput.

Imm. 4. Naalakkersuisut aatsitassat, aatsitassarsiorluni ingerlataqarnerit aammalu ingerlatassat allat taakkununga atasut pillugit nalinginnaasumik imaluunniit nunap assiliornissatut isikkoqartumik ilisimatuussutsikkut suliaqarnikkullu misissuinerimut suliaqarsinnaapput.

Oqartussatut suliarinninneq

§ 23. Naalakkersuisut Aatsitassanut Aqutsisoqarfik aamma Aatsitassanik Suliassaqaqfinnut Avatangiisinut Aqutsisoqarfik peqatigalugit aatsitassanut suliassaqaqfimmi Inatsisartut inatsisaanni pineqartunut ilaasumi, allaffissornikkut oqartussaapput.

Imm. 2. Imm. 3 naapertorlugu avatangiisinut tunngasut eqqaassanngikkaanni, Aatsitassanut Aqutsisoqarfik allaffissornikkut oqartussaasuvoq.

Imm. 3. Aatsitassanik Suliassaqaqfinnut Avatangiisinut Aqutsisoqarfik (Avatangiisinut Aqutsisoqarfik) aatsitassanut suliassaqaqfik pillugu avatangiisinut tunngasunut allaffissornikkut oqartussaasuvoq, ilanngullugit avatangiisinik allanngutsaaliuineq, silap pissusaanik allanngutsaaliuineq, pinngortitamik allanngutsaaliuineq, avatangiisinut akisussaaffik aammalu avatangiisinik nalilersuineq. Avatangiisinut Aqutsisoqarfiup nalilersuineri aalajangiinerilu, ilisimatuussutsikkut aamma arlaannaannulluunniit attuumassuteqartunik avatangiisinut sullissivimmit ataatsimit arlallinnilluunniit nalilersuinernik aallaaveqartinneqassapput.

Imm. 4. Aatsitassat, aatsitassarsiorluni ingerlataqarnerit, nunap iluata toqqorsivittut imaluunniit aatsitassarsiorluni ingerlatanut tunngatillugu siunertanut allanut atorineqarnera, nukissiuuteqarnermi ingerlataqarnerit tassunga atasut aammalu ingerlataqarnerit allat tassunga atasut tamaasa pillugit pissutsit Inatsisartut inatsisaanni pineqartunut ilaasut tamarmik, ataatsimoortumik akuutitsiviusumillu oqartussamit suliarineqarnissaasa isumagineqarnissaa, Naalakkersuisut isumagissavaat.

Imm. 5. Aatsitassanut suliassaqaqfik Inatsisartut inatsisaanni pineqartunut ilaasoq pillugu oqartussat suliarinnittarnerat, pisinnaatitsissummik pigisaqartut allallu Inatsisartut inatsisaanni pineqartunut ilaasut, oqartussamut ataasiinnarmut attaveqaqateqartussaannerat aammalu nalunaarutininik, allakkianik aalajangiinernillu ilaalu ilanngullugit oqartussamit tassannga tigusaqartartussaannerat, tunngavigalugu aaqqissuunneqarput.

Imm. 6. Aatsitassanut Aqutsisoqarfik ataqatigiissaarisutut ingerlatsivimmi oqartussaavoq aammalu Avatangiisinut Aqutsisoqarfimmiit oqaaseqaatinik aalajangiinernillu pisariaqartunik piniartarluni. Avatangiisinut Aqutsisoqarfik aamma Aatsitassanut Aqutsisoqarfik suliassanik suliarinninneq aalajangiinerillu pillugit imminnut ingerlaavartumik ilisimatitseqatigiissapput.

Imm. 7. Oqartussat imm. 1-imi taaneqartut tassaapput, ingerlatassanut pissutsinullu Inatsisartut inatsisaanni pineqartunut ilaasunut tunngatillugu, inatsisit maleruagassallu allat malillugit oqartussat aalajangiinnaatitaasut. Taamaattoq inatsisit imaluunniit maleruagassat allat malillugit oqartussat allat oqartussatut suliarinnittussaasimappata, tamanna atuutissanngilaq.

§ 24. Aatsitassanut Aqutsisoqarfiup imaluunniit Avatangiisinut Aqutsisoqarfiup aalajangiinerata naammagittaalliutigineqarnera Naalakkersuisunut suliakkiunneqarsinnaavoq.

Naammagittaalliorsinnaatitaapput:

1) Suliami pineqartoq.

2) Peqatigiiffiit kattuffillu malittarisassatik malillugit sukisaarsaarneq, avatangiisini pinngortitamilu soqutigisat imaluunniit inuiaqatigiinnut tunngasut pillugit soqutigisanik annertuunik isumaginninnissamut siunertaqartut.

Imm. 2. Naammagittaalliornissamut killigitiq sapaatit akunnerinik 6-inik sivilissuseqarpoq.

Naammagittaalliornissamut killigitiq naatsorsorneqassaaq, aalajangiineq suliami pineqartumut nalunaarutigineqarsimappat, ulloq nalunaarutigineqarnera aallarnerfigalugu, aammalu aalajangiineq tamanut ammasumik nalunaarutigineqarsimappat, ulloq tamanut nalunaarutigineqarfia aallarnerfigalugu.

Naammagittaalliornissamut killigititaq arfininngornermi imaluunniit ullumi nalliuttumi naasimappat, naammagittaalliornissamut killigititat ulluinnarmut tullermut siullermut sivitsorneqassaaq.

Imm. 3. Naammagittaalliut oqartussamut aalajangiisumut allaganngorlugit tunniunneqassaaq. Naammagittaalliornissamut piffissamut killigititap naanerata kingorna sapinngisamik piaartumik naammagittaalliut aammalu oqartussap aalajangiinera aamma naammagittaalliummut oqaaseqaataa oqartussap Naalakkersuisunut nassiutissavai.

Imm. 4. Akuersissutip, akuersissuteqarnerup imaluunniit immikkut ittumik akuersissuteqarnerup naammagittaalliutigineqarneri, Naalakkersuisut allatut aalajangiisimanngippata, kinguartitsinermik sunniuteqassanngillat.

Imm. 5. Akuersissutit, akuersissuteqarnerit aamma immikkut ittumik akuersissuteqarnerit aalajangersimasut naammagittaalliornissamut piffissap killigititap iluani atorineqassanngitsut pillugu aalajangersakkanik Naalakkersuisut aalajangersaasinnaapput.

Imm. 6. Peqqusissutip imaluunniit inerteqquteqarnerup naammagittaalliutigineqarnera, Naalakkersuisut allatut aalajangiisimanngippata, kinguartitsinermik sunniuteqassanngilaq.

Eqqartuussivinnut aalajangiinermik suliaassanngortitsisarneq

§ 25. Pissutsit Inatsisartut inatsisaanni pineqartunut ilaasut pillugit aalajangiineq taamaallaat piffissaliussap ukiumik ataatsimik sivilisuseqartup iluani eqqartuussivinnut suliaassanngortinneqarsinnaavoq. Piffissamut killiliussaq ulloq aalajangiinerup suliami pineqartumut, aalajangiineq suliami pineqartumut nalunaarutigineqarsimappat, nalunaarutigineqarfia aallarnerfigalugu naatsorsorneqassaaq. Aalajangiineq tamanut ammasumik nalunaarutigineqarsimappat, taamaattoq piffissamut killiliussaq ulloq tamanut saqqummiussineq aallarnerfigalugu naatsorsorneqassaaq. Piffissamut killiliussaq arfininngornermi, sapaammi imaluunniit nalliuttumi naappat, piffissamut killiliussaq ulluinnarmut tullermut siullermut sivitsorneqassaaq.

Imm. 2. Aalajangiinerup eqqartuussivinnut suliaassanngortinneqarnerani, Naalakkersuisut allamik aalajangiisimanngippata, aalajangiineq kinguartitsinermik sunniuteqassanngilaq.

Imm. 3. Pissutsit Inatsisartut inatsisaanni pineqartunut ilaasut pillugit aalajangiineq taamaallaat eqqartuussivinnut Kalaallit Nunaanni aalajangiisinnaatitaasunut suliaassanngortinneqarsinnaavoq. Aalajangiineq eqqartuussivinnut suliaassanngortinneqartoq, Kalaallit Nunaanni eqqartuussivinnut siullertut suliarinnittussamut suliaakkiunneqassaaq.

Naalakkersuisut akuersissutinik qinnuteqaatit aamma akuersissutit pillugit ukiumoortumik nassuiaataat

§ 26. Naalakkersuisut ukiut tamaasa akuersissutinik qinnuteqaatit, qinnuteqaatit tunniunneqartut aamma akuersissutinik neqeroortitsinissat pilersaarutigineqartut aammalu ingerlanneqartut pillugit nassuiaammik tamanut ammasumik suliaqartassapput. Naalakkersuisut nassuiaat Inatsisartunut nassiutissavaat.

§ 27. Naalakkersuisut suliani aalajangiisoqannginnerani, pissutsit inuiaqatigiinnut annertuumik sunniuteqarsinnaasut pillugit Inatsisartuni ataatsimiititaliamut attuumassuteqartumut ilisimatitsisassapput.

Kapitali 5

Aatsitassanut tunngatillugu misissueqqaarnissamut akuersissut

Akuersissut

§ 28. Naalakkersuisut atugassarititaasut erseqqinnerusumik aalajangersarneqartut tunngavigalugit, sumiiffimmut erseqqinnerusumik killissalerneqartumut, aatsitassanut ataatsimut arlalinnulluunniit tunngatillugu misissueqqaarnernik suliaqarnissamut kisermaassisussaatitaanani akuersissummik tunniussisinnaapput.

Pisinnaatitsissummik pigisaqartumut piumasaqaatit

§ 29. § 28 malillugu pisinnaatitsissummik pigisaqartoq akuersissummik tunniussinermi aammalu piffissaq akuersissuteqarfusoq tamaat aktiaatileqatigiiffittut imaluunniit ingerlatseqatigiiffittut piginneqatigiiffiusutut, Kalaallit Nunaanni angerlarsimaffeqartutut imaluunniit nunami allami angerlarsimaffeqarluni taamaaqataanik aningaasaateqarluni ingerlatseqatigiiffittut, nalunaarsorsimasuussaaq. Ingerlatseqatigiiffik aammattaaq Kalaallit Nunaanni inuussutissarsiortutut nalunaarsorsimassaaq, takuuk Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat.

Imm. 2. Pisinnaatitsissummik pigisaqartup akuersissutip tunniunneqarnerani aammalu piffissaq akuersissuteqarfusoq tamaat § 66 malillugu piumasaqaatit naammassisimassavai.

Imm. 3. Aningaasaateqarluni ingerlatseqatigiiffik nunami allami angerlarsimaffeqartoq, aktiaatileqatigiiffimmut imaluunniit ingerlatseqatigiiffimmut piginneqatigiiffiusumut Kalaallit Nunaanni angerlarsimaffeqartumut, assingunerseq nalnornisoqarluni pisoqartillugu, tamatumunnga Naalakkersuisut aalajangiissapput.

Piffissaq akuersissuteqarfusoq

§ 30. Misissueqqaarnissamut akuersissut ukiut 5-it tikillugit piffissamut akuersissuteqarfiusumut tunniunneqassaaq.

Imm. 2. Imm. 1 malillugu piffissaq akuersissuteqarfusoq, tamatigut ukiut 5-it tikillugit piffissalerlugu ataasiarluni imaluunniit arlaleriaryluni Naalakkersuisunit sivitsorneqarsinnaavoq, taamaattoq takuuk imm. 4.

Imm. 3. Piffissap akuersissuteqarfiusup ataatsimut katillugu ukiunit 10-init sivilunerusumut akuersissuteqarfusoq piffissalerlugu sivitsorneqarneri tamaasa akuersissummumut atugassarititaasut allanngortillugit Naalakkersuisut aalajangersaasinnaapput.

Imm. 4. Misissueqqaarnissamut akuersissummumut piffissaq akuersissuteqarfusoq ataatsimut katillugu ukiunit 15-init sivilunerusinnaanngilaq.

Imm. 5. Aatsitassarsiorluni misissueqqaarnissamut akuersissut atorunnaassaaq, piffissaq akuersissuteqarfusoq naappat imaluunniit akuersissut atorunnaarpat, Naalakkersuisunit

tunuartinneqarpat imaluunniit Naalakkersuisut tamatuminnga akuersissuteqareernerisigut
pisinnaatitsissummik pigineqartumiit Naalakkersuisunut utertinneqarpat.

*Oqartussat suliarinninneranni aningaasartuutitut matussutissanik akiliutinik, akiliutissanik aamma
aningaasartanik akiliineq*

§ 31. Naalakkersuisut misissueqqaarnissamut akuersissummik tunineqarnissaq imaluunniit piffissap
akuersissuteqarfiusup sivitsorneqarnissaa aamma misissueqqaarnissamut akuersissummik
tunineqarnissaq imaluunniit piffissap akuersissuteqarfiusup sivitsorneqarnissaa pillugu qinnuteqaammik
tigusaqarnerannut suliarinninnerannullu, misissueqqaarnissamut akuersissummik imaluunniit
misissueqqaarnissamut akuersissut malillugu piffissap akuersissuteqarfiusup sivitsorneqarnissaanik
qinnuteqartoq akiliummik akiliissasoq, pillugu aalajangersakkanik Naalakkersuisut
aalajangersaasinnaapput.

Imm. 2. Pisinnaatitsissummik pigisaqartoq akuersissutip aamma akuersissut malillugu ingerlatassat
atuutsiinnarneranut ilaalu ilanngullugu Naalakkersuisunut akiliummik akiliissasoq, misissueqqaarnissamut
akuersissummik aalajangersakkanik aamma atugassarititaasunik Naalakkersuisut
aalajangersaasinnaapput.

Imm. 3. Akuersissut aamma akuersissut malillugu ingerlatassat pillugit Inatsisartut inatsisaat malillugu
suliassanik suliarinninnermut aamma allanik oqartussat suliarinninnerannut atatillugu Naalakkersuisut
aningaasartuutaannut matussutissanik aningaasanik pisinnaatitsissummik pigisaqartoq akiliissasoq pillugu
aalajangersakkanik atugassarititaasunillu Naalakkersuisut aalajangersaasinnaapput. Naalakkersuisut
aningaasat akilernissaat akiliutitut imaluunniit aningaasartuutinik utertitsilluni akiliinertut
akilersissinnaavaat.

*Ingerlatat pillugit nalunaarusiat, paasissutissanik nalunaarsukkanik misissugassanillu tunniussisarneq aamma
isertuussisussaaneq*

§ 32. Pisinnaatitsissummik pigisaqartup, takuuk § 28, Naalakkersuisunut tunniutissavai:

- 1) Akuersissut malillugu misissueqqaarnerit aamma ingerlataqarnerit allat taakkualu inernerit pillugit
nalunaarusiaq
- 2) Misissueqqaarnerup inernerisa aamma taakkunannga paasissutissat nalunaarsukkat misissugassallu
assilineri aamma pisinnaatitsissummik pigisaqartup nassuiaanerit, inerniliineri tamatumunngalu
inassuteqaatai.

Imm. 2. Paasissutissat Naalakkersuisut imm. 1 naapertorlugu tigusaat, piffissaq akuersissuteqarfiusoq
tamaat isertuussaapput. Akuersissut atorunnaarpat, paasissutissat Naalakkersuisunut tunniussinissamut
piffissamut killiliussamiit ukiuni 5-ini isertuussaapput.

Imm. 3. Naalakkersuisut nalunaarusiat, misissueqqaarnerit inernerit, paasissutissat nalunaarsukkat,
misissugassat aamma nassuiaanerit, inerniliinerit inassuteqaatillu ilaalu ilanngullugit isertuussat pillugit
paasissutissat nalinginnaasut, piffissami isertuussiviusussami tamanut saqqummiussinnaavaat.
Naalakkersuisut paasissutissanik nalinginnaasunik taamaattunik tamanut saqqummiussinnginnermi,
paasissutissat pisinnaatitsissummik pigisaqartumut tusarniaassutigalugit nassutissavai aammalu
minnerpaamik qaammatisiutit malillugit ulluni 14-ini piffissamut naleqquttumik killissaliussap

aalajangersagaasup iluani pisinnaatitsisummik pigisaqartoq tassunga oqaaseqaammik nassiussisinnaasoq immaqalu paasissutissanik tamaginnik imaluunniit ilaannik saqqummiussinissamut tunngavilersukkamik akerliliissuteqarsinnaasoq, pisinnaatitsisummik pigisaqartoq paasissutississallugu. Pisinnaatitsisummik pigisaqartoq paasissutissanik tamaginnik imaluunniit ilaannik tamanut saqqummiussinissamut akerliliissummik piffissamut killiliussap iluani nassiussippat, aammalu pisinnaatitsisummik pigisaqartup isertuussinissamik soqutigisaqarnerata mianerinissaa, Naalakkersuisut paasissutissanik pineqartunik tamanut saqqummiussinissamut soqutigisaqarnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

Imm. 4. Imm. 2 aamma 3 apequtaatinngit, Naalakkersuisut pisuni tamaginni avatangiisinut paasissutissat aamma avatangiisinut nalunaarusiat, nalinginnaasumik inuiaqatigiinnut soqutiginaatilittut nalilerneqartut, tamanut saqqummersissinnaavaat.

Imm. 5. Piffissaq isertuussiviusoq naappat, pisinnaatitsisummik pigisaqartoq aamma Namminersorlutik Oqartussat nalunaarusiornerut, misissueqqaarnerit inernerinut, paasissutissanut nalunaarsukkanut, misissugassanut aamma nassuiaanernut, inerniliinernut inassuteqaatinullu ilaalu ilanngullugit piginnittussaataalissapput aammalu akeqanngitsumik atugassiissutiginnissaannut atornissaannullu pisinnaatitaallissallutik.

Imm. 6. Naalakkersuisut pissutsit imm. 1-5-imi taaneqartut pillugit aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit nalunaarusiat ilusaat, imarisaat aamma piffissani aalajangersimasuni tunniussisarnissaq, ingerlatanik aalajangersimasunik suliaqarnermi aammalu pisut imaluunniit pissutsit aalajangersimasut pilertarnerat. Tassunga ilanngullugu Naalakkersuisut ingerlatat aalajangersimasut, inernerit, pisut pissutsillu pillugit paasissutissanik nalinginnaasunik tamanut saqqummiinissamut periarfissaqarnerat pillugu aalajangersakkanik atugassarititaasunillu aalajangersaasinnaapput.

Akuersissut aamma ingerlatassat pillugit aalajangersakkanik aamma atugassarititaasunik Naalakkersuisut aalajangersaasarnerat

§ 33. Naalakkersuisut akuersissut aamma akuersissut malillugu ingerlatat § 1 malillugu Inatsisartut inatsisaata siunertaanut aamma Inatsisartut inatsisaanni aalajangersakkanut allanut naapertuuttumik, pisinnaatitsisummik pigisaqartup Kalaallit Nunaanni inatsisinik naammassinninnissaa, Namminersorlutik Oqartussat pisinnaatitaaffii aningaasaqarnikkullu soqutigisai aammalu pisinnaatitsisummik pigisaqartup pisinnaatitaaffii qulakkeerniarlugit, misissueqqaarnissamut akuersissummut aalajangersakkanik aamma atugassarititaasunik aalajangersaasinnaapput.

Kapitali 6

Aatsitassarsiorluni misissuinissamut akuersissut

Akuersissut

§ 34. Naalakkersuisut sumiiffimmut erseqqinnerusumik killissalerneqartumut atugassarititaasut erseqqinnerusumik aalajangersarneqartut tunngavigalugit kisermaassisussaataalluni aatsitassanik ataatsimik arlalinnilluunniit aatsitassarsiorluni misissuinissamut akuersissummik tunniussisinnaapput.

§ 35. Qinnuteqartoq ujaasinissamik akuersissummik § 34-i naapertorlugu nalunaarfiginnginnerani, Naalakkersuisut qinnuteqaat inuiaqatigiinnut ulluni 21-ni tusarniaassutigisassanngortissavaat.

Imm. 2. Tusarniaanermi piffissaq imm. 1-i naapertorlugu, immikkut pisuni, ulluni 21-ni sivitsorneqarsinnaavoq.

Pisinnaatitsissummik pigisaqartumut piumasaqaatit

§ 36. § 34 malillugu pinsinnaatitsissummik pigisaqartup akuersissutip tunniunneqarnerani aammalu piffissaq akuersissuteqarfusoq tamaat aktiaatileqatigiiffittut imaluunniit ingerlatseqatigiiffittut piginneqatigiiffittut, Kalaallit Nunaanni angerlarsimaffeqartutut imaluunniit aningaasaateqarluni ingerlatseqatigiiffittut taamaaqataatut nunami allami angerlarsimaffeqartutut, nalunaarsorsimassaaq. Ingerlatseqatigiiffik aammattaaq Kalaallit Nunaanni inuussutissarsiortutut nalunaarsorsimassaaq, takuuk Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat.

Imm. 2. Aningaasaateqarluni ingerlatseqatigiiffik nunami allami angerlarsimaffeqartoq, aktiaatileqatigiiffimmut imaluunniit ingerlatseqatigiiffimmut piginneqatigiiffiusumut Kalaallit Nunaanni angerlarsimaffeqartumut, takuuk imm. 1, naapertuunnersoq nalornisoqartillugu, Naalakkersuisut tamatumunnga aalajangiissapput.

Piffissaq akuersissuteqarfusoq

§ 37. Aatsitassarsiorluni misissuinissamut akuersissut piffissamut akuersissuteqarfiusumut ukiunut 5-inut tunniunneqassaaq.

Imm. 2. Imm. 1 malillugu ukiuni 5-ini piffissaq akuersissuteqarfusoq Naalakkersuisut ataasiarlutik arlaleriarlutilluunniit sivitsorsinnaavaat. Piffissaq akuersissuteqarfusoq siullermik ukiunik 5-inik piffissalerlugu sivitsorneqassaaq. Tamatuma kingorna piffissaq akuersissuteqarfusoq tamatigut ukiunik 3-nik piffissalerlugu sivitsorneqartassaaq. Pinsinnaatitsissummik pigisaqartup imm. 1 malillugu ukiuni 5-ini piffissami akuersissuteqarfioqqaartumi akuersissut aamma akuersissut malillugu ingerlatat pillugit pisussaaffini tamaasa naammassisimappagit, pinsinnaatitsissummik pigisaqartoq ukiunik 5-inik piffissalerlugu piffissap akuersissuteqarfiusup siullermeertumik sivitsornissaanut pinsinnaatitaassaaq. Pinsinnaatitsissummik pigisaqartup imm. 2 manna malillugu ukiuni 5-ini imaluunniit ukiuni 3-ini piffissap akuersissuteqarfiusup sivitsorneqarfiani akuersissut aamma akuersissut malillugu ingerlatat pillugit pisussaaffiit tamaasa naammassisimappagit, Naalakkersuisut piffissaq akuersissuteqarfusoq ukiunik 3-nik piffissalerlugu sivitsorsinnaavaat.

Imm. 3. Piffissap akuersissuteqarfiusup ukiunit 10-init ataatsimut katillugu sivilunerusumik akuersissuteqarfusoq piffissalerlugu sivitsorneqarnerini tamaginni, akuersissummut atugassarititaasunik allanngortinneqartunik Naalakkersuisut aalajangersaasinnaapput.

Imm. 4. Aatsitassarsiorluni misissuinissamut akuersissummut piffissaq akuersissuteqarfusoq ataatsimut katillugit ukiunit 22-init sivilunerusinnaangilaq.

Imm. 5. Aatsitassarsiorluni misissuinissamut akuersissut atorunnaassaaq, piffissaq akuersissuteqarfusoq naappat imaluunniit atorunnaarpat, Naalakkersuisunit tunuartinneqarpat imaluunniit Naalakkersuisut

tamatuminnga akuersissuteqareernerisigut pisinnaatitsissummik pigineqartumiit Naalakkersuisunut utertinneqarpat.

Oqartussat suliarinninneranni aningaasartuutitut matussutissanik akiliutinik, akiliutissanik aamma aningaasanik akiliinerit, aatsitassarsiorluni misissuinnermut pisussaaffiit

§ 38. Naalakkersuisut aatsitassarsiorluni misissuinissamut akuersissummik tunineqarnissamut imaluunniit aatsitassarsiorluni misissuinissamut akuersissut malillugu piffissap akuersissuteqarfusup sivitsorneqarnissaanik aamma aatsitassarsiorluni misissuinissamut akuersissummik imaluunniit piffissap akuersissuteqarfusup sivitsorneqarnissaanik tunineqarnissamut qinnuteqaammik tigusaqarnerannut suliarinninnerannullu akiliummik, aatsitassarsiorluni misissuinissamut akuersissummik imaluunniit piffissap akuersissuteqarfusup sivitsorneqarnissaanik qinnuteqartoq akiliissasoq pillugu aalajangersakkanik Naalakkersuisut aalajangersaasinnaapput.

Imm. 2. Pisinnaatitsissummik pigisaqartup aatsitassarsiorluni misissuinissamut pisussaaffini naammassisimangippagit, pisinnaatitsissummik pigisaqartup aatsitassarsiorluni misissuinissamut pisussaaffi aamma aningaasanik Naalakkersuisunut akiliisarneq pillugit aatsitassarsiorluni misissuinissamut akuersissummik aalajangersakkanik imaluunniit atugassarititaasunik Naalakkersuisut aalajangersaassapput.

Imm. 3. Pisinnaatitsissummik pigisaqartoq akuersissutip aamma akuersissut malillugu ingerlatassat atuutsiinnarneranut ilaalu ilanngullugu Naalakkersuisunut akiliummik akiliissasoq, pillugu aatsitassarsiorluni misissuinissamut akuersissummik aalajangersakkanik aamma atugassarititaasunik Naalakkersuisut aalajangersaasinnaapput.

Imm. 4. Akuersissut aamma akuersissut malillugu ingerlatassat pillugit Inatsisartut inatsisaat malillugu suliaasunik suliarinninnermut aamma allanik oqartussat suliarinninnerannut atatillugu Naalakkersuisut aningaasartuutaannut matussutissanik aningaasanik pisinnaatitsissummik pigisaqartoq akiliissasoq pillugu aalajangersakkanik atugassarititaasunillu Naalakkersuisut aalajangersaasinnaapput. Naalakkersuisut aningaasat akilernissaat akiliutitut imaluunniit aningaasartuutinik utertitsilluni akiliinertut akilersissinnaavaat.

Ingerlatat pillugit nalunaarusiat, paasissutissanik nalunaarsukkanik misissugassanillu tunniussisarneq aamma isertuussinissaq

§ 39. Pisinnaatitsissummik pigisaqartup Naalakkersuisunut tunniutissavai:

- 1) Aatsitassarsiorluni misissuineq aamma akuersissut malillugu ingerlataqarnerit allat taakkualu inernerit pillugit nalunaarusiaq.
- 2) Aatsitassarsiorluni misissuinnerup inernerisa aamma taakkununga paasissutissat nalunaarsukkat misissugassallu assilineri aamma pisinnaatitsissummik pigisaqartup nassuiaaneri, inerniliussat tamatumunngalu inassuteqaatit.

Imm. 2. Imm. 1 naapertorlugu paasissutissat Naalakkersuisut tigusaat isertuussaapput. Piffissaq isertuussiviususaaq Naalakkersuisunut tunniussinissamut piffissamut killiliussamiit ukiunik 5-inik sivilissuseqarpoq. Taamaattoq pisuni tamaginni akuersissutip atorunnaarnerani isertuussinissaq atorunnaassaaq.

Imm. 3. Naalakkersuisut nalunaarusiornerit, aatsitassarsiorluni misissuinerit inernerit, paasissutissat nalunaarsukkat, misissugassat aamma nassuiaanerit, inerniliinerit inassuteqaatillu ilaalu ilanngullugit isertuussat pillugit paasissutissat nalinginnaasut piffissami isertuussiviusumi tamanut saqqummersissinnaavaat. Naalakkersuisut paasissutissanik nalinginnaasunik taamaattunik tamanut saqqummiussinnginnermi, paasissutissat pisinnaatitsissummik pigisaqartumut nassiutissavai aammalu minnerpaamik qaammatisiutit malillugit ulluni 14-imi piffissamut naleqquttumik killissaliussap aalajangersagaasup iluani pisinnaatitsissummik pigisaqartoq tassunga oqaaseqaammik nassiussisinnaasoq immaqalu paasissutissanik tamaginnik imaluunniit ilaannik saqqummiussinissamut tunngavilersukkamik akerliliissuteqarsinnaasoq, pisinnaatitsissummik pigisaqartoq paasissutississallugu. Pisinnaatitsissummik pigisaqartoq paasissutissanik tamaginnik imaluunniit ilaannik tamanut saqqummiussinissamut akerliliissummik piffissamut killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata mianerinissaa, Naalakkersuisut paasissutissanik pineqartunik tamanut saqqummiussinissamut soqutigisaqarnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

Imm. 4. Imm. 2 aamma 3 apeqqutaatinnagit, Naalakkersuisut pisuni tamaginni avatangiisinut paasissutissat aamma avatangiisinut nalunaarusiat, nalinginnaasumik inuiaqatigiinnut soqutiginaatilittut nalilerneqartut, tamanut saqqummersissinnaavaat.

Imm. 5. Piffissaq isertuussiviusoq naappat, pisinnaatitsissummik pigisaqartoq aamma Namminersorlutik Oqartussat nalunaarusiornerinik, aatsitassarsiorluni misissuinerit inernerinik, paasissutissanik nalunaarsukkanik, misissugassanik aamma nassuiaanerinik, inerniliinernik inassuteqaatinillu ilaalu ilanngullugit tunniunneqartunik piginnittussaataalissapput aammalu killilersorneqanngitsumik atugassiisinnaalissallutik atuisinnaataalissallutillu.

Imm. 6. Naalakkersuisut pissutsit imm. 1-5-imi taaneqartut pillugit aalajangersakkanik atugassarititaasunillu erseqqinnerusunik aalajangersaasinnaapput, ilanngullugit nalunaarusiat ilusaat, imai aamma piffissani aalajangersimasuni tunniussisarneq, ingerlatanik aalajangersimasunik suliaqarnermi aamma pisunik imaluunniit pissutsinik aalajangersimasunik pisoqarnera. Ilanngullugu Naalakkersuisut ingerlatat, pisut aamma pissutsit aalajangersimasut pillugit nalinginnaasunik paasissutissanik tamanut saqqummiinissaannut periarfissaqarnerat pillugu aalajangersakkanik atugassarititaasunillu erseqqinnerusunik Naalakkersuisut aalajangersaasinnaapput.

Akuersissut aamma ingerlatassat pillugit aalajangersakkanik aamma atugassarititaasunik Naalakkersuisut aalajangersaasarnerat

§ 40. Naalakkersuisut akuersissut aamma akuersissut malillugu ingerlatat § 1 malillugu Inatsisartut inatsisaata siunertaanut aamma Inatsisartut inatsisaanni aalajangersakkanut allanut naapertuuttumik, pisinnaatitsissummik pigisaqartup Kalaallit Nunaanni inatsisinik naammassinninnissaa, Namminersorlutik Oqartussat pisinnaatitaaffii aningaasaqarnikkullu soqutigisai aammalu pisinnaatitsissummik pigisaqartup pisinnaatitaaffii qulakkeerniarlugit, aatsitassarsiorluni misissuinissamut akuersissummut aalajangersakkanik aamma atugassarititaasunik aalajangersaasinnaapput.

Kapitali 7

Aatsitassanik piiaanissamut akuersissut

Akuersissut

§ 41. Aatsitassarsiorluni misissuinissamut akuersissut malillugu pisinnaatitsissummik pigisaqartoq § 34 malillugu aatsitassanik piiarneqarsinnaasunik pisinnaatitsissummik pigisaqartup piiarniagaannik peqarfimmik paasinarsisisimappat killissalersuisimallunilu, aammalu aatsitassarsiorluni misissuinissamut akuersissut aamma akuersissut malillugu ingerlataqarnerit pillugit pisussaaffini tamaasa naammassisimallugit, pisinnaatitsissummik pigisaqartoq Inatsisartut inatsisaanni aalajangersakkat aamma tamatumunnga aalajangersakkat aamma atugassarititaasut allat malillugit aatsitassanik piiaanissamut akuersissummik pisinnaatitaavoq.

Imm. 2. Imm. 1-mi piumasaqaatit naammassineqarsimanersut Naalakkersuisut aalajangiissapput.

§ 42. Kisermaassisussaatailluni annikitsumik aatsitassarsiorluni misissuinissamut akuersissut malillugu pisinnaatitsissummik pigisaqartup aamma kisermaassisussaatailluni annikitsumik aatsitassanik piiaanerup, aatsitassanik piiarneqarsinnaasunik peqarfik pisinnaatitsissummik pigisaqartup piiaaviginiagaa, paasinarsisisimappagu killissalersorsimallugulu, aammalu annikitsumik aatsitassarsiorlunissamut akuersissummik aamma akuersissut malillugu ingerlatassanut tunngatillugu pisussaaffit tamaasa naammassisimappagit, pisinnaatitsissummik pigisaqartoq Inatsisartut inatsisaanni matumani aalajangersakkat aamma tamatumunnga aalajangersakkat aamma atugassarititaasut allat malillugit aatsitassanik piiaanissamut akuersissummik tunineqarnissamut pisinnaatitaavoq.

Imm. 2. Imm. 1-mi piumasaqaatit naammassineqarsimanersut Naalakkersuisut aalajangiissapput.

§ 43. Naalakkersuisut sumiiffimmut erseqqinnerusumik killissalersorneqartumut, atugassarititaasut erseqqinnerusumik aalajangersarneqartut naapertorlugit, aatsitassamik ataatsimik arlallinnilluunniit piiaanissamut kisermaassisussaatailluni akuersissummik tunniussisinnaapput.

Imm. 2. §§ 41-42 malillugu pisinnaatitsissummik pigisaqartoq piiaanissamut akuersissummik tunineqarnissamik pisinnaatitaappat aammalu Naalakkersuisut tamatumunnga qinnuigalugit, aatsitassarsiorluni misissuinissamut akuersissut imaluunniit annikitsumik aatsitassarsiorlunissamut akuersissut malillugu pisinnaatitsissummik pigisaqartumut piiaanissamut akuersissummik Naalakkersuisut tunniussissapput.

Imm. 3. Pisuni imm. 2-mi pineqartunut ilaasuni, aatsitassarsiorluni misissuinissamut akuersissut imaluunniit annikitsumik aatsitassarsiorlunissamut akuersissut malillugu pisinnaatitsissummik pigisaqartup tamanna qinnutigippagu, aammalu ingerlatseqatigiiffiup allap taassuma piiaanissamut akuersissut malillugu ingerlatseqatigiiffimmut pisinnaatitsissummik pigisaqartumut piumasaqaatit naammassisimappagit, Naalakkersuisut, ingerlatseqatigiiffimmut allamut, aatsitassarsiorluni misissuinissamut akuersissut imaluunniit annikitsumik aatsitassarsiorlunissamut akuersissut malillugu pisinnaatitsissummik pigisaqartumit allaanerumut, piiaanissamut akuersissut tunniutissavaa, takuuk §§ 45-46 aamma 67.

Imm. 4. Naalakkersuisut imaluunniit suleqatigisap allap sumiiffimmi aalajangersimasumi aatsitassanik piiarneqarsinnaasunik peqarfik, piiaanissamut akuersissut malillugu pisinnaatitsissummik pigisaqartup piiarsinnaasaa, paasinarsisisimappassuk killissalersorsimallugulu, pisumi imm. 2-mi pineqartunut ilaanngitsumi Naalakkersuisut piiaanissamut akuersissummik tunniussisinnaapput.

Imm. 5. Aatsitassat piiavigineqarsinnaasutut paasinarsisinnerqarsimasut killissalersorneqarsimasullu piiaanissamut akuersissummi pineqartunut ilaatinneqarput.

§ 44. §§ 41-43 malillugu piiaanissamut akuersissummik tunniunneqarsinnaalinnginnerani, qinnuteqartoq suliaassamut suliaakkiissutitut najoqqutassamik Naalakkersuisunut nassiullugu nalunaarutigineqartussamik, suliaqassaaq.

Imm. 2. Suliaakkiissutitut najoqqutassaaq piiaanissamut akuersissutit tunniunneqarsinnaalinnginnerani minnerpaamik qaammatisiutit malillugit ulluni 35-ini tamanut ammasumik tusarniaassutigineqassaaq. Qinnuteqartoq § 106 malillugu inuiaqatigiinnut tunngasut pillugit suliaassamut nassuiaammut tamanut ammasumik piareersaataasumik tusarniaassaaq imaluunniit avatangiisinut tunngasut pillugit suliaassamut nassuiaammut tamanut ammasumik piareersaataasumik tusarniaassalluni, piareersaataasumik tusarniaaneq imaluunniit tusarniaanerit taakkua sapinngisamik suliaakkiissutitut najoqqutassamut tunngatillugu tusarniaanernut peqatigitillugu ingerlanneqassapput.

Imm. 3. Imm. 2 malillugu suliaakkiissutitut najoqqutassaaq tusarniaaneq siusinnerpaamik piiaanissamut akuersissutit tunniunneqannginnerani qaammatit 24-t sioqqullugit naammassereersimassaaq.

Imm. 4 Imm. 3-mi piffissamut killiliussap saneqqunneqarnissaa, pisuni immikkuullarissuni Naalakkersuisut akuerisinnaavaat.

Imm. 5. Naalakkersuisut suliaassamut suliaakkiissutitut najoqqutassap imarisai aammalu tusarniaanerup ingerlanneqartarnera pillugit aalajangersakkanik aamma atugassarititaasunik erseqqinnerusunik aalajangersaasinnaapput.

Pisinnaatitsissummik pigisaqartumut piumasaqaatit

§ 45. Piiaanissamut akuersissut malillugu pisinnaatitsissummik pigisaqartoq Kalaallit Nunaanni angerlarsimaffeqarluni aktiaatileqatigiiffittut nalunaarsorsimasuussaaq.

Imm. 2. Ingerlatseqatigiiffiup siulersuisui Kalaallit Nunaanni inissisimassapput.

Imm. 3. Pisinnaatitsissummik pigisaqartoq piffissami piiaanissamut akuersissummik tunniussinerup kingorna qaammatit 24-t tikillugit imm. 2-mi piumasaqaatinik naammassinninnissamik pisussaatinneqassanngitsoq, Naalakkersuisut akuerisinnaavaat.

§ 46. Aktiaatileqatigiiffik piiaanissamut akuersissut malillugu pisinnaatitsissummik pigisaqartuusoq, akuersissutit Inatsisartut inatsisaat malillugu tunniunneqartut malillugit aatsaat ingerlatanik suliaqarnermillu suliaqaqqusaavoq aammalu siusinnerusukkut suliaqarsimassalluni.

Imm. 2. Ataatsimooqatigiilluni akileraaruserneqarnissaa pinngitsaaliissutaasimanngippat, aktiaatileqatigiiffik ingerlatseqatigiiffiit allat ataatsimooqatigalugit akileraaruserneqassanngilaq.

Imm. 3. Aktiaatileqatigiiffik nalinginnaasumik suliffissuarmut aktiaatileqatigiiffiup ilaaffigisaanit annikinnerusumik aningaasanngortitsivigineqarsimassanngilaq. Taamaattoq aktiaatileqatigiiffiup avataaneersut aningaasaataasa (akiitsut) aktiaatileqatigiiffiup nammineq aningaasaataannit naleqqiussineq 2:1 angullugu tamatigut annertunerusinnaapput, tassa imaappoq aktiaatileqatigiiffiup avataaneersut aningaasaatai tamatigut aktiaatileqatigiiffiup nammineq aningaasaataannit 200 procentitut annertussusilimmik aningaasartaqaqqusaapput.

Imm. 4. Aktiaatileqatigiiffik nalinginnaasumik naalackersuinnermut attuumassuteqanngitsumik akigititaqarluni aammalu atugassarititaasut naalackersuinnermut attuumassuteqanngitsut, illuatungeriit imminnut attuumassuteqanngitsut, suliffissuarmi ataatsimi ingerlatseqatigiiffunngitsut, akornanni niuernermi atorpeqartartut, tunngavigalugit iliuuseqartassaaq.

Piffissaq akuersissuteqarfusoq

§ 47. En Piffissaq akuersissuteqarfusoq sivikinnerussasoq tamatumunnga aalajangersakkani imaluunniit atugassarititaasuni akuersissummi aalajangersaasoqarsimanngippat, piiaanissamut akuersissut ukiuni 30-
ini akuersissuteqarfusoq piffissalerlugu tunniunneqassaaq.

Imm. 2. Imm. 1 malillugu piffissaq akuersissuteqarfusoq Naalackersuisunit ataasiarluni arlaleriarluniluunniit sivitsorneqarsinnaavoq. Piffissaq akuersissuteqarfusoq taamaallaat ukiut 20-it tikillugit piffissalerlugu sivitsorneqarsinnaavoq, taamaattoq takuuk imm. 5.

Imm. 3. Pisinnaatitsissummik pigisaqartup imm. 1 malillugu piffissami akuersissuteqarfioqqaartumi akuersissut, aamma akuersissut malillugu ingerlatassat, pillugit pisussaaffini tamaasa naammassisimappagit aammalu aatsitassarsiornissamut pilersaarummi Naalackersuisut akuerisaanni naatsorsuutigineqartutut piiaanermik ingerlatassat suliarineqarsimappata, pisinnaatitsissummik pigisaqartoq aatsitassanik peqarfimmik piiaarneqarsinnaasumik, pisinnaatitsissummik pigisaqartup piffissami akuersissuteqarfusumi sivitsorneqartumi piiarniagaanik, paasinarsisitsisimallunilu killissalersuisimappat, pisinnaatitsissummik pigisaqartoq piffissap akuersissuteqarfusup sivitsorneqarnissaanut pisinnaatitaavoq.

Imm. 4. Piffissap akuersissuteqarfusup piffissamit akuersissuteqarfusumit ataatsimut katillugu ukiunit 40-init sivilunerusumut piffissap akuersissuteqarfusup sivitsorneqarneri tamaasa, akuersissummut atugassarititaasut allanngortillugit Naalackersuisut aalajangersaasinnaapput, ilanngullugit § 48 malillugu sumiiffimmik akuersissuteqarfusumik annikillisisinissaq pillugu atugassarititaasut.

Imm. 5. Piiaanissamut akuersissummut piffissaq akuersissuteqarfusoq tamarmiusoq ukiunit 50-init sivilunerusinnaangilaq.

Imm. 6. Piffissaq akuersissuteqarfusoq naappat imaluunniit akuersissut atorunnaarpat, Naalackersuisunit tunuartinneqarpat imaluunniit Naalackersuisut tamatumunnga akuersissuteqareerneranni pisinnaatitsissummik pigisaqartumit Naalackersuisunut utertinneqarpat, piiaanissamut akuersissut atorunnaassaaq.

Sumiiffik akuersissuteqarfusoq

§ 48. Piiaanissamut akuersissut sumiiffimmut akuersissuteqarfusumut Naalackersuisunit aalajangersarneqartumut, tunniunneqassaaq.

Imm. 2. Piiaanissamut akuersissut malillugu pisinnaatitsissummik pigisaqartup tamatumunnga qinnuteqarnera malillugu, piiaanissamut akuersissut malillugu sumiiffik akuersissuteqarfusoq, sumiiffik aatsitassarsiorniluni misissuinissamut akuersissut malillugu pisinnaatitsissummik pigisaqartup aatsitassanik peqarfittut piiaarneqarsinnaasutut paasinarsisissimasaa killissalersorsimasaalu, pisinnaatitsissummik pigisaqartup piiaaviginiagaa, ilaatilerlugu annertusitinneqarnissaa pillugu atugassarititaasunik ilaqartumik akuersissummut tapiliussamik Naalackersuisut tunniussisinnaapput. Naalackersuisut akuersissummut

tapiliussami ilaatigut pissutsit §§ 49, imm. 3-mi aamma §§ 51-56-imi ilaatinneqartut pillugit atugassarititaasunik aalajangersaasinnaapput.

Piffissamut killigititat pillugit aalajangersakkanik aamma atugassarititaasunik Naalakkersuisut aalajangersaasarnerat

§ 49. Pisinnaatitsissummik pigisaqartoq piffissamut killiliussap naleqquttumik erseqqinnerusumik aalajangersagaasup iluani §§ 77 aamma 80 aamma tamatumunnga aalajangersakkat aamma atugassarititaasut allat malillugit aatsitassarsiorfimmumt pilersaarummik aamma matusinissamut pilersaarummik tamakkiisumik Naalakkersuisunut tunniussisimassasoq, akuersisummik tunniussinissamut akuersisummillu peqaannarnissamut piumasaqaataasoq pillugu piiaanissamut akuersisummut atugassarititaasunik Naalakkersuisut aalajangersaassapput. Aatsitassarsiorfimmumt pilersaarummik aamma matusinissamut pilersaarummik tamakkiisumik tunniussinissamut piffissamut killiliussaq, piiaanissamut akuersissutip tunniunneqarnerata kingorna ukiunit 4-nit kingusinneroqqusaassanngilaq.

Imm. 2. Pisinnaatitsissummik pigisaqartoq imm. 1 malillugu piffissamut killiliussap aalajangersagaasup iluani aatsitassarsiorfimmumt pilersaarummik aamma matusinissamut pilersaarummik tamakkiisumik tunniussisimanngippat, pisinnaatitsissummik pigisaqartoq tamanna tikitsinnagu piffissamut killissaliussaq kinguartinneqartoq nalunaarfigineqarsimanngippat, Naalakkersuisut piffissamut killiliussap naanerani piiaanissamut akuersissut atorunnaassaaq.

Imm. 3. Pissutsinut piiaanermi ingerlatassat aamma akuersissut malillugu ingerlatassat allat ingerlanneqarnissaannut annertuumik pingaaruteqartunut piffissanut killissaliussat pillugit piiaanissamut akuersisummut atugassarititaasunik Naalakkersuisut aalajangersaasinnaapput. Piffissamut killiliussaq imaluunniit piffissamut killiliussamut sivitsuineq malinneqanngippat, akuersissut atorunnaassasoq imaluunniit tunuartinneqassasoq pillugu atugassarititaasunik Naalakkersuisut aalajangersaasinnaapput imaluunniit aalajangiisinnaallutik.

Ingerlatassanik suliaqarneq ilaalu ilanngullugit

§ 50. Piiaanissamut akuersissut malillugu pisinnaatitsissummik pigisaqartoq aatsitassarsiorluni misissuinerumik aamma ingerlatassanik tamatumunnga atasunik suliaqarnissamut pisinnaatitaavoq.

Imm. 2. § 39-mi aalajangersakkat, imm. 1 malillugu aatsitassarsiorluni misissuinerumut taamaaqataanik atuupput.

Imm. 3. Piiaanissamut akuersisummut sumiiffimmi akuersissuteqarfiusumi akuersissut malillugu pisinnaatitsissummik pigisaqartup saniatigut allat Inatsisartut inatsisaat imaluunniit najukkami aatsitassarsiorluni ingerlatassat malillugit misissueqqaarnissamut, aatsitassarsiorluni misissuinissamut imaluunniit aatsitassanik piiaanissamut akuersissut malillugu ingerlatassanik suliaqarqusaanngillat.

Oqartussat suliarinninneranni aningaasartuutininik matussutissanik akiliutinik, akiliutissanik aamma aningaasartanik akiliineq

§ 51. Piiaanissamut akuersisummik imaluunniit piiaanissamut akuersissut malillugu piffissap akuersissuteqarfiusup sivitsorneqarnissaanik qinnuteqartoq Naalakkersuisunut akiliummik akiliissasoq

pillugu aalajangersakkanik aamma piiaanissamut akuersissummut atugassarititaasunik Naalakkersuisut aalajangersaasinnaapput:

- 1) Naalakkersuisut piiaanissamut akuersissummik tunineqarnissamik aammalu piiaanissamut akuersissummik tunineqarnissamik qinnuteqaammik tigusaqarnerannut suliarinninnerannullu,
- 2) piiaanissamut akuersissut malillugu piffissap akuersissuteqarfusup sivitsorneqarneranut,
- 3) piiaanissamut akuersissummik tunniussinermi, imaluunniit
- 4) piiaanissamut akuersissut malillugu piffissap akuersissuteqarfusup sivitsorneqarnerani.

Imm. 2. Pisinnaatitsissummik pigisaqartoq akuersissutip aamma akuersissut malillugu ingerlatassat atuutsiinnarneranut ilaalu ilanngullugu Naalakkersuisunut akiliummik akiliissasoq, pillugu aalajangersakkanik imaluunniit piiaanissamut akuersissummut atugassarititaasunik Naalakkersuisut aalajangersaassapput. Pisinnaatitsissummik pigisaqartoq akiliutitik makkuninnga ataatsimik arlallinnilluunniit akiliissasoq pillugu aalajangersakkanik imaluunniit atugassarititaasunik Naalakkersuisut aalajangersaasinnaapput:

- 1) Aatsitassat piiarneqartut tunngavigalugit naatsorsorneqarluni royalty-tut ilusilik akiliutissaq (tunisassiornermut royalty), ilanngullugu assersuutigalugu oqimaassusaat (oqimaassutsimut royalty) imaluunniit imaqqortussusaat (annertussutsimut royalty).
- 2) Aatsitassat piiarneqartut tunisinermut akiaq imaluunniit tunisinermi allatut naleqarnera tunngavigalugu naatsorsorneqarluni akitsuutitut ilusilik akiliut (tunisinermit royalty).
- 3) Pisinnaatitsissummik pigisaqartup suliaqarnerani akuersissummi ilaatinneqartumi aningaasaqarnikkut pissarsiat ilaattut ilusilik akiliut (pissarsianut akitsuut).

Imm. 3. Imm. 2 malillugu pisinnaatitsissummik pigisaqartup Naalakkersuisunut akiliutissaanik Naalakkersuisut aalajangersaanerminni, tamatuminnga suliaqarneq akiliuteqartinneqartussaappat (akitsuutit), minnerpaamik akileraarusiinertut nammagaasiitigippat, aammalu akiliutissaq (akitsuutit) Kalaallit Nunaanni Namminersorneq pillugu inatsimmi § 7-imi pineqartunut tamakkiisumik ilaatinneqarpat, pisinnaatitsissummik pigisaqartoq suliaminut akuersissummi pineqartunut ilaasunut akileraaruserneqannginnissaa Naalakkersuisut akuerisinnaavaa.

Imm. 4. Aatsitassarsiorluni misissuinissamut akuersissut, Inatsisartut inatsisaasa matuma atuutilinnginnerani tunniunneqarsimasoq, tunngavigalugu piiaanissamut akuersissummik tunniussisoqarpat, takuuk § 41, imm. 1 aamma § 43, imm. 2, aatsitassarsiorluni misissuinissamut akuersissummi aalajangersakkanik imaluunniit atugassarititaasuni tamanna allasimappat, imaluunniit imm. 3, imaluunniit Kalaallit Nunaanni akileraartarnermut inatsisini maleruagassaq taamaaqataa, pisinnaatitsissummik pigisaqartup suliaqarneranut piiaanissamut akuersissummi pineqartunut ilaasumut, tamakkiisumik ilaannaasumilluunniit akileraaruserneqannginnissaata akuersissuteqarfigineqarneranut atornerqarpat, aatsaat pisinnaatitsissummik pigisaqartoq Naalakkersuisunut akiliutissamik akiliissasoq, takuuk imm. 2, pillugu Naalakkersuisut aalajangersaasinnaapput.

Imm. 5. Akuersissut aamma akuersissut malillugu ingerlatassat pillugit Inatsisartut inatsisaat malillugu suliaqarnerani suliarinninnermut aamma allanik oqartussat suliarinninnerannut atatillugu Naalakkersuisut aningaasartuutaannut matussutissanik aningaasanik, kiisalu aatsitassarsiornermut suliaqarnerup iluani Naalakkersuisut sulisuisa ilinniartitaanerannut piginnaanngorsaanerannullu aningaasartuutitik, pisinnaatitsissummik pigisaqartoq Naalakkersuisunut akiliissaaq. Naalakkersuisut aningaasat akilernissaat akiliutitut imaluunniit aningaasartuutitik utertitsilluni akiliinertut akilersissinnaavaat. Naalakkersuisut

tamatumunnga aalajangersakkanik imaluunniit atugassarititaasunik erseqqinnerusunik aalajangersaassapput.

Pisinnaatitsissummik pigisaqartup sulisartunik nunaqavissunik sulisoqartarnera aamma nioqqutissanik sullissinernillu pilersuisussanik nunaqavissunik atuisarnera

§ 52. Aatsitassanik piaanissamik akuersissummi aalajangersarneqassaaq, qanoq annertutigisumik pisinnaatitaaffeqartoq kalaallinik sulisoqarnissaa. Suliffeqarfiup pisariaqartitaatut annertutigisumik, akuersissutaateqartoq sulisunik nunanit allanneersunik Kalaallit Nunaaninngaaneersuniingitsunik sulisoqarsinnaavoq, imaakkaanngat assinganik suliaqarsinnaasut piukkunnaateqartut Kalaallit Nunaanniingippata periarfissaqanngippatalu.

Imm. 2. Aatsitassanik piaanissamut akuersissummi aalajangersarneqassaaq, akuersissummik pigisaqartup suliffeqarfiit Kalaallit Nunaanneersut suliariumannittussarsiornermi, pilersuineri, kiffartuussinermilu qanoq annertutigisumik atussanera. Suliffeqarfiit Kalaallit Nunaanneersut teknik-ikkut niueqatigiinnikkullu unammillersinnaanngippata, suliffeqarfiit allat atorineqarsinnaapput.

Pisinnaatitsissummik pigisaqartup aatsitassanik piiarneqartunik suliarinnittarnera

§ 53. Akuersissummi § 16 naapertorlugu aalajangersarsinnaavoq, akuersissummik pigisaqartup qanoq annertutigisumik aatsitassanik Kalaallit Nunaanniittunik suliareqqaarsinnaagai. Kalaallit Nunaata avataani suliareqqaarinnittoqarsinnaavoq, Kalaallit Nunaani suliareqqaarinninneq akissaaajaataanerussappat akornuteqassappalluunniit.

Pisinnaatitsissummik pigisaqartup aatsitassanik piiarneqartunik uninngasuuteqarnera aamma inunnut nunaqavissunut tunisinera

§ 54. Pisinnaatitsissummik pigisaqartup aatsitassat Kalaallit Nunaanni piiarneqartut uninngasuutigissagai aammalu ingerlatseqatigiiffinnut Kalaallit Nunaanni angerlarsimaffeqartunut imaluunniit inunnut Kalaallit Nunaanni aalajangersimasumik najugaqartunut tamakkiisumillu akileraartussaataasunut tuniniassagai, pillugu aalajangersakkanik aamma piaanissamut akuersissummut atugassarititaasunik Naalakkersuisut aalajangersaasinnaapput. Ingerlatseqatigiiffiit Kalaallit Nunaanni angerlarsimaffeqartut, imaluunniit inuit Kalaallit Nunaanni aalajangersimasumik najugaqartut tamakkiisumillu akileraartussaataasut aatsitassat nammineerlutik suliareqqinniarpatigit imaluunniit allatut Kalaallit Nunaanni inuussutissarsiornermut aatsitassat atorniarpatigit, aatsaat tamatumunnga piumasqaatinik Naalakkersuisut aalajangersaasinnaapput.

Imm. 2. Pisinnaatitsissummik pigisaqartup aatsitassanik tunisinera, takuuk imm. 1, niuerfimmi akigititanut aammalu niuerfimmi atugassarititaasut tunngavigalugit pissaaq.

Ingerlatat pillugit nalunaarusiat aamma paasissutissanik nalunaarsukkanik misissugassanillu tunniussisarneq

§ 55. Pisinnaatitsissummik pigisaqartup Naalakkersuisunut tunniutissavai:

1) piaanermut nalunaarusiat,

2) aatsitassarsiorluni misissuineq aamma akuersissut malillugu ingerlatat allat taakkualu inernerit pillugit nalunaarutit

3) nalunaarusiat pisinnaatitsissummik pigisaqartumit imaluunniit pisinnaatitsissummik pigisaqartup suliaakkiineratigut allanit suliarineqartut assilineri,

4) naatsorsukkat,

5) naatsorsuutit,

6) piiaaneq taakkualu inernerit pillugit paasissutissat nalunaarsukkat,

7) aatsitassarsiorluni misissuinerup inernerit aamma taakkununga paasissutissat nalunaarsukkat misissugassallu aammalu pisinnaatitsissummik pigisaqartup nassuiaaneri, inerniliineri tamatumunngalu inassuteqaatai,

8) misissugassat aamma qillerummit qaqitat.

Imm. 2. Pisinnaatitsissummik pigisaqartup imm. 1, nr. 1, 2, 3, 7 aamma 8 naapertorlugit tunniussai, isertuussaapput. Piffissaq isertuussiviusoq Naalakkersuisunut tunniussinissamut piffissamut killiliussamiit ukiunik 5-inik sivilissuseqarpoq. Taamaattoq akuersissutip atorunnaarnerani, pisuni tamaginni isertuussinissaq atorunnaassaaq.

Imm. 3. Pisinnaatitsissummik pigisaqartup imm. 1, nr. 4 aamma 5 naapertorlugit tunniussai, taakkua pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat malillugu allagaatinik takunninnissami ilaatinneqartussaasimanngippata, piffissami killiligaanngitsumi.

Imm. 4. Nalunaarusiat, piiaanerup inernera immaqalu aatsitassarsiorluni misissuineq, paasissutissat nalunaarsukkat, misissugassat aamma nassuiaanerit ilaalu ilanngullugit isertuussat pillugit paasissutissat nalinginnaasut piffissami isertuussiviusumi tamanut saqqummiussinnaavaat. Naalakkersuisut paasissutissanik nalinginnaasunik taamaattunik tamanut saqqummiussinnginnermi, paasissutissat pisinnaatitsissummik pigisaqartumut nassiutissavai aammalu minnerpaamik qaammatsiutit malillugit ulluni 14-ini piffissamut naleqquttumik killissaliussap aalajangersagaasup iluani pisinnaatitsissummik pigisaqartoq tassunga oqaaseqaammik nassiussinnaasoq immaqalu paasissutissanik tamaginnik imaluunniit ilaannik saqqummiussinissamut tunngavilersukkamik akerliliissuteqarsinnaasoq, pisinnaatitsissummik pigisaqartoq paasissutissallugu. Pisinnaatitsissummik pigisaqartoq paasissutissanik tamaginnik imaluunniit ilaannik tamanut saqqummiussinissamut akerliliissummik piffissamut killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata mianerinissaa, Naalakkersuisut paasissutissanik pineqartunik tamanut saqqummiussinissamut soqutigisaqarnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

Imm. 5. Imm. 3 aamma 4 apeqqutaatinngit, Naalakkersuisut pisuni tamaginni avatangiisinut paasissutissat aamma avatangiisinut nalunaarusiat, nalinginnaasumik inuiaqatigiinnut soqutiginaatilittut nalilerneqartut, tamanut saqqummersissinnaavaat.

Imm. 6. Piffissaq isertuussiviusoq naappat, pisinnaatitsissummik pigisaqartoq aamma Namminersorlutik Oqartussat nalunaarusiornermik, piiaanerup immaqalu aatsitassarsiorluni misissuinerup inernerinik, paasissutissanik nalunaarsukkanik, misissugassanik aamma nassuiaanerimik, inerniliinerimik inassuteqaatinillu ilaalu ilanngullugit tunniunneqartunik piginnittussaataalissapput aammalu killilersorneqanngitsumik atugassiinnaalissallutik atuisinnaatitaallutillu.

Imm. 7. Naalakkersuisut pissutsit imm. 1-6-imi taaneqartut pillugit aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit nalunaarusiat ilusaat, imai

aamma piffissani aalajangersimasuni tunniussisarneq, ingerlatanik aalajangersimasunik suliaqarnermi aamma pisunik imaluunniit pissutsinik aalajangersimasunik pisoqarnera. Ilanngullugu Naalakkersuisut ingerlatat, pisut aamma pissutsit aalajangersimasut pillugit nalinginnaasunik paasissutissanik tamanut saqqummiinissamut periarfissaqarnerat pillugu aalajangersakkanik aamma atugassarititaasunik erseqqinnerusunik Naalakkersuisut aalajangersaasinnaapput.

Naalakkersuisut akuersissut aamma ingerlatassat pillugit aalajangersakkanik aamma atugassarititaasunik aalajangersaasarnarat

§ 56. Naalakkersuisut akuersissut aamma akuersissut malillugu ingerlatat § 1 malillugu Inatsisartut inatsisaata siunertaanut aamma Inatsisartut inatsisaanni aalajangersakkanut allanut naapertuuttumik, pisinnaatitsissummik pigisaqartup Kalaallit Nunaanni inatsisinik naammassinninnissaa, Namminersorlutik Oqartussat pisinnaatitaaffii aningaasaqarnikkullu soqutigisai aammalu pisinnaatitsissummik pigisaqartup pisinnaatitaaffii qulakkeerniarlugit, piiaanissamut akuersissummut aalajangersakkanik aamma atugassarititaasunik aalajangersaasinnaapput.

Kapitali 8

Aatsitassarsiorluni misissuinissamut akuersissummik imaluunniit piiaanissamut akuersissummik tunniussinermut suleriaasissat aamma tunngavissarititaasut

§ 57. Aatsitassarsiorluni misissuinissamut akuersissut, takuuk § 34, periaatsit §§ 58-imi aamma 59-imi taaneqartut arlaat tunngavigalugu aammalu toqqaanissamut tunngavissarititaasut § 61-imi taaneqartut tunngavigalugit Naalakkersuisut aalajangersaanerat malillugu tunniunneqassaaq.

Imm. 2. Aatsitassanik piiaanissamut akuersissut, takuuk § 43, periaatsit § 59-imi taaneqartut arlaat tunngavigalugu aammalu toqqaanissamut tunngavissarititaasut § 61-imi taaneqartut tunngavigalugit pisinnaatitsissummik pigisaqartunut, takuuk § 41, § 42 naapertorlugu pisinnaatitaaffeqalersimasunut, imaluunniit Naalakkersuisut aalajangersaanerat malillugu tunniunneqassaaq.

§ 58. Sumiiffinnut akuersissummik tunineqarnissaq pillugu qinnuteqaat, piffissami qinnuteqarfiusussatut aalajangersagaasumi (batch-imut piffissaq) Naalakkersuisunit tiguneqartoq, aammalu sumiiffimmut imm. 2 aamma § 59 imm. 1-3 malillugit suleriaasissani ilaatinneqartunut tunngassuteqanngitsoq tunngavigalugu, aatsitassarsiorluni misissuinissamut akuersissut tunniunneqassaaq.

Imm. 2. Piffissami qinnuteqarfiusussatut aalajangersagaasumi qaammatisiutit malillugit ullut 90-it iluanni sumiiffimmi tassani aatsitassarsiorluni misissuinissamut akuersissummut pisinnaatitsissummik pigisaqartuusimasup qinnuteqaataanik tigusaqartoqarpat, piffissaq qinnuteqarfiusussatut aalajangersagaasoq, pineqartup aatsitassarsiorluni misissuinissamut akuersissut pigisaata atorunnaarneraniit, qaammatisiutit malillugit ullunut 90-inut sivitsorneqassaaq.

Imm. 3. Qinnuteqaatit imm. 1 malillugu tunniunneqartut tunngavigalugit akuersissummik Naalakkersuisut tunniussinngissinnaapput.

Imm. 4. Imm. 1-2 malillugit qinnuteqaatinik tunniussisarneq, tiguisarneq, nalunaarsuisarneq suliarinnittarnerlu pillugit aalajangersakkanik erseqqinnerusunik aamma atugassarititaasunik Naalakkersuisut aalajangersaasinnaapput.

§ 59. Sumiiffik aalajangersimasoq piffissami aalajangersimasumi tamatuminnga qinnuteqaat malillugu akuersisummik ingerlaavartumik tunniussiviusassasoq (matu ammasumi suleriaaseq), pillugu aalajangersakkanik Naalakkersuisut aalajangersaasinnaapput. Naalakkersuisut matu ammasumi suleriaaseq pillugu nalunaaruteqarneq Naalakkersuisut nittartagaanni aammalu allatut naleqquttumik Naalakkersuisut tamanut saqqummiutissavaat. Matu ammasumi suleriaatsip allannguuteqarnera taamaaqataanik tamanut saqqummiunneqassaaq. Matu ammasumi suleriaaseq malillugu akuersisummik tunineqarnissaq pillugu qinnuteqaatit, sumiiffimmik ammaaneq imaluunniit allannguutit kingulliit tamanut saqqummersinneqarnerisa kingorna siusinnerpaamik qaammatisiutit malillugit ullut 90-it qaangiunneranni tunniunneqarsinnaapput.

Imm. 2. Akuersisummik tunniussinissaq pillugu tamanut ammasumik nalinginnaasumik qinnuteqaqqusinerup kingorna akuersissut tunniunneqarsinnaasoq, pillugu aalajangersakkanik Naalakkersuisut aalajangersaasinnaapput. Qinnuteqarnissamut piffissaliussaq minnerpaamik qaammatisiutit malillugit ullunik 90-inik sioqqullugu Naalakkersuisut nittartagaanni kiisalu allatut naleqquttut qinnuteqaateqaqqusineq pillugu nalunaaruteqarneq Naalakkersuisut tamanut saqqummersissavaat.

Imm. 3. Sumiiffimmut imm. 1 malillugu matu ammasumi suleriaaseqarnermi pineqartunut ilaatinneqanngitsumut akuersisummik tunineqarnissaq pillugu qinnuteqaat, imm. 2 malillugu sioqqutsisumik qinnuteqartoqaqqusinngitsoq tunniunneqarpat, akuersisummik tunniussinissaq pillugu immikkut ittumik tamanut ammasumik qinnuteqaqqusineq malillugu akuersisummik tunniussisoqarsinnaasoq, pillugu aalajangersakkanik Naalakkersuisut aalajangersaasinnaapput. Qinnuteqaat aammalu sumiiffinni tassani akuersisummik tunineqarnissaq pillugu allanik qinnuteqaqqusineq pillugit nalunaaruteqarneq Naalakkersuisut tamanut saqqummiutissavaat. Nalunaaruteqarneq qinnuteqaatip tiguneqareernerata kingorna kingusinnerpaamik qaammatisiutit malillugit ullut 90-it qaangiunneranni tamanut saqqummiunneqassaaq. Nalunaaruteqarneq Naalakkersuisut nittartagaanni kiisalu allatut naleqquttut tamanut saqqummiunneqassaaq. Qinnuteqaatinik allanik tunniussinissamut piffissamut killiliunneqarpoq, nalunaaruteqarnerup tamanut saqqummiunneqarnerata kingorna ullut 90-it.

Imm. 4. Qinnuteqaatit imm. 1 malillugu tunniunneqartut tunngavigalugit akuersisummik Naalakkersuisut tunniussinngissinnaapput.

Imm. 5. Imm. 1-3 malillugit qinnuteqaatinik tunniussisarneq, tiguisarneq, nalunaarsuisarneq suliarinnittarnerlu pillugit aalajangersakkanik erseqqinnerusunik aamma atugassarititaasunik Naalakkersuisut aalajangersaasinnaapput.

§ 60. Aningaasartuutitut, aningaasartuutissanut imaluunniit ajoqusiinernut, qinnuteqartumi akuersisummik tunineqarnissamik qinnuteqaateqartumi pilersunut imaluunniit qinnuteqaateqartumit pilersinneqartunut Naalakkersuisut akisussaasuunngillat aammalu taarsiissanatik, ajunngitsorsiasarsititsissanatik, utertillugit akiliuteqassanatik imaluunniit allatut akiliissanatik. Tamanna atuutissaaq, annaasaqarneq imaluunniit ajoqusiineq qinnuteqartup akuersisummik tunineqarnissaq pillugu qinnuteqarnerata malitsigisaanik imaluunniit tamatumunnga atatillugu, qinnuteqartup tamatumunnga atatillugu suliassanik, ingerlatassanik misissuinernik ilaalu ilanngullugit suliarinninneranut atatillugu aammalu aningaasartuutininik akiliinneranut ilaalu ilanngullugit, qinnuteqartup tamatumunnga

atatillugu paasissutissanik tamatumunngalu uppersarsaatiniq pissarsineranut, angusaqarneranut imaluunniit suliarinninneranut taakkuninngalu Naalakkersuisunut tunniussineranut atatillugu, Naalakkersuisut akuersisummik tunineqarnissaq pillugu qinnuteqartup qinnuteqaataanik suliarinninnerani suliassamillu aalajangiineranni, imaluunniit qinnuteqartumut akuersisummik tunniussisoqassanngitsoq Naalakkersuisut aalajangiineranni qinnuteqartumi pilersimanera imaluunniit nalaanneqarsimanera, apeqqutaatinngu.

§ 61. Akuersissut §§ 58-imi aamma 59-imi pineqartunut ilaatinneqartoq toqqaanissamut tunngavissarititaasut imm. 2-5-imi taaneqartut tunngavigalugit tunniunneqassaaq.

Imm. 2. Toqqaanissamut tunngavissarititaasoq tassaavoq, qinnuteqartup teknikkikkut suliassanullu pisinnaassuseqarnera tamarmiusoq, ilaatigut ilanngullugit:

- 1) Qinnuteqartup siusinnerusukkut aatsitassarsiorluni misissuineramik imaluunniit aatsitassanik piiaanermik misilittagaqarnera.
- 2) Qinnuteqartup siusinnerusukkut sumiiffinni taamaaqataannik atugaqarfusuni aatsitassarsiorluni misissuineramik imaluunniit aatsitassanik piiaanermik misilittagaqarnera.

Imm. 3. Toqqaanissamut tunngavissarititaasoq alla tassaavoq, qinnuteqartup aningaasaqarnikkut aningaasalersuinikkullu pisinnaassuseqarnera.

Imm. 4. Qinnuteqartup naliliivigineqarnerani, qinnuteqartup sunniuteqarluangitsumik pisimasinnaanera imaluunniit Kalaallit Nunaanni akuersissutitut pioreersunut imaluunniit siusinnerusukkut akuersissutitut atatillugu pisinnaatitsisummik pigisaqartup pisussaaffinnik naammassinnissimannginnera, taamatullu inuit qinnuteqartup aqutsisuniittut, ilanngullugit siulersuisuniittut, pisortaatitaniittut, nakkutilliinnermut siunnersuisooqatigiinniittut imaluunniit assigisaannik aqutsisuni oqartussaniittut, aqutsisuniittut, piginnittuniittut imaluunniit piginnittuusimasuni ilaasimasuniittut imaluunniit aalajangiisuusumik sunniuteqarsimasut, kiisalu suliffeqarfiit qinnuteqartumik piginnittuusut imaluunniit aalajangiisuusumik sunniuteqartut, piginnittut imaluunniit aalajangiisuusumik sunniuteqartut imaluunniit sunniuteqarsimasut, Naalakkersuisut pingaartissavaat .

Imm. 5. § 60, imm. 1-3 malillugit suleriaasissanik atuinerimi, Naalakkersuisut aammattaaq qinnuteqartut toqqaanissamut tunngavissarititaasut imm. 2-4-mi taaneqartut malillugit naliliivigineqarnerat malillugu assigiimmik naleqqussuseqartutut nalilerneqartut, akornanni inaarutaasumik toqqaanissaq siunertaralugu, toqqaanissamut tunngavissarititaasunik allanik naleqquttunik, tunngavissalinnik aammalu immikkoortitsiviunngitsunik, aalajangersaasinnaapput.

Imm. 6. § 59, imm. 1-3 malillugit suleriaasissanik atuinerimi, tunngavissarititaasut imm. 2-5-imi taaneqartut aamma taakkua imminnut sanilliullugit pingaartinneqarnissaat pillugu aalajangersakkat, qinnuteqaqqusinerit § 59-imi taaneqartut ilanngullugit, tamanut saqqummiunneqassapput.

Kapitali 9

Ilisimatuussutsikkut misissuineranut akuersissut

§ 62. Sumiiffimmut erseqqinnerusumik killissaligaasumut, atugassarititaasut erseqqinnerusumik aalajangersagaasut tunngavigalugit, aatsitassanut tunngatillugu ilisimatuussutsikkut misissuineramik suliaqarnissamut akuersisummik Naalakkersuisut qinnuteqartumut tunniussisinnaapput.

Imm. 2. Ilisimatuussutsikkut misissuinerit akuersissut ukiut 3-t tikillugit piffissamut akuersissuteqarfiusumut tunniunneqassaaq.

Imm. 3. Imm. 2 malillugu piffissaq akuersissuteqarfiusoq, tamatigut ukiut 3-t tikillugit piffissalerlugu, ataasiallutik imaluunniit arlaleriarlutik Naalakkersuisunit sivitsorneqarsinnaavoq. Taamaattoq pisinnaatitsissummik pigisaqartup imm. 2 malillugu piffissami akuersissuteqarfioqqaartumi imaluunniit imm. 3 manna malillugu piffissami akuersissuteqarfiusumi sivitsorneqartumi akuersissut aamma akuersissut malillugu ingerlatassat pillugit pisussaaffiit tamaasa naammassisimanngippagit, Naalakkersuisut piffissap akuersissuteqarfiusup sivitsorneqarnissaa akuerinngissinnaavaat. Naalakkersuisut piffissap akuersissuteqarfiusup sivitsorneqarnerini tamaginni akuersissummut atugassarititaasut allanngortillugit aalajangersaasinnaapput.

Imm. 4. Ilisimatuussutsikkut misissuinerit akuersissummut piffissaq akuersissuteqarfiusoq tamarmiusoq ukiunit 12-init sivisunerusinnaanngilaq.

§ 63. Pisinnaatitsissummik pigisaqartup, takuuk § 62, Naalakkersuisunut tunniutissavai:

- 1) Ilisimatuussutsikkut misissuinerit aammalu akuersissut malillugu ingerlatat allat taakkualu inernerit pillugit nalunaarusiat
- 2) Misissuinerup inernerisa assilineri aamma paasissutissat nalunaarsukkat taakkunanngalu misissugassat aamma pisinnaatitsissummik pigisaqartup nassuiaanerit, inerniliussai taakkunanngalu inassuteqaatai.

Imm. 2. Pisinnaatitsissummik pigisaqartup imm. 1 malillugu tunniussai, Naalakkersuisunut tunniunneqartut, piffissaq akuersissuteqarfiusoq tamaat isertuussaapput. Akuersissut atorunnaarpat, imm. 1 malillugu tunniunneqartut, Naalakkersuisunut tunniussat, Naalakkersuisunut tunniussinissamut piffissamut killiliussamiit ukiuni 5-ini isertuussaapput.

Imm. 3. Naalakkersuisut nalunaarusiat, misissueqqaarnerit inernerit, paasissutissat nalunaarsukkat, misissugassat aamma nassuiaanerit, inerniliinerit inassuteqaatillu ilaalu ilanngullugit isertuussat pillugit paasissutissat nalinginnaasut, piffissami isertuussiviusussami tamanut saqqummiussinnaavaat. Naalakkersuisut paasissutissanik nalinginnaasunik taamaattunik tamanut saqqummiussinnginnermi, paasissutissat pisinnaatitsissummik pigisaqartumut tusarniaassutigalugit nassiutissavai aammalu minnerpaamik qaammatsiutit malillugit ulluni 14-ini piffissamut naleqquttumik killissaliussap aalajangersagaasup iluani pisinnaatitsissummik pigisaqartoq tassunga oqaaseqaammik nassiussisinnaasoq immaqalu paasissutissanik tamaginnik imaluunniit ilaannik saqqummiussinissamut tunngavilersukkamik akerliliissuteqarsinnaasoq, pisinnaatitsissummik pigisaqartoq paasissutississallugu. Pisinnaatitsissummik pigisaqartoq paasissutissanik tamaginnik imaluunniit ilaannik tamanut saqqummiussinissamut akerliliissummik piffissamut killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata mianerinissaa, Naalakkersuisut paasissutissanik pineqartunik tamanut saqqummiussinissamut soqutigisaqarnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

Imm. 4. Imm. 2 aamma 3 apeqqutaatinnagit, Naalakkersuisut pisuni tamaginni avatangiisinut paasissutissat aamma avatangiisinut nalunaarusiat, nalinginnaasumik inuiaqatigiinnut soqutiginaatilittut nalilerneqartut, tamanut saqqummersissinnaavaat.

Imm. 5. Piffissaq isertuussiviusoq naappat, pisinnaatitsissummik pigisaqartoq aamma Namminersorlutik Oqartussat nalunaarusiornerit, misissueqqaarnerit inernerinut, paasissutissanut nalunaarsukkanut, misissugassanut aamma nassuiaanerit, inerniliinerit inassuteqaatinullu ilaalu ilanngullugit

piginnittusaaatitaallissapput aammalu akeqanngitsumik atugassiissutigiginissaannut atornissaannullu pisinnaatitaallissallutik.

Imm. 6. Naalakkersuisut pissutsit imm. 1-5-imi taaneqartut pillugit aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit nalunaarusiat ilusissaat, imarisassaat aammalu piffissani aalajangersimasuni tunniussinissaq, ingerlatassanik aalajangersimasunik suliaqarnermi aammalu pisut imaluunniit pissutsit aalajangersimasut atuutilerneranni. Ilanggullugu Naalakkersuisut ingerlatat aalajangersimasut, inernerit, pisut pissutsillu pillugit paasissutissanik nalinginnaasunik tamanut saqqummiinissamut periarfissaqarnerat pillugu aalajangersakkanik atugassarititaasunillu Naalakkersuisut aalajangersaasinnaapput.

§ 64. Naalakkersuisut ilisimatuussutsikkut misissuinissamut akuersissummut pissutsit attuumassuteqartut tamaasa pillugit aalajangersakkanik atugassarititaasunillu aalajangersaasinnaapput, ilanngullugit § 1 malillugu Inatsisartut inatsisaata siunertaannut naapertuuttumik akuersissut aamma akuersissut malillugu ingerlatassat pillugit sillimmasiinissaq.

Imm. 2. Ilisimatuussutsikkut misissuinerit pillugit aalajangersakkanik erseqqinnerusunik Naalakkersuisut aalajangersaasinnaapput, ilanngullugit annaassiniarnernut atatillugu aningaasartuutininik akiliinissaq aamma akiliinernut taamaattunut sillimmasiisummit matussutissaqarnissaq aamma qularnaveeqqusiinissaq pillugit.

Kapitali 10

Misissueqqaarnissamut akuersissutininut, aatsitassarsiorluni misissuinissamut akuersissutininut aamma piiaanissamut akuersissutininut aalajangersakkat nalinginnaasut

Aalajangersakkat nalinginnaasut atuunnerat

§ 65. Kapitali 10-mi aalajangersakkat, misissueqqaarnissamut akuersissutininut, aatsitassarsiorluni misissuinissamut akuersissutininut aamma aatsitassanik piiaanissamut akuersissutininut, atuupput.

Pisinnaatitsisummik pigisaqartumut piumasaqaatit

§ 66. Akuersissut malillugu pisinnaatitsisummik pigisaqartoq akuersissut malillugu ingerlatassanik suliaqarnissamut teknikkikkut suliaassanullu pisinnaassuseqassaaq kiisalu aningaasaqarnikkut aningaasalersuinikkullu pisinnaassuseqassalluni aammalu akuersissut aamma akuersissut malillugu ingerlatassat pillugit pisussaaffiit tamaasa naammassisimassallugit.

Imm. 2. Pisinnaatitsisummik pigisaqartup pisuussutini tamakkiisumik atorsinnaassavai. Pisinnaatitsisummik pigisaqartoq akiliisinnaassuseqanngissanngilaq imaluunniit akiliisinnaassuseqannginnermut, ilusilersueqqinnissamut assigisaannulluunniit eqqartuussivimmi imaluunniit allaffissornikkut sulianik ingerlatitsinermit pineqartunut ilaassanani, ilanngullugu akiliisarnerninik unitsitsisimassanani, akiliisinnaajunnaartutut inissisimassanani, sulianik unitsitsisimassanani imaluunniit assingusumik inissisimassanani.

§ 67. Pisinnaatitsissummik pigisaqartoq, inuit pisinnaatitsissummik pigisaqartumi piginnittut imaluunniit aalajangiisuusumik sunniuteqartut aamma inuit pisinnaatitsissummik pigisaqartup aqutsisuniittut, ilanngullugit siulersuisut, pisortaatitat, nakkutilliinermut siunnersuisooqatigiit imaluunniit aqutsisuni oqartussat assigisaat, ukiut 4-t kingulliit iluanni eqqartuunneqarsimassanngillat imaluunniit akiliisitsinermut akuersisimassanatik (akuersaarlutik) imaluunniit allatut pillarneqarsimassanatik imaluunniit pineqaatissinneqarsimassanatik, makkununga tunngasuni:

- 1) Akiliilluni peqquserlutsitsineq, peqquserlunneq imaluunniit niuernikkut isumaqatigiilluni suliaqarneq.
- 2) Pinerluttut aqqissuussaanni peqataaneq.
- 3) Ajortumeeriniarluni ingerlataqarnernut atatillugu ajortumeeriniarluni iliuuseqarnerit imaluunniit pinerluttuliorluni iliuuseqarnerit.
- 4) Aningaasanik pinerlunnikkut aningaasarsiarineqartunik malunnarunnaarsaneq imaluunniit ajortumeerinianut aningaasalersuineq.
- 5) Meeqqanik sulisoqarneq imaluunniit inunnik niuerutiginninneq.

Imm. 2. Pisinnaatitsissummik pigisaqartup aamma inuit taaneqartut taakkua akuersissummik tunniussinermi aammalu piffissaq akuersissuteqarfusoq tamaat §§ 66 aamma 67 imm. 1 malillugit piumasagaatit tamaasa naammassisimassavaat.

Akilaraarutit akitsuutillu aamma taakkuninnga akiliisarneq pillugit nalunaarusiorneq

§ 68. Suliffeqarfiit aamma inuit kikkut Inatsisartut inatsisaat malillugu akuersissut malillugu ingerlatassanik suliarinnittuunersut imaluunniit suliarinninnermi peqataanersut pillugu paasissutissanik pisinnaatitsissummik pigisaqartoq tunniussissasoq pillugu Naalakkersuisut aalajangersakkanik aamma atugassarititaasunik aalajangersaasinnaapput imaluunniit aalajangiisinnaapput.

Imm. 2. Suliffeqarfiit aamma inuit Inatsisartut inatsisaat malillugu akuersissut malillugu ingerlatassanik suliarinnittut imaluunniit suliarinninnermi peqataasut, akilaraarutitut aamma akitsuutinut tunngasut pillugit paasissutissanik allakkianillu Naalakkersuisunut aamma oqartussanut allanut tunniussissasoq, pillugu Naalakkersuisut aalajangersakkanik aamma atugassarititaasunik aalajangersaasinnaapput imaluunniit aalajangiisinnaapput.

Imm. 3. Isumaqatigiissuteqarfigineqartut, akilaraarutitut akitsuutinullu tunngasut pillugit Naalakkersuisunut aamma oqartussanut allanut imm. 2 malillugu paasissutissanik allakkianillu tunniussisimanngitsut, imaluunniit akilaraarutitut akitsuutinillu Kalaallit Nunaanni maleruagassanut sukkulluunniit atuuttunut naapertuuttumik Naalakkersuisunut aamma oqartussanut allanut akiliisimanngitsut, pisinnaatitsissummik pigisaqartup akuersissut malillugu ingerlatanik suliaqarnermini atoqqusaanngikkai, pillugu pisinnaatitsissummik pigisaqartumut Naalakkersuisut peqqussuteqarsinnaapput.

Imm. 4. Pisinnaatitsissummik pigisaqartup imm. 1 malillugu paasissutissanik tunniussinissaata, imm. 3 malillugu peqqussuteqarnerup naammassinissaata imaluunniit akilaraarutitut akitsuutinullu tunngasut pillugit paasissutissanik allakkianillu Naalakkersuisunut aamma oqartussanut allanut tunniussinissaata aammalu Kalaallit Nunaanni maleruagassanut sukkulluunniit atuuttunut naapertuuttumik akilaraarutitut akitsuutinillu akiliinissaata, tungaanut pisinnaatitsissummik pigisaqartup Inatsisartut inatsisaat malillugu akuersissut malillugu ingerlatanik suliaqarnini unitsissagaa, Naalakkersuisut aalajangiisinnaapput.

§ 69. Inatsisartut inatsisaat malillugu akuersissutip toqqaannartumik imaluunniit toqqaannangitsumik allamut tunniunneqarnera imaluunniit nuunneqarnera, allamut tunniussineq imaluunniit nuunneqarnera Naalakkersuisunit akuerineqarsimanngippat, akuersissummut aamma Inatsisartut inatsisaannut tunngatillugu inatsisitigut sunniuteqassanngilaq.

Imm. 2. Naalakkersuisut allamut tunniussinerup imaluunniit nuussinerup akuersissuteqarfigineqarneranut atugassarititaasunik aalajangersaasinnaapput.

Imm. 3. Inatsisartut inatsisaat malillugu akuersissut eqqartuussivikkut malersuinermi ilaatinneqanngilaq. Akuersissummut eqqartuussivikkut malersuineq inatsisitigut sunniuteqanngilaq.

Pisinnaatitsissummik pigisaqartup ingerlatseqatigiiffimmut allamut kattunneqarnera imaluunniit ingerlatseqatigiiffinni arlalinni aggulunneqarnera

§ 70. Pisinnaatitsissummik pigisaqartup ingerlatseqatigiiffimmut allamut kattunnera (kattunneq), kattunneq Naalakkersuisunit akuersissuteqarfigineqarsimanngippat, pisinnaatitsissummik pigisaqartumut Inatsisartut inatsisaat malillugu akuersissummut aamma allatigut Inatsisartut inatsisaannut tunngatillugu inatsisitigut sunniuteqassanngilaq.

Imm. 2. Pisinnaatitsissummik pigisaqartup ingerlatseqatigiiffinni arlalinni aggulunneqarnera (agguluineq), agguluineq Naalakkersuisunit akuersissuteqarfigineqarsimanngippat, pisinnaatitsissummik pigisaqartumut Inatsisartut inatsisaat malillugu akuersissummut aamma allatigut Inatsisartut inatsisaannut tunngatillugu inatsisitigut sunniuteqassanngilaq.

Imm. 3. Naalakkersuisut imm. 1 imaluunniit 2 malillugu kattunnermut imaluunniit agguluinermut akuersissuteqarnermut atugassarititaasunik aalajangersaasinnaapput.

Akuersissummut aamma aalajangiinerup eqqartuussinerup imaluunniit isumaqatigiissitsiniarnikkut eqqartuussinertigut akuersissuteqarnerup aaqqiagiinngissuteqarnerup inatsisinik toqqaaneq

§ 71. Akuersissummi, akuersissut malillugu ingerlataqarnerup aamma tamatumunnga atatillugu pisuni Inatsisartut inatsisaat aamma Kalaallit Nunaanni inatsisit allat aamma danskit inatsisaat sukkulluunniit Kalaallit Nunaanni atuuttut malinneqartussaapput, taakkunanngalu maleruagassiivigineqarlutik.

Imm. 2. Akuersissut, akuersissut malillugu ingerlataqarnerup imaluunniit tamatumunnga atillugu pisut pillugit aaqqiagiinngissuteqarnerup suulluunniit Inatsisartut inatsisaat aamma danskit inatsisaat sukkulluunniit Kalaallit Nunaanni atuuttut malillugit aalajangiiffigineqassapput.

§ 72. Akuersissut imaluunniit akuersissummut atatillugu ingerlataqarnerup imaluunniit pissutsit pillugit inatsisini pisussaaffiusumik imaluunniit naliliinikkut Naalakkersuisut aalajangiinerup pillugit Naalakkersuisut aamma pisinnaatitsissummik pigisaqartup akornanni aaqqiagiinngissuteqarnerup suulluunniit Kalaallit Nunaanni Eqqartuussivimmut, aaqqiagiinngissuteqarnerup taamaattut pillugit kisermaassilluni aalajangiisinnatitaasussamut, suliaqqiunneqassapput aammalu taamaallaat taakkununnga suliaqqiunneqarsinnaallutik aalajangiiffigineqarsinnaallutillu. Kalaallit Nunaanni Eqqartuussiviit tassaassaaq eqqartuussivik siullertut suliarinnittussaq.

§ 73. Atugassarititaasut akuersissummi aalajangersagaasut naammassineqarsimanersut pillugu Naalakkersuisut aamma pisinnaatitsisummik pigisaqartup akornanni aaqqiagiinngissuteqarneq eqqartuussivimmut isumaqatigiissitsiniartartumut suliakkiunneqassasoq, akuersissummi aalajangersarneqarsinnaavoq. Eqqartuussiviup isumaqatigiissitsiniartartup aalajangiinera inaarutaasuvoq. Aaqqiagiinngissuteqarneq piffissamut killigititap ukiup ataatsip iluani taamaallaat eqqartuussivimmut isumaqatigiissitsiniartartumut suliakkiunneqarsinnaavoq. Piffissamut killiliussaq ulloq aalajangiinerup suliami pineqartumut nalunaarutigineqarfia aallarnerfigalugu naatsorsorneqassaaq. Piffissamut killiliussaq arfininngornermi, sapaammi imaluunniit nalliuttumi naappat, piffissamut killiliussaq ulluinnarmut tullermut siullermut sivitsorneqassaaq.

§ 74. Eqqartuussivinnut, takuuk § 72, imaluunniit eqqartuussivimmut isumaqatigiissitsiniartartumut, takuuk § 73, suliaammi suliakkiisinnaatitaaneq, akuersissutip atorunnaareernerata kingorna atuutissaaq, ilanngullugit akuersissutip atuuffissaata naanera, atorunnaarnera imaluunniit Naalakkersuisunit tunuartinneqarnera imaluunniit Naalakkersuisut tamatumunnga akuersissuteqarnerat malillugu pisinnaatitsisummik pigisaqartup akuersisummik utertitsinera.

Kapitali 11

Aatsitassat ilaalu ilanngullugit pillugit aalajangersakkat nalinginnaasut

§ 75. Inatsisartut inatsisaat malillugu pisinnaatitsisummik pigisaqartoq aatsitassanik Kalaallit Nunaanni piiarneqartunik, Kalaallit Nunaanniit annissisinnaasoq imaluunniit Kalaallit Nunaanniit misissugassanik tiguisinnaasoq, Naalakkersuisut Inatsisartut inatsisaat malillugu akuersissut malillugu pisinnaatitsisummik pigisaqartumut akuersissuteqarsinnaapput. Akuersissuteqarneq atugassarititaasut erseqqinnerusumik aalajangersarneqartut tunngavigalugit tunniunneqarsinnaavoq. Akuersissuteqarneq Naalakkersuisut aatsitassarsiorfimmuut pilersaarummut imaluunniit pisinnaatitsisummik pigisaqartumit ingerlatassanut pilersaarummut allamut akuersissuteqarnerannut ilaatillugu, akuersissummi akuersissuteqarnermut atugassarititaasutut imaluunniit avammut annissinissamut akuersissuteqarnermut immikkoortumut ilaatillugu nalunaarutigineqarsinnaavoq.

Imm. 2. Pineqartoq aatsitassanik Kalaallit Nunaanni inatsisit malillugit piiarneqartunik Inatsisartut inatsisaat malillugu akuersissut malillugu Kalaallit Nunaannit avammut annissisinnaasoq imaluunniit misissugassanik tiguisinnaasoq, Naalakkersuisut allamut Inatsisartut inatsisaat malillugu akuersissut malillugu pisinnaatitsisummik pigisaqartumit allaanerummut akuersissuteqarneq nalunaarutigisinnaavaat. Akuersissuteqarneq atugassarititaasut erseqqinnerusumik aalajangersarneqartut tunngavigalugit tunniunneqarsinnaavoq. Akuersissuteqarneq avammut annissinissamut akuersissuteqarnertut immikkoortutut nalunaarutigineqassaaq.

§ 76. Naalakkersuisut aatsitassat pillugit aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit suliarinninneq, uninngasuuteqarneq, toqqorsivimmiitsineq, assartuussineq, niuerneq, annissuineq, eqquusuineq aamma akuersisummik allagartaliisarneq.

Imm. 2. Aatsitassanik aalajangersimasunik suliarinninneq aamma niuerutiginninneq, akuersissuteqarneq Naalakkersuisunit tunniunneqartoq malillugu taamaallaat anninneqarsinnaasut pillugu aalajangersakkanik aamma atugassarititaasunik Naalakkersuisut aalajangersaasinnaapput.

Imm. 3. Imm. 2 malillugu aalajangersakkanik imaluunniit atugassarititaasunik Naalakkersuisut aalajangersaareerpata, imm. 2-mi taaneqartutut Naalakkersuisut akuersissuteqarnermik tunniussinnaapput aammalu akuersissuteqarnermut taamaattumut aalajangersakkanik imaluunniit atugassarititaasunik aalajangersaasinnaallutik.

Kapitali 12

Ingerlatassanut pilersaarutit, akuersissuteqarnerit, ingerlatanik matusineq aamma qularnaveequsiisarneq il.il.

Aatsitassarsiorfimmut pilersaarut

§ 77. Aatsitassarsiorfimmut pilersaarut pisinnaatitsissummik pigisaqartup aatsitassanik piiaanermut pilersaarutaanut aamma piiaanissamut akuersissut malillugu tamatumunnga atatillugu ingerlatassaannut pisinnaatitsissummik pigisaqartup pilersaarutaanik imaqassaaq. Aatsitassarsiorfimmut pilersaarummik pissutsit makkua ilaatigut ilaatinneqassapput:

- 1) Aatsitassarsiorfeqarfimmik, suliaqarfissanik allanik aamma illutanik ilaalu ilanngullugit pilersitsineq, ingerlatsineq atuinerlu.
- 2) Aatsitassanik piiaaneq, suliarinninneq, uninngasuuteqarneq, assartuussineq aamma tuniniaaneq.
- 3) Nunaqavissunik sulisoqarneq aatsitassarsiorfimmut pilersaarut malillugit ingerlatassanik suliarinninnermi nioqutissanik sullissinernullu nunaqavissunik pilersuisoqarneq.
- 4) Isumannaallisaaneq, peqqinnissaq, isumalluutinin atorluaaneq aamma inuiaqatigiinni piujuaannartitsisumik ingerlatsinissaq pillugit ingerlataqarnerit aamma pissutsit.

Imm. 2. Piiaanissamut akuersissut malillugu pisinnaatitsissummik pigisaqartup piiaaneq imaluunniit tamatumunnga piareersaalluni imaluunniit tamatumunnga atatillugu ingerlataqarneq aallartinnginnerani, aatsitassarsiorfimmut pilersaarut suliarineqarsimassaaq aammalu pisinnaatitsissummik pigisaqartumit tunniunneqarsimassalluni aammalu Naalakkersuisunit akuersissuteqarfigineqarsimassalluni.

Imm. 3. Aatsitassarsiorfimmut pilersaarut nutartigaassaaq aammalu piiaanermi ingerlatat ineriartornerannut allannguuteqarnerannullu tunngatillugu aammalu isumannaallisaanermi, peqqinnissami, avatangiisini allanilu pissutsini attuumassuteqartuni allannguuteqarnerani, attuumassuteqarnera malillugu allanngortinneqartassalluni.

Imm. 4. Pissutsit allanngorsimasut tamanna pisariaqartippassuk, imaluunniit Naalakkersuisut tamatumunnga aalajangiippata, pisinnaatitsissummik pigisaqartup sapinngisamik piaartumik aatsitassarsiorfimmut pilersaarut nutartigaq imaluunniit allanngortinneqartoq suliarissavaa aammalu tunniutissallugu aamma Naalakkersuisut aatsitassarsiorfimmut pilersaarummut nutartikkamut imaluunniit allanngortinneqartumut akuersissuteqartissallugit.

Imm. 5. Naalakkersuisut imm. 2 imaluunniit 4 malillugu imaluunniit § 121 malillugu akuersissuteqarnermut atugassarititaasunik aalajangersaasinnaapput.

Piffissami akuersissuteqarfiusumi atortut peerneqarnerat aamma saliineq ilaalu ilanngullugit aamma akuersissut malillugu suliaqarnerup aamma ingerlatat unitsinneqarnerat matuneqarnerallu

§ 78. Akuersissut malillugu pisinnaatitsissummik pigisaqartup piffissaq akuersissuteqarfusoq tamaat:

- 1) sanaartukkat illullu, pisinnaatitsissummik pigisaqartumit pilersinneqartut aammalu pisinnaatitsissummik pigisaqartumit atorineqanngitsut, peertassavai aammalu
- 2) Naalakkersuisut allamik akuersissuteqarsimanngippata, tamanna ajornartinnagu, sumiiffinni kallarneqartuni pinngortitami ilaalu ilanngullugit saaliisassalluni aammalu attuumassutilinnut iluarseeqqittassalluni.

Imm. 2. Akuersissut malillugu pisinnaatitsissummik pigisaqartup akuersissut malillugu suliaqarnerup aamma ingerlataqarnerit unitsinneqarneranni:

- 1) Naalakkersuisut allamik akuersissuteqarsimanngippata, sanaartukkat illullu pisinnaatitsissummik pigisaqartumit pilersinneqarsimasut piissavai, aammalu
- 2) sumiiffinni kallarneqartuni pinngortitami ilaalu ilanngullugit saliissalluni aammalu attuumassuteqartuni iluarseeqqissalluni.

Imm. 3. Pisinnaatitsissummik pigisaqartup ingerlatassanik aamma iliuuseqarnermik imm. 1-imi aamma 2-mi taaneqartunik ingerlatsinissaq pillugu peqqussuteqarneq Naalakkersuisunit aalajangerneqartoq malinngippagu, Naalakkersuisut pisinnaatitsissummik pigisaqartup akiligassaanik annaasaqatigisinnaasaanillu taakkua suliaritissinnaavai

Imm. 4. Pisinnaatitsissummik pigisaqartup ingerlatassanik aamma iliuuseqarnermik imm. 1-imi aamma 2-mi taaneqartunik ingerlatsinissaq pillugu Naalakkersuisunit peqqussuteqarneq malinngippagu, Naalakkersuisut sanaartukkat illullu ilaalu ilanngullugit, suliffeqarfinnit inunnillu pineqartunit pigineqartut, aammalu akuersissut malillugu ingerlatassanik suliaqarnermi atorineqarsimasut aammalu sumiiffinni kallarneqartuniittut, peerneqarnissaat pillugu suliffeqarfinnut aamma inunnut allanut Naalakkersuisut peqqussuteqarsinnaapput.

Imm. 5. Inuup imaluunniit suliffeqarfiup imm. 4 malillugu peqqussuteqarneq malinngippagu, Naalakkersuisut inuup imaluunniit suliffeqarfiup akiligassaanik annaasaqatigisinnaasaanillu sanaartukkat illullu ilaalu ilanngullugit peersinnaavai.

Pigisanik nalilinnik peerneqartunik uninngatitsineq aamma tuniniaaneq

§ 79. Pisinnaatitsissummik pigisaqartup akuersissut aamma akuersissut malillugu ingerlataqarnerit pillugit pisussaaffimminik naammassinninnissaata tungaanut, pisinnaatitsissummik pigisaqartup pigisai nalillit Naalakkersuisut § 78, imm. 3 malillugu iliuuseqarnerini peerneqartut Naalakkersuisut tigummigallarsinnaavaat.

Imm. 2. Suliffeqarfiit imaluunniit inuit pigisai nalillit § 78, imm. 5 malillugu Naalakkersuisut ingerlataanni iliuuseqarnerinilu peerneqartut, suliffeqarfiup imaluunniit inuup pineqartup Naalakkersuisut iliuuseqarnerini Naalakkersuisunut pisussaaffimminik, naammassinninnissaata tungaanut, Naalakkersuisut tigummigallarsinnaavaat.

Imm. 3. Imm. 1 imaluunniit 2 malillugu pisussaaffeqartup piffissamut killiliussap naleqquttup Naalakkersuisunit aalajangersagaasup iluani imm. 1-imi imaluunniit 2-mi taaneqartutut Naalakkersuisunut pisussaaffini naammassisimanngippagit, Naalakkersuisut pigisat nalillit tamanut ammasumik kaattaassilluni tuniniaanikkut tuniniartissinnaavaat aammalu aningaasat kaattaassilluni tuniniaanermeersut pisussaaffeqartup pisussaaffisa naammassinnaannut atorsinnaallugit.

Imm. 4. Imm. 3 malillugu tamanut ammasumik kaattaassilluni tuniniaanerup ingerlanneqannginnerani imm. 1 imaluunniit 2 malillugu pisussaaffeqartuq aammalu sapinngisamik kinaluunniit alla, pigisanut nalilinnut tunngatillugu pisinnaatitaaffii imaluunniit pisussaaffii tuniniaanermiit kalluarneqartussatut ilimagineqartariaqartut, pineqartup najugaa ilisimaneqarsimappat, minnerpaamik sapaatit akunnerini marlunni ilimasaaraluni kaattaassilluni tuniniaanissaq pillugu nalunaarfigineqassapput.

Imm. 5. Imm. 3 malillugu tamanut ammasumik kaattaassilluni tuniniaanermi Naalakkersuisut pigisat nalillit ataasiakkaat taakkua kaattaassilluni tuniniaasut ataatsimoorfianni imaluunniit elektroniskimik kaattaassilluni tuniniaanermi tuniniarneqartussatut neqeroortutigissavai. Naalakkersuisut naliliippata, kaattaassilluni tuniniaanermi nutaami annertunerujussuarmik neqeroortumik pissarsisoqarsinnaasoq, kaattaassilluni tuniniaaneq nutaq ingerlanneqassasoq, Naalakkersuisut kaattaassilluni tuniniaanerup pineqartup naammassinerani, aalajangersinnaapput.

Imm. 6. Imm. 1 imaluunniit 2 malillugu pisussaaffeqartuq piffissamut killiliussap naleqquttup Naalakkersuisunit aalajangersarneqartup iluani, aningaasartuutit tamatumunnga atasut, taakkua qaffasinnerusumik neqeroortoqarnerani matussuserneqassanngikkaluarpata, akilernissaannut ingerlaannaq qularnaveeqqusiilluni, nutaamik kaattaassilluni tuniniaanissaq piumasarisinnaavaa. Kinaluunniit alla pigisanut nalilinnut tunngatillugu neqeroorummi pisinnaatitaaffimminik tamakkiisumik matussusiivigineqanngitsoq, taamaaliorsinnaavoq.

Imm. 7. Imm. 3 malillugu tamanut ammasumik kaattaassilluni tuniniaanermi aningaasartuutit mm. 1 imaluunniit 2 malillugu pisussaaffeqartumit akilerneqassapput aammalu piumasaqaatit allat tamaasa sioqqullugit kaattaassilluni tuniniaanerup aningaasartaannit akilerneqarsinnaallutik.

Imm. 8. Kaattaassilluni tuniniaanermut aningaasartuutit akilernissaannut atorineqartussanit, takuuk imm. 7, Naalakkersuisut piumasaqaataannit, takuuk imm. 1 imaluunniit 2, aammalu pigisamut tunngatillugu pisinnaatitaaffinnit allanit, kaattaassilluni tuniniaanermi annertunerusumik tunisineq iluanaaruteqarfiuppat, tunisinermi iluanaarutaasut sinneruttut pigisamit piginnittumut tunniunneqassapput.

Matusinissamut pilersaarut

§ 80. Pisinnaatitsissummik pigisaqartup piiaanissamut akuersissut malillugu aatsitassanik piiaanerminik tamatumunngalu atatillugu ingerlataminik unitsitsineranut aamma matusineranut pisinnaatitsissummik pigisaqartup pilersaarutaanik, ilanngullugit isumannaallisaanermut, peqqinnissamut, avatangiisinut tunngasut, matusinissamut pilersaarut imaqassaaq. En matusinissamut pilersaarummi ilaatigut pissutsit makkua ilaatinneqassapput:

- 1) Piiaanerup unitsinneqarnera aamma matuneqarnera, suliareqqiineq, uninngasuuteqarneq, assartuussineq aamma aatsitassanik tuniniaaneq aammalu tamatumunnga atatillugu ingerlatassat.
- 2) Aatsitassarsiorfimmi atortut, atortut allat aamma illut.
- 3) Sumiiffimmi akuersissuteqarfiusumit aamma sumiiffinnit kalluarneqartunit allanit pigisat, atortussat, akuutissat eqqagassallu ilaalu ilanngullugit, aatsitassanik piiaanermut, suliareqqiinermut, uninngasuuteqarnermut, assartuussinermut imaluunniit tuniniaanermut imaluunniit piiaanissamut akuersissut malillugu ingerlatanut allanut atatillugu atorineqartut, pilersinneqartut imaluunniit kuutsinneqartut, peerneqarnerat.

- 4) Sumiiffimmi akuersissuteqarfusumi aamma sumiiffinni kalluarneqartuni allani pinngortitami ilaalu ilanngullugit salineq aamma attuumassuteqartunik iluarseeqqinneq.
- 5) Piiaanissamut akuersissut ilaalu ilanngullugit malillugu ingerlataqarnerit unitsinneqarnerisa matuneqarnerisalu piviusunngortinneqarnerisa kingorna, piffissami tassani alapernaarsuinissaq naleqqussimappat, pissutsinik attuumassuteqartunik alapernaarsuineq.
- 6) Ingerlataqarnerit unitsinneqarnerat matuneqarnerallu tamatumalu kingorna alapernaarsuineq ilaalu ilanngullugit pillugit matusinissamut pilersaarut malillugu ingerlataqarnerit suliarineqarneranni, nunaqavissunik sulisoqarneq aamma nioqqutissanik sullissinernillu nunaqavissunik pilersuisoqarneq.
- 7) Ingerlataqarnerit unitsinneqarnerat matuneqarnerallu tamatumalu kingorna alapernaarsuineq ilaalu ilanngullugit pillugit Inatsisartut inatsisaat, piiaanissamut akuersissut aamma aatsitassarsiorfimmu pilersaarut ilaalu ilanngullugit malillugu pisinnaatitsissummik pigisaqartup pisussaaffinik naammassinninnissamut qularnaveeqqusiineq.

Imm. 2. Aatsitassarsiorfimmi sanaartukkanik ataatsimik arlallinnilluunniit, sanaartukkanik imaluunniit illunik allanik allamut tunniussineq imaluunniit qimanneqarnissaat, Naalakkersuisunit akuersissuteqarnikkut aatsaat pisinnaavoq.

Imm. 3. Atortut imaluunniit illut arlallit ilaat ataaseq arlallilluunniit qimanneqassappata, aserfallatsaaliuineq, alapernaarsuineq aamma ingerlatassat allat aamma iliuusissat ilaalu ilanngullugit pillugu aalajangersakkanik matusinissamut pilersaarut imaqassaaq, ilanngullugu isumannaallisaaneq, peqqinnissaq aamma avatangiisit pillugit.

§ 81. Piiaanissamut akuersissut malillugu pisinnaatitsissummik pigisaqartup tamatumunnga piareersarluni imaluunniit tamatumunnga atatillugu piiaanermik imaluunniit ingerlatanik suliaqalinnginnerani, matusinissamut pilersaarut pisinnaatitsissummik pigisaqartumit suliarineqarsimassaaq tunniunneqarsimassallunilu aammalu Naalakkersuisunit akuerineqarsimassalluni.

Imm. 2. Pisinnaatitsissummik pigisaqartup matusinissamut pilersaarut Naalakkersuisunut tunniutissavaa aammalu kingusinnerpaamik pisinnaatitsissummik pigisaqartup aatsitassarsiorfimmu pilersaarummik Naalakkersuisunut tunniussineranut aammalu aatsitassarsiorfimmu pilersaarummik Naalakkersuisut akuersissuteqarnerannik pissarsiarinninneranut peqatigitillugu, matusinissamut pilersaarummut Naalakkersuisut akuersissuteqarnerat pissarsiarisimassallugu.

Imm. 3. Pisinnaatitsissummik pigisaqartup ingerlatassamik imm. 1-imi pineqartunut ilaanngitsumik aallartitsinnginnerani, Naalakkersuisut § 121 naapertorlugu tamatumunnga atugassarititaasunik piumasaqarsimappata, matusinissamut pilersaarut pisinnaatitsissummik pigisaqartumit suliarineqarsimassaaq aammalu tunniunneqarsimassalluni aamma Naalakkersuisunit akuerineqarsimassalluni.

Imm. 4. Matusinissamut pilersaarut nutartersimatinneqassaaq aammalu piiaanermi ingerlatat, matusinermi ingerlatat, tamatumunnga atatillugu aningaasartuutit ineriartornerannut aamma isumannaallisaanermi, peqqinnissami, avatangiisini aammalu pissutsini allani attuumassuteqartuni ineriartornermut allannguutinullu tunngatillugu attuumassuteqarnera malillugu allanngortinneqartassalluni.

Imm. 5. Pissutsit allanngorneranni tamanna pisariaqalerpat, imaluunniit Naalakkersuisut tamatumunnga aalajangiippata, pisinnaatitsissummik pigisaqartoq sapinngisamik piaartumik matusinissamut pilersaarummik nutartikkamik imaluunniit allanngortinneqartumik suliaqassaaq tunniussissallunilu

aammalu matusinissamut pilersaarutip nutartikkap imaluunniit allanngortinneqartup taassuma Naalakkersuisunit akuerineqarnera pissarsiarisimassallugu.

Imm. 6. Naalakkersuisut imm. 1-imi, 3-mi aamma 5-imi taaneqartut § 121 malillugu akuersissuteqarnernut atugassarititaasunik aalajangersaasinnaapput. Naalakkersuisut ilaatigut suliaqarnerup unitsinneqareernerata kingorna isumannaallisaanerup, peqqinnissap, avatangiisit aamma mianerisassat allat attuumassuteqartut isumagineqarnissaat pillugu atugassarititaasunik aalajangersaasinnaapput, ilanngullugu matusinerup kingorna piffissami aalajangersimasumi alapernaarsuinissaq pillugu atugassarititaasut.

§ 82. Pisinnaatitsisummik pigisaqartup matusinissamut pilersaarummik, piviusunngortitsisinnaanera aammalu matusineq, matusinissamut pilersaarutip piviusunngortinneqarnissaa aamma tamatumunnga atatillugu ingerlatassat iliuusissallu pillugit pisussaaftimminik naammassinninnissanaanera qanoq aningaasaqarnikkut qulakkeerneqassanersoq, matusinissamut pilersaarummi allassimassaaq.

Imm. 2. Matusineq, matusinissamut pilersaarutip piviusunngortinneqarnissaa aamma tamatumunnga atatillugu ingerlatassat iliuusissallu pillugit pisussaaftimminik naammassinninnissaanut, takuuk imm. 1, pisinnaatitsisummik pigisaqartoq qanoq qularnaveeqqusiinarnersoq, matusinissamut pilersaarummi allassimassaaq.

Imm. 3. Pisinnaatitsisummik pigisaqartup matusinissamut pisussaaftimminik naammassinninnissaanut qularnaveeqqusiarnera pillugu matusinissamut pilersaarummi aalajangersakkat Naalakkersuisunit akuerineqassapput. Pisinnaatitsisummik pigisaqartup matusinissamut pisussaaftimminik naammassinninnissaanut qularnaveeqqusiinera Naalakkersuisunit akuerineqassaaq.

Imm. 4. Pissutsit allanngorneranni tamanna pisariaqalerpat, pisinnaatitsisummik pigisaqartoq sapinngisamik piaartumik pisinnaatitsisummik pigisaqartup matusinissamut pisussaaftimminik naammassinninnissaanut qularnaveeqqusiinera pillugu aalajangersakkat allanngortinneqartut ilaatillugit, takuuk imm. 1, matusinissamut pilersaarummik suliaqassaaq tunniussissallunilu, ilanngullugit qularnaveeqqusiineq naleqquttoq annertunerusoq imaluunniit allanngortinneqartoq pillugu, aammalu qularnaveeqqusiineq pillugu aalajangersakkat allanngortinneqartut Naalakkersuisunit akuerineqarnerat pissarsiarissallugu. Pisinnaatitsisummik pigisaqartup tamatuma kingorna sapinngisamik piaartumik matusinissamut pilersaarummi qularnaveeqqusiineq pillugu aalajangersakkat allanngortinneqartut taakkua malillugit piumasaqaatinik naammassinninnissamut qularnaveeqqusiissaaq aammalu qularnaveeqqusiinerup Naalakkersuisunit akuersissuteqarneq pissarsiarissallugu.

Imm. 5. Naalakkersuisut imm. 3-4-mi taaneqartut § 121 malillugu akuersissuteqarnermut atugassarititaasunik aalajangersaasinnaapput.

Piiaanermi ingerlatat unitsikkallarneqartarnerat

§ 83. Kingusinnerusukkut piiaanermik ingerlataqarnerit aallarteqqinneqarnissaat siunertaralugu piffissamut qaammatisiutit malillugit ullunit 60-init sivilisnerusumut piiaanissamut akuersissut malillugu piiaanermik ingerlatanik unitsitsineq, piiaanermik ingerlataqarnerit unitsinneqannginneranni Naalakkersuisunit akuerineqassaaq. Akuersissuteqarneq tamatigut ukiut marluk tikillugit tunniunneqarsinnaavoq. Akuersissuteqarneq nutarterneqarpat, tamanna atugassarititaasut allanngortillugit tunniunneqarsinnaavoq.

Imm. 2. Naalakkersuisut § 121 malillugu imm. 1 malillugu akuersissuteqarnermut atugassarititaasunik aalajangersaasinnaapput.

§ 84. Piiaanermi ingerlatanik unitsitsigallarnermi piffissaq minnerpaamik ukiunik 6-inik sivilissuseqarpat, imaluunniit unitsitsigallarnissamut akuersissuteqarnermut atugassarititaasut naammassineqarsinnaanngippata, Naalakkersuisut § 80-imi taaneqartutut matusinissamut pilersaarutip piviusunngortinnissaanut pisinnaatitsisummik pigisaqartoq peqqusinnaavaat.

Qularnaveeqqusiineq

§ 85. Inatsisartut inatsisaat malillugu akuersissut malillugu pisinnaatitsisummik pigisaqartoq akuersissut aamma akuersissut malillugu ingerlatassat pillugit pisussaaffimminik naammassinninnissamut qularnaveeqqusiissasoq aammalu qularnaveeqqusiismaannassasoq pillugu aalajangersakkanik aamma atugassarititaasunik Naalakkersuisut aalajangersaasinnaapput. Qularnaveeqqusiinermi ilaatinneqassapput Inatsisartut inatsisaat, aalajangersakkat aamma atugassarititaasut Inatsisartut inatsisaat, akuersissut, aatsitassarsiorfimmu pilersaarut, matusinissamut pilersaarut, ingerlatassanut pilersaarutit allat, pilersaarutitut akuersissuteqarnerit, ingerlatassanut akuersissuteqarnerit aamma aalajangiinerit Naalakkersuisunit aalajangiiffigineqartut malillugit aalajangersagaasut malillugit pisinnaatitsisummik pigisaqartup pisussaaffii.

Imm. 2. Imm. 1 malillugu qularnaveeqqusiineq pillugu aalajangersakkanik aamma atugassarititaasunik erseqqinnerusunik Naalakkersuisut aalajangersaasinnaapput.

§ 86. § 85, imm. 1 malillugu qularnaveeqqusiineq, akuersissut, tamatumunnga pilersaarutit, taakkununga akuersissuteqarnerit malillugit ingerlataqarnerit ineriartorneritut allannguuteqarnerinullu, tamatumunnga atatillugu aningaasartuutit aamma isumannaallisaanermi, peqqinnissami, avatangiisini aammalu pissutsini allani attuumassuteqartuni ineriartornermut allannguutinullu tunngatillugu naleqquttumik annertussuseqartumik nutartersimatinneqassapput allanngortinneqartassallutillu.

Imm. 2. Pissutsit allanngorneranni tamanna pisariaqalerpat imaluunniit Naalakkersuisut tamatumunnga aalajangiippata, pisinnaatitsisummik pigisaqartup sapinngisamik piaartumik qularnaveeqqusiineq allanngortissavaa aammalu qularnaveeqqusiinermut allanngortinneqartumut Naalakkersuisut akuersissuteqarnerat pissarsiarissallugu.

Imm. 3. Pisinnaatitsisummik pigisaqartup Inatsisartut inatsisaat, akuersissut, ingerlatassanut pilersaarutit, ingerlatassanut pilersaarutitut aamma ingerlatassanut akuersissuteqarnerit aamma Naalakkersuisut aalajangiineri malillugit qularnaveeqqusiineq pillugu pisussaaffisa naammassineqarnissaasa qulakkeernissaanut tamanna pisariaqartillugu, imm. 1-2 malillugit qularnaveeqqusiineq allanngortinneqassaaq.

Imm. 4. Naalakkersuisut imm. 1-3 malillugit qularnaveeqqusiinissaq pillugu aalajangersakkanik atugassarititaasunillu erseqqinnerusunik aalajangersaasinnaapput.

Kapitali 13

Avatangiisinik, silap pissusaanik pinngortitamillu allanngutsaaliuineq

§ 87. Inatsisartut inatsisaanni avatangiisinik, silap pissusaanik aamma pinngortitamik allanngutsaaliuinissaq pillugu maleruagassat avatangiisit, silap pissusaata pinngortitallu illersorneqarnerannut iluaqutaassapput, taamaalilluni inuiaqatigiinni ineriartortitsineq, inuit inuuniarnerminni atugaat aammalu uumasut naasullu piujuartinnissaat ataqqillugit piujuartitsiviusumik tunngavilimmik pissalluni.

Imm. 2. Inatsisartut inatsisaanni avatangiisinik, silap pissusaanik aamma pinngortitamik allanngutsaaliuinissaq pillugu maleruagassani siunertarineqarpoq ingerlatassanit:

- 1) inuit peqqissusaannut navianartorsiortitsisinnaasunit,
- 2) uumasunik, naasunik, imaluunniit nunami imaluunniit imaani imaluunniit nunap iluani pinngortitami naleqartitanik ajoqusiisinnaasunit,
- 3) nunamik, imaanik, nunap iluanik imaluunniit pinngortitami pisuussutinik pisussaatitaalluni atuinnissamut akornusiisinnaasumit,
- 4) inuit inuuniarnerminni atugarisaannik ajornerulersitsisinnaasunit aamma
- 5) naleqartitanik imaluunniit ingerlatassanik sukisaarsaarutissanik ajornerulersitsisinnaasunit, avatangiisinik, silap pissusaanik pinngortitamillu mingutsitsinissamik allatullu sunniinissamik pitsaaliuinissaq, killilersimaarinissaq akiuiniarnissarlu.

Imm. 3. Imm. 2-mi allassimasunut atatillugu pingaartumik siunertarineqarpoq:

- 1) nunami, imaani, immap naqqani, nunap iluani, imermi, silaannarmi mingutsitsinissamik, silap pissusaanut tunngasunut ajoqusiisumik sunniinissamik kiisalu sajukulaartitsinermi ajoqutissartaqalersitsinissamik nipiliornernillu ajoqutissartaqalersitsinissamik pitsaaliuinissaq, killilersimaarinissaq akiuiniarnissarlu,
- 2) aatsitassanik allanillu pisuussusunik atuinerup maangaannartitsinerullu killilersimaarnissaa,
- 3) teknologiimik minguinnerusumik atuinerulernissaq, aamma
- 4) atoqqiisarnerunissaq aammalu eqqakkanik igitsinermut atatillugu ajornartorsiuteqartarnerup killilersimaarnissaa.

§ 88. Teknikkip pissarsiarineqarsinnaasup pitsaanerpaap, ilanngullugit sanaartukkat, maskiinat, atortut, sulianik ingerlatitsinerit, teknologiit, nioqquutissiassat, akuutissat atortussallu mingutsitsinnginnerusut, aammalu iliuusissat mingutsitsinermik akiuiniarnermi sapinngisamik pitsaanerpaat, atorneqarnerani suut anguneqarsinnaanersut, avatangiisinik, silap pissusaanik pinngortitamillu allanngutsaaliuineq pillugu Inatsisartut inatsisaanni maleruagassat atorneqarneranni allaffissornikkullu aqunneqarneranni pingaartinneqassaaq. Nalilersuinermi tassani pingaartumik teknologiimik minguinnerusumik atuinnikkut suliniutissat pitsaaliuisussat pingaartumik pingaartinneqassapput.

Imm. 2. Mingutsitsinissamik pitsaaliuinermut pakkersimaarinninnermullu iliuusissat annertussusaannik suussusaannillu naliliinermi, isumalluutinik maangaannartitsinissap sapinngisamik annertunerpaamik killilersimaarneqarnissaa siunertaralugu, avatangiisut silarliit qanoq issusaat aammalu mingutsitsinerup taakkununga aammalu akuutissat atortussallu kuuffiini tamaginni sunniinissaa pingaartinneqassaaq.

§ 89. Kinaluunniit ingerlatassanik Inatsisartut inatsisaanni pineqartunut ilaasumik aammalu mingutsitsisinnaasumik aallartitsiniartoq, mingutsitsinissap navianaateqarnera sapinngisamik annertunerpaamik killilersimaarneqartussanngorlugu suliaqarnissamut piffissamik aammalu suliaqarnissap sumiiffissaanik toqqaassaaq. Ingerlatassat ingerlanneqarnissaannut piffissamik sumiiffimmillu toqqaanermi sumiiffimmi pinngortitaq qanorlu issusaa, ilanngullugu maannakkut atuinnissaq

siunissamilu pilersaarutigineqartoq, aammalu imikoornernik, eqqagassanik allanillu akuutissanik atortussanillu mingutsitsisartunik naapertuuttumik igitsinissamut periarfissat eqqarsaatigineqassapput.

Imm. 2. Kinaluunniit ingerlatassanik mingutsitsisinnaasunik aallartitsiniartuq, aallartitsisoq imaluunniit suliaqartoq, iliuusissanik mingutsitsinermut tassunga pitsaaliuisussanik pakkersimaarinnittussanillu aalajangersaassaaq, aammalu ingerlatassat pilersinneqarnissaat, aaqqissuunneqarnerat ingerlanneqarnerallu sapinngisamik annikinnerpaamik mingutsitsinermik malitseqartussanngorlugu aaqqissuutissallugu, takuuk § 88.

Imm. 3. Kialuunniit ingerlatassanik mingutsitsisinnaasunik aallartitsiniartup, aallartitsisup imaluunniit suliaqartup, sanaartugaatit ilaalu ilanngullugit, ilanngullugit maskiinat, atortut immaqalu unnisarfiit, toqqarneqarneranni, pilersinneqarneranni aaqqissuunneqarnerannilu mingutsitsinerup, aniatitsinerit, eqqagassaqaletarnerit isumalluutinillu atuinerup sapinngisamik pitsaanerpaamik killilersimaarneqarnissaat qulakkiissavaa. Tamanna aamma ingerlatsinerup aaqqissuunneqarnerani qulakkeerneqassaaq, ilanngullugit aatsitassarsiorluni misissuinerup ingerlanissaannik, piiannerup ingerlanissaannik, suliaqarnerit ingerlanissaannik, nioqqutissiassanik, akuutissanik atortussanillu ingerlatsinermut atatillugu atorineqartussanik aammalu upalungaarsimanermut mingutsitsinernillu akiuiniarnernut suleriaasissanik toqqaanermit.

§ 90. Suliffeqarfik imaluunniit inuk avatangiisinik allanngutsaaliuineq imaluunniit mingutsitsinissamik pitsaaliuineq, mingutsitsinermik killilersimaarineq imaluunniit akiuiniarneq pillugit Inatsisartut inatsisaat malillugu pisussaaffeqarpat, tamanna teknikkikkut, suliaqarnikkut aningaasaqarnikkullu pineqartumut periarfissaasimappat, pineqartup pisussaaffiit naammassineqarneranni teknikkimik pissarsiarineqarsinnaasumik pitsaanerpaamik aammalu iliuusissanik mingutsitsinermik akiuiniarnissamut sapinngisamik pitsaanerpaamik atuisoqarnera qulakkiissavaa siuarsassallugulu, takukkit §§ 88 aamma 89.

Imm. 2. Suliffeqarfiup imaluunniit inuup Inatsisartut inatsisaat malillugu avatangiisini aarlerinaataasut paasineqarnissaat, nalilersorneqarnissaat aammalu suliaqarnermi naapertuuttumik ajornartinnagu sapinngisamik annertunerpaamik annikillisinneqarnissaat isumagisussaappagu, tamanna teknikkikkut, suliaqarnikkut aningaasaqarnikkullu pineqartumut periarfissaasimappat, pineqartup avatangiisinik allanngutsaaliuinissaq eqqarsaatigalugu aammattaq teknikkimik pissarsiarineqarsinnaasumik pitsaanerpaamik aammalu iliuusissanik mingutsitsinermik akiuiniarnermut sapinngisamik pitsaanerpaamik atuisoqarnera qulakkiissavaa siuarsassallugulu, takukkit imm. 1 aamma §§ 88 aamma 89.

Imm. 3. Imm. 2 malillugu pisussaaffiit aamma pisuni makkunani atuupput:

1) Suleqatigisap allap sulinissaq imaluunniit ingerlatassat allat avatangiisini aarlerinaataasut paasineqartussanngorlugit, nalilersorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit pilersaarusiussagai, suliffeqarfiup imaluunniit inuup isumagisussaappagu.

2) Suleqatigisap allap sulinissaq imaluunniit ingerlatassat allat avatangiisini aarlerinaataasut paasineqartussanngorlugit, nalilersorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit pilersaarusiorsimanerai nakkutigineqarnissaa, suliffeqarfiup imaluunniit inuup isumagisussaappagu.

3) Suliffeqarfik imaluunniit inuk avatangiisini aarlerinaataasut paasineqarnissaannut, nalilersorneqarnissaannut aammalu suliaqarnermi naapertuuttumik sapinngisamik annertunerpaamik annikillisinnissaannut peqataasussaappat.

- 4) Avatangiisini aarlerinaataasut paasineqartussanngorlugit, nalilersorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit suliaqarnerup ingerlannissaanut pisariaqartumik ilinniartinneqassasoq ilitserorneqassasorlu sulisitsisup imaluunniit suliffeqarfiup allap imaluunniit inuup allap isumagisussaappagu.
- 5) Avatangiisini aarlerinaataasut aarlerinaataajunnaarnissaat imaluunniit annikillisinnaasaat suliffeqarfiup imaluunniit inuup isumagisussaappagu.
- 6) Sanaartukkat, aqqissuussinerit, umiarsuit imaluunniit angallatit allat, ilanngullugit pineqartup sannai, aqqissugaanera atortulersugaanera ilaalu ilanngullugit, avatangiisitigut tamakkiisumik isumannaatsuusut, suliffeqarfiup imaluunniit inuup qulakkeertussaappagu.

§ 91. Ingerlatassamut imaluunniit sanaartukkamik pilersitsinissamut ingerlatsinissamullu, Inatsisartut inatsisaanni pineqartunut ilaasumut, akuersissuteqarnissaq pillugu aalajangiinerni ilaatigut mianerisassat pingaartinneqassapput:

- 1) Avatangiisinut, silap pissusaanut pinngortitamullu tunngasunut ajorseriartitsinissap imaluunniit allatut sunniinerlunnissap pinngitsoortinnissaa.
- 2) Nunami namminerimi nunanilu tamalaani pinngortitamik allanngutsaaliuiffiusussatut toqqagaasuni pinngortitap aammalu pinngortitami suussutsit uumasullu najortagaasa ajorseriartinnissaasa aammalu uumasut sumiiffiit toqqarneqarneranni pineqartut akornusersorneqarnissaasa pinngitsoortinnissai.

§ 92. Ingerlatassaq imaluunniit sanaartugaq Inatsisartut inatsisaanni pineqartunut ilaasoq avatangiisinut, silap pissusaanut pinngortitamullu tunngasunut annertuumik sunniuteqarsinnaassasoq ilimagineqartariaqarpat, akuersissuteqarneq ingerlatassap imaluunniit sanaartukkap avatangiisinut, silap pissusaanut pinngortitamullu tunngasunut sunniutissaannik nalilersuineq tunngavigalugu, aammalu tamat aamma oqartussat kattuffiillu kalluarneqartussat tamatumunnga oqaaseqaateqarnissamut periarfissaqareernerisa kingorna, aatsaat akuersissuteqartoqarsinnaavoq. Nalilersuineq kapitali 15-imi avatangiisinut sunniutaasussanik nalilersuinnermut maleruagassat malillugit pissaaq.

Imm. 2. Ingerlatassaq imaluunniit sanaartugaq Inatsisartut inatsisaanni pineqartunut ilaasoq sumiiffinnut pinngortitamik illersuiviusunut nunami namminerimi imaluunniit nunani tamalaani toqqagaasunut annertuumik sunniuteqarsinnaasoq ilimagineqartariaqarpat, ingerlatassap imaluunniit sanaartukkap taassuma piujuartinnissaanut siunertaasut eqqarsaatigalugit sumiiffimmi sunniutissaannut nalilersuineq tunngavigalugu aatsaat akuersissuteqarfigineqarsinnaavoq. Tamanna Naalakkersuisut naapertuuttutut isigippassuk, akuersissuteqannginnermi sumiiffimmi sunniutaasussanik nalilersuineq pillugu tamat oqaaseqarnissamut periarfissinneqassapput.

Imm. 3. Pisuni imm. 1-imi aamma 2-mi taaneqartuni, ingerlatassaq imaluunniit sanaartugaq sumiiffiit nunami namminerimi imaluunniit nunani tamalaani pinngortitamik illersuiviusut qanoq issusaannut ajoqusiissanngippat, imaluunniit inuiaqatigiit soqutigisaat annertuut, ilanngullugit inooqatigiinnermut imaluunniit aningaasaqarnermut tunngasut, ingerlatassat suliarineqarnissaat imaluunniit sanaartukkamik pilersitsinissaq ingerlatsinissarlu pisariaqalersippassuk, aatsaat akuersissuteqartoqarsinnaavoq, taamaattoq takuuk imm. 4.

Imm. 4. Ingerlatassat imaluunniit sanaartugaq sumiiffimmut nunami namminerimi imaluunniit nunani tamalaani pinngortitami illersuiviusumi pinngortitap qanoq issusaanik pingaartitsiviusumi imaluunniit

suussusaanik pingaartitsiviusumut annertuumik sunniuteqarsinnaassasoq ilimagineqartariaqarpat, inuit peqqissusaat, tamat isumannaatsuunissaat imaluunniit avatangiisinut annertuumik iluaqutaasumik sunniuteqartitsinissaq eqqarsaatigalugu tamanna pisariaqarpat, imaluunniit inuiaqatigiit soqutigisaat allat eqqarsaatigalugit ingerlatassap suliarineqarnissaa imaluunniit sanaartukkap ingerlanneqarnissaa pisariaqarpat, Naalakkersuisut pisuni imm. 3-mi taaneqartuni ingerlatassanut imaluunniit sanaartukkamut aatsaat akuersissuteqarsinnaapput.

Imm. 5. Naalakkersuisut imm. 3-mi imaluunniit 4-mi pineqartunut ilaasunut akuersissuteqarpata, Naalakkersuisut naleqquttunik taartissatut iliuusissanik aalajangersaassapput, ilanngullugit akuersissuteqarnermut atugassarititaasut. Taartissatut iliuusissanut aningaasartuutit akuersissuteqarfigineqarnissamik qinnuteqartumit matussuserneqassapput.

Piginnaatitsissutinut aalajangersakkat

§ 93. Naalakkersuisut avatangiisinik, silap pissusaanik pinngortitamillu allanngutsaaliuineq aamma pissutsit §§ 87-92-mi taaneqartut pillugit aalajangersakkanik atugassarititaasunillu erseqqinnerusunik aalajangersaasinnaapput, ilanngullugu avatangiisinik, silap pissusaanik pinngortitamillu allanngutsaaliuineq pillugu nunami namminermer maleruagassat, isumaqatigiissutit imaluunniit malittarisassat atorneqarnissaat pillugu.

§ 94. Sumiiffimmi akuersissuteqarfiusumi avataanilu ingerlatassanik Inatsisartut inatsisaanni pineqartunik ilaasunik aammalu ingerlatassanik allanik suliaqarnermut atatillugu avatangiisit, silap pissusaa pinngortitarlu pillugit aammalu pissutsit Inatsisartut inatsisaanni pineqartunut ilaasut pillugit aalajangersakkanik atugassarititaasunillu Naalakkersuisut aalajangersaasinnaapput.

Kapitali 14

Avatangiisinut akisussaaffik

§ 95. § 20, imm. 2 malillugu akisussaasuusoq ingerlatassamut tunngatillugu akuersissut imaluunniit akuersissuteqarnek malillugu pisinnaatitsissummik pigisaqartuunani allaappat, pisinnaatitsissummik pigisaqartoq aamma ingerlatassanut akisussaasuussaaq. Taamaattoqarnerani taakkua marluk ataatsimoorlutik aammalu tamarmik immikkut kapitalimi matumani maleruagassat malillugit tamakkiisumik pisussaaffeqassapput akisussaasuussallutillu.

Imm. 2. Imm. 1 malillugu ingerlatamut, avatangiisinut ajoqusiisimasumut imaluunniit ajoquseeqataasimasumut imaluunniit avatangiisinut ajoqusiinissamik annertuumik navianartorsiortitsisimasumut akisussaasuusoq, avatangiisinut ajoqusiinermut imaluunniit avatangiisinut ajoqusiinissamik annertuumik navianartorsiortitsinermut akisussaasuvoq. Ajoqusiineq imaluunniit ajoqusiinissamik annertuumik navianartorsiorneq pissutsit pisinnaasut malitsigisaannik pilersimagaluarpalluunniit, avatangiisinut ajoqusiineq imaluunniit avatangiisinut ajoqusiinissamik annertuumik navianartorsiortitsinerup qanoq pilersimanera apeqqutaatinnagu tamanna atuuppoq.

§ 96. Avatangiisinut ajoqusiinissamik annertuumik navianartorsiortitsinermut akisussaasuusoq pitsaaliuilluni iliuusissanik pisariaqartunik, avatangiisinut ajoqusiinissamut annertuumik

navianartorsiortitsinermik pinngitsoortitsisinnaasunik, ingerlaannaq aallartitsissaaq, aammalu navianartorsiorneq aamma iliuusissat aallartinneqartut pillugit Naalakkersuisut kalerrissallugit.

Imm. 2. Avatangiisinut ajoqusiinermut akisussaasuusooq suliniutinik ajoqusiinerup annertussusaanik killilersimaarinnissinnaasunik aammalu ajoqusiinerup annertunerulernissaanik pinngitsoortitsisinnaasunik suliaqarnikkut ingerlanneqarsinnaasunik ingerlaannaq aallartitsissaaq, aammalu Naalakkersuisut ajoqusiineq suliniutillu pillugit kalerrissallugit.

Imm. 3. Naalakkersuisut imm. 1 aamma 2 malillugit pisussaaffiit naammassineqarnerannut nakkutilliissapput, aammalu naammassinninnissaat aamma tamatumunnga atatillugu iliuusissanik suliaqarnissaq pillugu peqqusisinnaallutik.

§ 97. Paasissutissanik avatangiisini ajoqusiisoqarsimanersoq imaluunniit avatangiisini ajoqusiinissaq annertuumik navianaateqarnersoq nalilersuinissamut pingaaruteqartunik akisussaasuusooq tunniussissasoq Naalakkersuisut peqqusisinnaapput. Avatangiisini ajoqusiinermut imaluunniit avatangiisini ajoqusiinissap annertuumik navianaateqarneranut pissutaasut taakkualu sunniutissaasa paasinarsisinneqarnissaat siunertaralugu, akisussaasuusooq nammineq akilikkaminik misissuinernik, misissueqqissaarnernik, akuutissanik imaluunniit atortussanik uuttortaanernik assigisaannilluunniit suliaqassasoq, Naalakkersuisut ilaatigut peqqusisinnaapput.

Imm. 2. Akisussaasuusup pigisamut aalaakkaasumut imaluunniit sumiiffimmut mingutsinneqarsimasutut paasineqartumut imaluunniit peqqusissuteqarneq malillugu ingerlatassat suliarineqarfissaannut atuisinnaatitaanginnera apeqqutaatinnagu, imm. 1 malillugu peqqusisinnaavoq. Peqqusissuteqarnermi pigisap aalaakkaasup mingutsinneqartup imaluunniit sumiiffiup mingutsinneqartup ilaalu ilanngullugit iluarseeqqinneqarnissaanut pisussaaffeqarneq aalajangersarneqarsinnaavoq.

Imm. 3. Akisussaasuusooq pigisamut aalaakkaasumut imaluunniit sumiiffimmut atuisinnaatitaangippat, akisussaasuusup imaluunniit allat misissuinernik imaluunniit iluarseeqqinnernik ilaalu ilanngullugit suliaqarnerat akuereqqullugu Naalakkersuisut pigisamut aalaakkaasumut imaluunniit sumiiffimmut atuisinnaatitaasoq peqqusinnaavaat.

Imm. 4. Imm. 3 malillugu peqqusissuteqarneq pigisamut aalaakkaasumut imaluunniit sumiiffimmut imm. 1 malillugu peqqusissuteqarneq malillugu ingerlatassat suliarineqarfissaannut atuisinnaatitaasumut kimulluunniit pisussaaffiliivoq.

§ 98. Avatangiisini ajoqusiisoqarsimappat imaluunniit avatangiisini ajoqusiinissaq annertuumik navianaateqarpat, kapitalimi matumani maleruagassani pineqartunut ilaasumik, Naalakkersuisut kapitalimi matumani maleruagassat malillugit tamatumunnga immaqalu iliuusissaanik ilaalu ilanngullugit aalajangiissapput.

Imm. 2. Naalakkersuisut imm. 1 malillugu aalajangiineq Naalakkersuisut nittartagaanni imaluunniit allatut naleqquttumik tamanut saqqummiutissavaat. Avatangiisini ajoqusiisoqarsimasooq imaluunniit avatangiisini ajoqusiinissaq annertuumik navianaateqartoq imm. 1 malillugu aalajangiinerup tamanut saqqummiunneqarnera akisussaasuusup akiligassaanik pissaaq.

§ 99. Avatangiisinut akisussaaneq pillugu aalajangersakkanik atugassarititaasunillu erseeqqinnerusunik Naalakkersuisut aalajangersaasinnaapput, ilanngullugu aalajangersakkat kapitalimi matumani taaneqartut atuutsinneqarnissaat pillugu.

Kapitali 15

Avatangiisinik nalilersuineq (VVM)

§ 100. Ingerlatassanik suliaqarnermi avatangiisinut sunniutaasussanik nalilersuineq (VVM) suliarineqareerpat, tamatumunngalu nassuiaat (VVM-mut nassuiaat) Naalakkersuisunit akuersissuteqarfigineqareerpat, ingerlatassat makkua arlaannut aatsaat akuersissuteqartoqarsinnaavoq, takuuk kapitali 12:

1) Aatsitassanik piiaaneq, najukkami aatsitassarsiorluni ingerlataqarneq ilaanani.

2) suliassanut maleruagassiinermi ilaatinneqartoq ilaanani.

2) Sanaartukkanik anginerusunik ingerlatassani Inatsisartut inatsisaanni pineqartunut ilaasuni atorneqartussanik pilersitsineq, imaluunniit inissiineq atuinerlu, ilanngullugit aatsitassarsiorfinni suliaqarfiit, nunap iluani suliaqarfiit, nukissiorfiit taakkununga atasut aamma ruujorilersuinerit taakkununga atasut.

3) Ingerlatamik imaluunniit suliaqarfimmi ingerlatsinermik ilaalu ilanngullugit nr. 1-2-mi taaneqartumik unitsitsineq imaluunniit suliaqarfimmik ilaalu ilanngullugit nr. 2-mi taaneqartumik matusineq.

Imm. 2. Piiaaneq avatangiisinut annertuumik sunniuteqartussaangippat, pisinnaatitsissummik pigisaqartup imm. 1, nr. 1-imi piumasaqaatip atuutsinnginnissaa qinnutigisinnaavaa.

Imm. 3. Ingerlatassaq Inatsisartut inatsisaanni pineqartunut ilaasoq aammalu imm. 1-imi pineqartunut ilaangitsoq, avatangiisinut annertuumik sunniuteqarsinnaassasoq ilimagineqartariaqarpat, avatangiisinut nalilersuineq suliarineqareerpat aammalu VVM-imut nassuiaat Naalakkersuisunit akuersissuteqarfigineqareerpat, aatsaat ingerlatassamut akuersissuteqartoqarsinnaavoq.

Imm. 4. Pisuni imm. 2-mi aamma 3-mi taaneqartuni avatangiisinut sunniutaasussanik nalilersuisoqassanersoq aammalu VVM-imut nassuiaat suliarineqassanersoq, Naalakkersuisut aalajangissavaat.

Imm. 5. Ingerlatassamut avatangiisinut sunniutaasussanik nalilersuineq suliarineqartussaangippat aammalu VVM-imut nassuiaat suliarineqartussaangippat, takuuk imm. 4, suliniutinik pitsaaliuisussanik nalilersuineq (VFT) tamatumunngalu nassuiaat (VFT-mut nassuiaat) suliarineqassasut Naalakkersuisut aalajangersinnaapput.

Imm. 6. Ingerlatassamut imm. 4 naapertorlugu avatangiisinut sunniutaasussanik nalilersuisoqartussaangippat, imaluunniit imm. 5 naapertorlugu suliniutissanik pitsaaliuisussanik nalilersuisoqartussaangippat, ingerlatassaq avatangiisinut akuersissuteqarfigineqassasoq Naalakkersuisut aalajangersinnaavaat.

Imm. 7. Tunngavissarititaasut imm. 3 malillugu aalajangiinermi atorneqartussat pillugit aalajangersakkanik erseqqinnerusunik Naalakkersuisut aalajangersaasinnaapput. Naalakkersuisut aammattaaq suliniutinik pitsaaliuisussanik nalilersuinissaq (VFT) tamatumunngalu tunngavissarititaasut pillugit aalajangersakkanik erseqqinnerusunik aalajangersaasinnaapput, takuuk imm 5. Naalakkersuisut tamatuma saniatigut imm. 6 malillugu avatangiisinut akuersissuteqartarneq pillugu aalajangersakkanik erseqqinnerusunik aalajangersaasinnaapput.

§ 101. Pisinnaatitsissummik pigisaqartoq § 100 malillugu VVM-imik pisussaaffeqarfiusumik ingerlatassamik akuersissuteqarfigineqarnissamik qinnuteqartoq,

- 1) avatangiisinik nalilersuineramik (VVM) suliaqassaaq,
- 2) VVM-imut nassuiaammik suliaqassaaq,
- 3) nr. 2 naapertorlugu VVM-imut nassuiaammik Naalakkersuisunut tunniussissaaq
- 4) VVM-imut nassuiaatip tekniskiuunngitsumik eqikkarneqarneranik suliaqassaaq aammalu eqikkaaneq Naalakkersuisunut tunniutissallugu.

Imm. 2. VVM-imut nassuiaammi ingerlatassap avatangiisini pissutsinut toqqaannartumik aamma toqqaannanngitsumik sunniutissai aammalu pissutsit imminnut ataqatigiinnerat, pissutsit imminnut sunneeatigiinnissat aammalu ataatsimoortumik sunniutissai (katersuuttut) naapertuuttumik uppernarsitissavai, nassuiaassava nalilersussallugillu.

Imm. 3. Najoqqutassanik annertunerusunik avatangiisinut sunniutaasussanik nalilersuinermut atugassanik pissarsisitsisoqassasoq, imaluunniit qinnuteqartoq pissutsinik erseqqinnerusumik aalajangerneqartunik, avatangiisinut sunniutaasussanik nalilersuinermut pingaaruteqartunik, annertunerusunik misissuissasoq imaluunniit nalilersuissasoq, Naalakkersuisut aalajangersinnaavaat.

Imm. 4. Naalakkersuisut avatangiisinut nalilersuineramik suliaqarneq, VVM-imut nassuiaammik suliaqarneq aamma Naalakkersuisut VVM-imut nassuiaammik akuersissuteqartarnerat ilaalu ilanngullugit pillugit aalajangersakkanik erseqqinnerusunik atugassarititaasunillu aalajangersaasinnaapput, ilanngullugit misissuinerit nalilersuinerillu ingerlanneqartussat aammalu paasissutissat allakkiallu avatangiisinik nalilersuinermut atorineqartussat pissarsiarineqartussat, VVM-imut nassuiaatip imarisassai aammalu VVM-imut nassuiaatip tunniunneqarnerani Naalakkersuisunut tunniunneqartussat pillugit.

§ 102. VVM-imut nassuiaatip inaarutaasup Naalakkersuisunut tunniunneqarnera pillugu paasissutissat Naalakkersuisut nittartagaanni imaluunniit allatut naleqquttumik tamanut ammasumik nalunaarutigineqassapput.

Imm. 2. VVM-imut nassuiaammut missingiut aamma paasissutissat, allakkiaat tamatumunngalu atatillugu paasissutissat nalunaarsukkat Naalakkersuisunut tunniunneqartut, isertuussaapput. Piffissami isertuussiviusumi ilaatinneqarpoq, Naalakkersuisut nittartagaanni aammalu allatut naleqquttumik tamanut saqqummersinneqarnissaasa, pisinnaatitsissummik pigisaqartup VVM-imut nassuiaammik inaarutaasumik imm. 1 malillugu Naalakkersuisunut tunniussinissaata, tungaannut piffissaq.

Imm. 3. Naalakkersuisut piffissami isertuussiviusumi VVM-imut nassuiaammut missingiut isertuussaq aamma paasissutissat, allakkiaat aamma tamatumunnga atatillugu paasissutissat nalunaarsukkat Naalakkersuisunut tunniunneqartut isertuussat pillugit paasissutissat nalinginnaasut tamanut saqqummiussinnaavaat. Naalakkersuisut paasissutissanik nalinginnaasunik taamaattunik tamanut saqqummiussinnginnermi paasissutissat pisinnaatitsissummik pigisaqartumut tusarniaassutigalugit nassiutissavaat aammalu pisinnaatitsissummik pigisaqartoq minnerpaamik qaammatisiutit malillugit ulluni 14-ini piffissamut killiliussap naleqquttup aalajangersagaasup iluani, tamatumunnga oqaaseqaateqarsinnaasoq immaqalu paasissutissat tamarmik imaluunniit ilaasa tamanut saqqummiunneqarnissaannut tunngavilersukkamik akerliliissuteqarsinnaasoq pisinnaatitsissummik pigisaqartoq paasitissallugu. Pisinnaatitsissummik pigisaqartoq paasissutissat tamarmik imaluunniit ilaasa tamanut saqqummiunneqarnissaannut akerliliissuteqarluni piffissamut killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata mianerinissaa,

Naalakkersuisut paasissutissanik pineqartunik tamanut saqqummiussinissamut soqutigisaqarnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

Imm. 4. Imm. 2 aamma 3 apequtaatinnagit Naalakkersuisut pisuni tamaginni avatangiisinut paasissutissat aamma avatangiisinut nalunaarusiat nalinginnaasumik inuiaqatigiinni soqutiginaateqartutut nalilerneqartut, tamanut ammasumik saqqummiussinnaavaat.

Imm. 5. Naalakkersuisut pissutsit imm. 1-4-mi taaneqartut pillugit aalajangersakkanik erseqqinnerusunik atugassarititaasunillu aalajangersaasinnaapput.

Kapitali 16

Inuiaqatigiinni piujuaannartitsisumik ingerlatsinermik naliliineq (VSB)

§ 103. Ingerlatassamut, Inatsisartut inatsisaat malillugu akuersissummi pineqartunut ilaasumut, aammalu inuiaqatigiinnut tunngasunut annertuumik sunniuteqarsinnaasussatut ilimagineqartariaqartumut, ingerlatassanik suliaqarnermi inuiaqatigiinni piujuaannartitsisumik ingerlatsinermik naliliineq (VSB) suliarineqareerpat, tamatumunngalu nassuiaat (VSB-imut nassuiaat) pisinnaatitsissummik pigisaqartumit suliarineqareerpat aammalu Naalakkersuisunit akuereqareerpat, aatsaat Naalakkersuisut akuersissuteqarsinnaapput.

Imm. 2. Pisinnaatitsissummik pigisaqartoq akuersissuteqarfigineqarnissamik qinnuteqartoq VSB-imik suliaqartussaalluni, VSB-imut nassuiaammik suliaqartussaalluni aammalu VSB-imut nassuiaammut Naalakkersuisut akuersissuteqarnerannik pissarsisussaalluni, pisoq aalajangersimasoq imm. 1-imi pineqartunut ilaanersoq, Naalakkersuisut aalajangissavaat.

Imm. 3. Naalakkersuisut tunngavissarititaasut aalajangiinnermi atorineqartut pillugit aalajangersakkanik imaluunniit atugassarititaasunik erseqqinnerusunik aalajangersaasinnaapput.

§ 104. Tamanna § 103 malillugu piumasaqaataappat, pisinnaatitsissummik pigisaqartoq ingerlatassamut akuersissuteqarfigineqarnissamik qinnuteqartoq:

- 1) inuiaqatigiinni piujuaannartitsisumik ingerlatsinermik naliliinermik (VSB-mik) suliaqassaaq,
- 2) VSB-imut nassuiaammik suliaqassaaq,
- 3) nr. 2 naapertorlugu VSB-imut nassuiaammik Naalakkersuisunut tunniussissaaq, aamma
- 4) VSB-imut nassuiaatip tekniskiuungitsumik eqikkarneqarneranik suliaqassaaq aammalu eqikkaaneq Naalakkersuisunut tunniutissallugu.

Imm. 2. VSB-imut nassuiaammi ingerlatassap inuiaqatigiinnut tunngasunut toqqaannartumik aamma toqqaannangitsumik sunniuteqarnissaa aammalu pissutsit imminnut ataqatigiinnerat, imminnut sunniivigeqatigiinnerat aammalu ataatsimut katillugu (ataatsimoortut) sunniuteqarnissaat, naleqquttumik paasinarsisinneqassapput, nassuiarneqassallutik nalilersorneqassallutillu, ilanngullugit innuttaasut inooqatigiinnermut, kulturimut, upperisamut anersaakkullu naleqartitaat ileqquilu.

Imm. 3. VSB-mut atugassat paasissutissat imaluunniit allakkiat annertunerusut pissarsiarineqassasut, imaluunniit VSB-mut pisussaaffeqartoq pissutsinik erseqqinnerusumik aalajangerneqartunik, inuiaqatigiinni piujuaannartitsisumik ingerlatsinermik naliliinnermut pingaaruteqartunik, annertunerusunik misissuinernik imaluunniit nalilersuinernik suliaqassasoq, Naalakkersuisut aalajangersinnaavaat.

Imm. 4. Naalakkersuisut VSB-mik suliaqartarnek, VSB-imut nassuiaammik suliaqartarnek aamma Naalakkersuisut VSB-imut nassuiaammut akuersissuteqartarnerat ilaalu ilanngullugit pillugit

aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit misissuinerit nalilersuinerillu ingerlanneqartussat aammalu paasissutissat allakkiallu VSB-mut atugassatut pissarsiarineqartussat, VSB-imut nassuiaatip imarisassai aammalu VSB-imut nassuiaatip Naalakkersuisunut tunniunneqarnerani tunniunneqartussat pillugit.

§ 105. VSB-imut nassuiaatip inaarutaasup Naalakkersuisunut tunniunneqarnera pillugu paasissutissat Naalakkersuisut nittartagaanni aammalu allatut naleqquttumik tamanut nalunaarutigineqassaaq.

Imm. 2. VSB-imut nassuiaammut missingiut aamma paasissutissat, allakkiaat tamatumunngalu atatillugu paasissutissat nalunaarsukkat Naalakkersuisunut tunniunneqartut, isertuussaapput. Piffissami isertuussiviusumi ilaatinneqarput Naalakkersuisut nittartagaanni aammalu allatut naleqquttumik tamanut saqqummersinneqarnissaasa, pisinnaatitsissummik pigisaqartup VSB-imut nassuiaammik inaarutaasumik imm. 1 malillugu Naalakkersuisunut tunniussinissaata, tungaanut piffissaq.

Imm. 3. Naalakkersuisut piffissami isertuussiviusumi VSB-imut nassuiaammut missingiut isertuussaq aamma paasissutissat, allakkiaat aamma tamatumunnga atatillugu paasissutissat nalunaarsukkat Naalakkersuisunut tunniunneqartut isertuussat pillugit paasissutissat nalinginnaasut tamanut saqqummiussinnaavaat. Naalakkersuisut paasissutissanik nalinginnaasunik taamaattunik tamanut saqqummiussinnginnermi paasissutissat pisinnaatitsissummik pigisaqartumut tusarniaassutigalugit nassiutissavaat aammalu pisinnaatitsissummik pigisaqartoq minnerpaamik qaammatisiutit malillugit ulluni 14-ini piffissamut killiliussap naleqquttup aalajangersagaasup iluani, tamatumunnga oqaaseqaateqarsinnaasoq immaqalu paasissutissat tamarmik imaluunniit ilaasa tamanut saqqummiunneqarnissaannut tunngavilersukkamik akerliliissuteqarsinnaasoq pisinnaatitsissummik pigisaqartoq paasitissallugu. Pisinnaatitsissummik pigisaqartoq paasissutissat tamarmik imaluunniit ilaasa tamanut saqqummiunneqarnissaannut akerliliissuteqarluni piffissamut killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata mianerinissaa, Naalakkersuisut paasissutissanik pineqartunik tamanut saqqummiussinissamut soqutigisaqarnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

Imm. 4. Naalakkersuisut pissutsit imm. 1-3-mi taaneqartut pillugit aalajangersakkanik aamma atugassarititaasunik erseqqinnerusunik aalajangersaasinnaapput.

Kapitali 17

Piareersaataasumik tusarniaaneq aamma tusarniaaneq

§ 106. Inatsisartut inatsisaat malillugu ingerlatassaq Naalakkersuisut naliliinerat malillugu avatangiisinut annertuumik sunniuteqarsinnaasussaappat, takuuk § 100, imaluunniit inuiaqatigiinni pissutsinut annertuumik sunniuteqarsinnaasussaappat, takuuk § 103, qinnuteqartoq imaluunniit pisinnaatitsissummik pigisaqartoq suliassamut nassuiaammik, Naalakkersuisunut nassiunneqartussamik, suliaqassaaq.

Imm. 2. Avatangiisinut sunniutaasussanik nalilersuinerup (VVM) imaluunniit inuiaqatigiinni piujaannartitsisumik ingerlatsinermik naliliinerup (VSB) imarisassaasa aalajangersarneqannginneranni, suliassamut nassuiaat qaammatisiutit malillugit ulluni 35-ni tamanut ammasumik piareersaataasumik tusarniaassutigalugu nassiunneqassaaq. Avatangiisinut sunniutaasussanik nalilersuinissaq (VVM-imut nassuiaat) pillugu suliassamut nassuiaat aamma inuiaqatigiinni piujaannartitsisumik ingerlatsinermik naliliinissaq (VSB) pillugu suliassamut nassuiaat tamanut ammasumik piareersaataasumik

tusarniaassutigineqartussaasimappata, piareersaataasumik tusarniaanerit ataatsimoortillugit ingerlanneqassapput.

Imm. 3. Naalakkersuisut suliaassamut nassuiaatip imarisassai pillugit aalajangersakkanik erseqqinnerusunik aalajangersaasinnaapput.

§ 107. Naalakkersuisut avatangiisinut sunniutaasussanik nalilersuineq pillugu nassuiaat (VVM) aamma inuiaqatigiinni piujuaannartitsisumik ingerlatsinermik naliliineq pillugu nassuiaat (VSB) tamanut ammasumik tusarniaassutigalugit nassutissavai. Avatangiisinut sunniutaasussanik nalilersuineq pillugu nassuiaat (VVM-imut nassuiaat) aammalu inuiaqatigiinni piujuaannartitsisumik ingerlatsinermik naliliineq pillugu nassuiaat (VSB-imut nassuiaat) tamanut ammasumik tusarniaassutigineqartussaasimappata, tusarniaanerit ataatsimoortillugit ingerlanneqassapput.

Imm. 2. Piffissaq tusarniaaffusoq sapaatip akunnerini 8-ni pissaaq. Piffissaq tusarniaaffusoq ulloq Naalakkersuisut tusarniaanermut najoqqutassat tamanut ammasumik pissarsiarineqarsinnaasunngortinnerat aallarnerfigalugu, aallartissaaq. Piffissaq tusarniaaffusoq arfininngornermi, sapaammi imaluunniit ullumi nalliuttumi naappat, piffissaq tusarniaaffusoq ulluinnarmut tullermut sivitsorneqassaaq.

Imm. 3. Tamanut ammasumik tusarniaalluni ataatsimiititsineq naapertuuttumik ingerlanneqarsinnaasimanngippat, imaluunniit Naalakkersuisut ataatsimiinnerni peqataasinnaanngippata, piffissaq tusarniaaffusoq sivitsorneqassaaq.

§ 108. Naalakkersuisut piffissap tusarniaaffusup ingerlanerani, takuuk § 107, akuersissut malillugu pisinnaatitsisummik pigisaqartoq suleqatigalugu, illoqarfinni nunaqarfinnilu suliaasaq pillugu ingerlatassatut pilersaarutigineqartunit immikkut kalluarneqartussani, tamanut ammasumik tusarniaalluni ataatsimiititsinernik ingerlatsissapput. Ingerlatassat nunami sumiiffinni illoqarfinnit nunaqarfinniillu ungasissumi imaluunniit kommunit aggornerisa avataanni ingerlanneqartussaappata, illoqarfinni nunaqarfinnilu sorlarni tamanut ammasumik tusarniaalluni ataatsimiititsinerit ingerlanneqassanersut, Naalakkersuisut aalajangiissapput.

§ 109. Tamanut ammasumik tusarniaalluni ataatsimiititsinerit, takuuk § 108, ingerlanneqarnissaat qaammatisiutit malillugit minnerpaamik ullunik 14-inik sioqqullugit Naalakkersuisut tusarniaalluni ataatsimiititsinissamut aggersaassapput.

Imm. 2. Tamanut ammasumik tusarniaalluni ataatsimiititsinernut aggersaaneq najukkani aviisini aamma pisortat namminersortullu tusagassiuutaanni naleqquttuni allagarsiissutigineqassaaq.

Imm. 3. Tusarniaalluni ataatsimiititsinermut imaqarniliamik Naalakkersuisut suliaqassapput. Naalakkersuisut tamatuma kingorna imaqarniliaq tamanut saqqummersissavaat.

Imm. 4. Ataatsimiinnermi peqataasut apeqquteqarnissaannut, oqaaseqaateqarnissaannut, suliaasamik oqaluuserinninnissaannut aammalu suliaasaq pillugu nalunaarutinik atuaanissamut tusarniaalluni ataatsimiititsinermi piffissaliisoqarnissaa aammalu periarfissiisoqarnissaa, Naalakkersuisut qulakkiissavaat.

Imm. 5. Naalakkersuisut tusarniaalluni ataatsimiititsinermut ataatsimiinnermi aqutsisussamik toqqaassapput.

Kapitali 18

Inuiaqatigiinni piujuaannartitsisumik ingerlatsinissaq pillugu isumaqatigiissut

§ 110. Pisinnaatitsisummik pigisaqartoq ingerlatassamut Inatsisartut inatsisaanni pineqartunut ilaasumut, aammalu inuiaqatigiinni pissutsinut annertuumik sunniuteqarsinnaasussatut naatsorsuutigineqartariaqartumut akuersissuteqarnissamik qinnuteqartoq, inuiaqatigiinni piujuaannartitsisumik ingerlatsinissaq pillugu isumaqatigiissummik aamma inuiaqatigiit aningaasaqarnerannut tunngasunut allanut isumaqatigiissuteqassasoq aammalu taanna naammassissagaa pillugu aalajangersakkanik aamma atugassarititaasunik Naalakkersuisut aalajangersaasinnaapput.

Imm. 2. Isumaqatigiissut imm. 1-imi taaneqartoq Naalakkersuisut aamma pisinnaatitsisummik pigisaqartup akornanni isumaqatigiissutigineqassaaq.

Imm. 3. Akuersissummi sumiiffik akuersissuteqarfusoq kommunip sumiiffianiippat, isumaqatigiissut aamma kommunimut isumaqatigiissutigineqassaaq.

Imm. 4. Akuersissummi sumiiffik akuersissuteqarfusoq kommunip sumiiffianiinngippat, Naalakkersuisut tamatumunnga aalajangersakkanik imaluunniit atugassarititaasunik aalajangersaappata imaluunniit tamatumunnga aalajangiippata, isumaqatigiissut aamma kommuninut qanitaaniittunut ataatsimut arlalinnuunniit isumaqatigiissutigineqassaaq.

Imm. 5. Taamaattoq isumaqatigiissutip isumaqatiginninniutigineqarnera, isumaqatigiissutigineqarnera imaluunniit imarisai pillugit kommunip piumasaqaatai Naalakkersuisut naliliinerat malillugu § 111-imut imaluunniit aalajangersakkanut imaluunniit atugassarititaasunut § 112 malillugu Naalakkersuisunit aalajangersarneqartunut naapertuutinngippata, isumaqatigiissut kommunimut isumaqatigiissutigineqassanngitsoq pillugu Naalakkersuisut aalajangiisnaapput.

§ 111. § 110 malillugu isumaqatigiissut Inatsisartut inatsisaanni § 1 malillugu siunertamut aamma aalajangersakkanut allanut isumaqatigiissutip siunertaanut aamma § 110 malillugu siunertamut sammisanullu aamma aalajangersakkanut atugassarititaasunullu § 112 malillugu aalajangersagaasunut, naapertuuttumik isumaqatiginninniutigineqassaaq, isumaqatigiissutigineqassalluni aammalu imaqqassalluni.

Imm. 2. § 110 malillugu isumaqatigiissut ilaatigut pisinnaatitsisummik pigisaqartup nunaqavissunik sulisoqarnissaa pilersuisoqarnissaalu pillugit aamma sulisussat nunaqavissut ilinniartitaaner at ilinniaqqinnissaallu pillugu atugassarititaasunik imaqqassaaq.

Imm. 3. Atugassarititaasut isumaqatigiissummi aalajangersagaasut naammassineqarsimanersut Naalakkersuisut aamma pisinnaatitsisummik pigisaqartup akornanni aaqqiagiinngissuteqarneq eqqartuussivimmut isumaqatigiissitsiniartartumut suliakkiunneqassasoq, § 110 malillugu isumaqatigiissummi aalajangersarneqarsinnaavoq. Tamatumunnga atugassarititaasut nalinginnaasumik akuersissummi tamatumunnga atugassarititaasunut naapertuutissapput. Taamaattoq isumaqatigiissut aamma kommunimut ataatsimut imaluunniit arlalinnut isumaqatigiissutigineqarsimappat, akuersissummit atugassarititaasut isumaqatigiissummi allanngortinneqassapput, taamaalillutik taakkua kommunip imaluunniit kommunit aamma isumaqatigiissummi peqataanerannut, taamaalillutillu aamma isumaqatigiissut pillugu aaqqiagiinngissuteqarnermi peqataanerannut, tunngasunut naleqqussarneqassallutik.

§ 112. Inatsisartut inatsisaanni § 1 malillugu siunertamut aamma aalajangersakkanut allanut naapertuuttumik, § 110 malillugu isumaqatigiissut pillugu pissutsit attuumassuteqartut tamaasa pillugit akuersissummut aalajangersakkanik aamma atugassarititaasunik erseqqinnerusunik Naalakkersuisut aalajangersaasinnaapput.

Kapitali 19

Sinerissap avataani suliaqarfinnut isumannaallisaaneq aamma peqqinnissaq

§ 113. Sinerissap avataani suliaqarfinnut, ingerlatanik Inatsisartut inatsisaat malillugu akuersissummi pineqartunut ilaasunik suliaqarnermi atorineqartunut atatillugu isumannaallisaanermut peqqinnissamullu aarlerinaataasut paasineqarnissaat, nalilersorneqarnissaat annikillisinneqarnissaallu, suliaqarnermi naleqquttumik ajornartinnagu, pisinnaatitsisummik pigisaqartup qulakkiissavaa.

Imm. 2. Sinerissap avataani suliaqarfiit ingerlanneqarnerisa Inatsisartut inatsisaannut, inatsisinut allanut, aalajangersakkanut Inatsisartut inatsisaat aamma inatsisit allat malillugit aalajangersagaasunut aamma aalajangersakkanut aamma atugassarititaasunut akuersissummi aalajangersagaasunut naapertuuttumik ingerlanneqarnissaat, taakkualu nakkutilliiviginissaat, pisinnaatitsisummik pigisaqartup qulakkiissavaa.

Imm. 3. Pisinnaatitsisummik pigisaqartup qulakkiissavaa:

- 1) suliffeqarfiup pisinnaatitsisummik pigisaqartoq sinnerlugu sinerissap avataani suliaqarfiit pillugit akuersissut malillugu ingerlatassanik suliaqartup imaluunniit nakkutiginnittup aammalu suliaqarnermik aqutsisup, isumannaallisaanikkut peqqinnissakkullu pisussaaffiit, taassuma pisussaaffigisaasa, naammassinissaannut periarfissaqarnera,
- 2) isumannaallisaanermut peqqinnissamullu aarlerinaataasut, suliaqarnermi naleqquttumik ajornartinnagu, paasineqarnissaat, nalilersorneqarnissaat annikillisinneqarnissaallu suliffeqarfiup pineqartup qulakkiissagai nakkutigissagaalu, aamma
- 3) akuersissut malillugu ingerlatassat Inatsisartut inatsisaannut, inatsisinut allanut, aalajangersakkanut Inatsisartut inatsisaat aamma inatsisit allat malillugit aalajangersagaasunut aamma aalajangersakkanut aamma atugassarititaasunut akuersissummi aalajangersagaasunut naapertuuttumik ingerlanneqarnissaat.

§ 114. Naalakkersuisut sinerissap avataani suliaqarfinnut, ingerlatanik Inatsisartut inatsisaat malillugu akuersissummi pineqartunut ilaasunik suliaqarnermi Inatsisartut inatsisaanni § 1 malillugu siunertamut aamma aalajangersakkanut allanut naapertuuttumik atorineqartunut atatillugu isumannaallisaaneq peqqinnissarlugu pillugit aalajangersakkanik aamma atugassarititaasunik aalajangersaasinnaapput.

Kapitali 20

Sinerissap avataani suliaqarfinni isumannaallisaanermut killeqarfiit

§ 115. Sinerissap avataani suliaqarfiit, suliaqarfik tissiarluni imaluunniit kalitsilluni ingerlaanngippat, isumannaallisaanermut killeqarfinnik ungalusaavoq.

Imm. 2. Sinerissap avataani suliaqarfik, isumannaallisaanermut killeqarfirmik ungalusaasoq, ingerlaannaq immap qaavani ersittanngippat, puttaqummik nalunaaqutsersimassaaq imaluunniit allamik takulertoruminartumik, Naalakkersuisunit akuerisaasumik, nalunaaqutserneqarsimassalluni.

Imm. 3. Isumannaallisaanermut killeqarfik sinerissap avataani suliaqarfiup eqqaani, taassuma sinaanit avallermit sorlermilluunniit imaluunniit nalunaaqutstersuutitut atorineqartumit allamiit uuttorlugu 500 meterinik isorartussuseqarpoq. Napparissuni (napparissut) immap naqqaniit suliaqarfiup portunerpaaffia 500 meterinik qaangerlugu isumannaallisaanermut killeqarfik isorartussuseqarpoq. Makittarissuni (makittarissut) isumannaallisaanermut killeqarfik sinerissap avataani suliaqarfiup sinaaniit silarlermit, taassuma sukkulluunniit sumiiffianit sorlermilluunniit, 500 meterinik isorartussuseqarpoq.

Imm. 4. Sinerissap avataani suliaqarfiup, isumannaallisaanermut killeqarfimmit ungalusimasup, sumiiffia, Imarsiortunut Nalunaarutini tamanut saqqummiunneqassaaq. Imarsiortunut Nalunaarutini tamanut saqqummersitsineq, Naalakkersuisut allamik aalajangiisimanngippata, pisinnaatitsissummik pigisaqartumit ingerlanneqassaaq.

§ 116. Isumannaallisaanermut killeqarfiup isorartussusissaa § 115, imm. 3-mi aalajangerneqartup saneqqunneqarnissaa pillugu Naalakkersuisut aalajangiisinnaapput. Saneqqutsinermi isumannaallisaanermut killeqarfik annertusitinneqarsinnaavoq imaluunniit annikillisinneqarsinnaalluni aammalu piffissamut aalajangersimasumut aalajangersarneqarsinnaalluni. Saneqqutsineq Imarsiortunut Nalunaarutini imaluunniit allatut Naalakkersuisunit aalajangerneqartumik tamanut saqqummersinneqassaaq. Imarsiortunut Nalunaarutini imaluunniit allatut Naalakkersuisunit aalajangerneqartumi tamanut saqqummersitsineq, Naalakkersuisut allamik aalajangiisimanngippata, pisinnaatitsissummik pigisaqartumit ingerlanneqassaaq.

Imm. 2. Inunnik ajoqusiinermik, inuit inuunerannik annaasaqarnermik, annertuumik mingutsitsinermik, atorutunik annertuumik ajoqusiinermik imaluunniit sinerissap avataani suliaqarfimmi ingerlatanik annertuumik akornusiinermik malitseqarsinnaasumik, navianartorsiornartumik pisoqartillugu imaluunniit ajutoortoqarluni pisoqartillugu, tamanna ajoqusiilluni sunniinerit taaneqartut taakkua pitsaaliornissaannut, pinngitsoortinnissaannut imaluunniit killilersimaarnissaannut pisariaqartutut isigineqarpat, Naalakkersuisut isumannaallisaanermut killeqarfik pioreersoq annertusitissinnaavaat imaluunniit isumannaallisaanermut killeqarfimmik nutaamik pilersitsisinnaallutik. Isumannaallisaanermut killeqarfiup pioreersup annertusitinneqarnera imaluunniit isumannaallisaanermut killeqarfimmik nutaamik pilersitsineq, Imarsiortunut Nalunaarutini tamanut saqqummersinneqassaaq. Imarsiortunut Nalunaarutini tamanut saqqummersitsineq, Naalakkersuisut allamik aalajangiisimanngippata, pisinnaatitsissummik pigisaqartumit ingerlanneqassaaq.

§ 117. Umiarsuit, prammit, imaatigut angallatit allat, timmisartut, qulimiguullit, dronit aamma silaannakkut angallatit allat, sinerissap avataani suliaqarfiit angallattakkat aamma sanaartukkat aaqqissuussinerillu angallattakkat allat, aalisarnermut atorutut, kisat, pituttornermut atorutut allat, atorutut allat aamma pigisat allat, taakkua inatsisit malillugit tamatumunnga siunertaqanngippata, sinerissap avataani suliaqarfiup eqqaani isumannaallisaanermut killeqarfimmut eqquteqqusaanngillat imaluunniit tassaneeqqusaanatik.

Imm. 2. Naalakkersuisut pisuni immikkut ittuni imm. 1-imi inerteqquteqarnermi ilaatitsinninnissaq, ilanngullugu aalisarneq piniarnerlu eqqarsaatigalugit, pillugu aalajangiisinnaapput aammalu tamatumunnga aalajangersakkanik aamma atugassarititaasunik ersarinnerusunik aalajangersaasinnaallutik.

Kapitali 21

Aalajangersakkat nalinginnaasut

Ingerlatassanik suliarinninnermut piumasaqaatit

§ 118. Ingerlatassat Inatsisartut inatsisaat malillugu akuersissummi pineqartunut ilaatinneqartut, pissutsit taamaaqatai atuutsillugit sumiiffimmi nunani tamalaani suleriaatsinut akuerisaasunut pitsaasunut naapertuuttumik suliarineqassapput.

Imm. 2. Ingerlatassat naapertuuttumik aammalu isumannaallisaanermut, peqqinnissamut, isumalluutini atuinnermut aamma inuiaqatigiinni piujuartitsinissamut tunngatillugu isumannaatsumik suliarineqassapput, ilanngullugu innuttaasut inooqatigiinnermut, kulturimut, upperisamut anersaakkullu naleqartitaat ileqquilu qajassuullugit.

Nunani tamalaani isumaqatigiissuteqarneq taakkuningalu atuineq

§ 119. Nunani tamalaani isumaqatigiissutit imaluunniit pissutsit Inatsisartut inatsisaanni ilaasut pillugit maleruagassat Kalaallit Nunaanni piviusunngortinneqarnissaat imaluunniit atuutsinnissaat siunertaralugu, Naalakkersuisut aalajangersakkanik aamma atugassarititaasunik aalajangersaasinnaapput.

Naalakkersuisut ingerlatassanik akuersissuteqartarnerat

§ 120. Ingerlatassat Inatsisartut inatsisaat malillugu akuersissummi pineqartunut ilaasut, ilanngullugit sumiiffimmi akuersissummi ilaatinneqartumi avataanilu illunik, sanaartukkanik ikkussuinerinilu ilaalu ilanngullugit pilersitsineq aamma akuersissut malillugu suliaqarnerup ingerlatallu unitsinneqarneranni pisussaaffiit naammassinissaannut iliuusissat ingerlatassallu, aallartinneqannginneranni, atugassarititaasunik akuersissummi aalajangersagaasunik naapertuuttumik Naalakkersuisunit akuersissuteqarfigineqassapput. Taamaattoq Naalakkersuisut akuersissut malillugu ingerlatassat aalajangersimasut akuerineqassanngitsut pillugu aalajangersakkanik aamma atugassarititaasunik aalajangersaasinnaapput.

Imm. 2. Piiaanermik suliaqarnerup unitsikkallarneqarneranut atatillugu iliuusissat, atugassarititaasunik akuersissummi aalajangersagaasunik naapertuuttumik, aallartinneqannginneranni Naalakkersuisunit akuersissuteqarfigineqassapput.

Imm. 3. Ingerlatassat annertunerusut imaluunniit pingaaruteqartut, akuersissut malillugu ingerlatassanik suliaqarnermut atatillugu suliarineqartut, ilanngullugit qillerinerit, sullut isaariaannik appartitsineq aamma qarusuliornerit ilaalu ilanngullugit, pisuni ataasiakkaani tamaginni aallartinneqannginneranni Naalakkersuisunit akuerineqartassapput.

§ 121. Naalakkersuisut akuersissuteqarnermut, ingerlatassamut imaluunniit ingerlatassanut pilersaarummut aamma ingerlatassanut pilersaarut malillugu ingerlatassanut tunngasut attuumassuteqartut tamaasa pillugit, Inatsisartut inatsisaanni § 1 malillugu siunertanut aamma aalajangersakkanut allanut naapertuuttumik ingerlatassamut akuersissuteqarnermut imaluunniit

ingerlatassanut pilersaarummut aalajangersakkanik aamma atugassarititaasunik,
aalajangersaasinnaapput.

Nakkutilliineq, peqqusissuteqartarneq aamma paasissutissiisussaataaneq

§ 122. Pisinnaatitsisummik pigisaqartup aamma allat suliaqarnerannut aamma ingerlatassanut Inatsisartut inatsisaanni pineqartunut ilaasunut Naalakkersuisut nakkutilliissapput, ilanngullugit aalajangersakkat aamma atugassarititaasut Inatsisartut inatsisaat malillugu aalajangersagaasut. Nakkutilliinermut oqartussap sulisui, tamanna nakkutilliilluni suliassanik ingerlatsinissamut pisariaqarpat, sukkulluunniit eqqartuussivimmi aalajangiinertaqanngitsumik, sukumiisumik kinaassutsimut uppersaammik takutitsillutik suliffeqarfiit aamma ingerlatassat Inatsisartut inatsisaanni pineqartunut ilaasut immikkoortuinut tamaginnut isersinnaatitaapput.

§ 123. Naalakkersuisut Inatsisartut inatsisaata aamma aalajangersakkat aamma akuersisummut atugassarititaasut Inatsisartut inatsisaat malillugu aalajangersagaasut malinneqarnerisa qulakkeernissaa siunertaralugu peqqusissuteqarsinnaapput inerteqquteqarsinnaallutillu. Peqqusissuteqarneq aamma inerteqquteqarneq pisinnaatitsisummik pigisaqartumut imaluunniit allanut Inatsisartut inatsisaanni pineqartunut ilaasunut nalunaarutigineqarsinnaavoq.

§ 124. Pisinnaatitsisummik pigisaqartut aamma suleqataasut allat Inatsisartut inatsisaanni pineqartunut ilaasut paasissutissanik tamaginnik, suliaqarnerminnut imaluunniit ingerlatassanut Inatsisartut inatsisaanni pineqartunut ilaasunut oqartussat suliarinninnerannut pisariaqartunik, nalunaarutiginnissapput. Naalakkersuisut oqartussat suliarinninnerisa Inatsisartut inatsisaanni pineqartunut ilaasup ingerlannissaanut pisinnaatitsisummik pigisaqartut aamma allat paasissutissanik Naalakkersuisut pisariaqartitaattut iliorlutik aammalu iluseqartitsillutik tunniussissasut, peqqusisinnaapput.

Suliassanik suliarinninnernik unitsitsisarneq

§ 125. Pisinnaatitsisummik pigisaqartoq Inatsisartut inatsisaanni pineqartunut ilaasoq Naalakkersuisut suliassanik suliarinninnermut aamma Inatsisartut inatsisaat malillugu oqartussat suliarinninnerannut allanut aningaasartuutaannut matussutissanik, takuuk tamatumunnga § 31, imm. 3, 38, imm. 4, aamma § 51, imm. 5, 100.000 koruuninik imaluunniit amerlanerusunik aningaasartalinnik akilerneqartussanik akiliisimangippat, pisinnaatitsisummik pigisaqartup Naalakkersuisunut aningaasat akilerneqanngitsut sulluunniit akilernissaasa tungaanut, pisinnaatitsisummik pigisaqartoq pillugit suliassap sulluunniit suliarineqarnera aalajangiiffigineqarnissaalu Naalakkersuisut unitsissinnaavaat. Taamatut pisoqartillugu, pisinnaatitsisummik pigisaqartup Naalakkersuisunut aningaasat akilerneqanngitsut sulluunniit akilernissaasa tungaanut, pisinnaatitsisummik pigisaqartumut Inatsisartut inatsisaanni pineqartunut ilaasumut, akuersissut malillugu ingerlatani unitseqqullugit aamma Naalakkersuisut peqqusisinnaapput. Naalakkersuisut tamatumunnga aalajangersakkanik erseqqinnerusunik atugassarititaasunillu aalajangersaasinnaapput.

Inatsisit allat malillugit akuersissutit aamma akuersissuteqarnerit

§ 126. Inatsisartut inatsisaat naapertorlugu oqartussat suliarinninneranni, ilanngullugit akuersissutit aamma akuersissuteqarnerit, pisinnaatitsissummik pigisaqartut aamma suleqataasut allat Inatsisartut inatsisaanni pineqartunut ilaasut, inatsisit allat malillugit pisariaqartunik akuersissuteqarnernik imaluunniit akuersissutinik piniarnissamut, pisussaaffeerutsinneqanngillat, taamaattoq takuuk imm. 2.

Imm. 2. Taamaattoq Inatsisartut inatsisaat malillugu akuersissummi sumiiffimmi akuersissuteqarfusumi avataanilu illutanut sanaartukkanullu nunaminertamik atugassiinissaq pillugu piumasaqaatinik naammassinninnissamut pisussaatinneqanngilaq.

Pigisanik nalilinnik pinngitsaaliisummik taarsiissutitalimmik piginnikkunnaarsitsisarneq

§ 127. Inatsisartut inatsisaat malillugu ingerlatassanik suliarinnissinnaanissamut pigisanik nalilinnik pinngitsaaliisummik taarsiissutitalimmik piginnikkunnaarsitsineq ingerlanneqassasoq, Naalakkersuisut pisariaqartillugu akuerisinnaavaat.

Imm. 2. Imm. 1 malillugu pinngitsaaliisummik taarsiissutitalimmik piginnikkunnaarsitsineq pinngitsaaliisummik taarsiissutitalimmik piginnikkunnaarsitsisarneq pillugu Inatsisartut inatsisaanni maleruagassat malillugit ingerlanneqassaaq.

*Sumiiffinnik aalajangersimasunik eqqissisimatitsineq
aammalu killeqarfinnik atuutsitsilerneq*

§ 128. Inatsisartut inatsisitigut aalajangersarsinnaavaat, sumiiffik sumiiffilluunniit aalajangersimasut eqqissisimatitaanissaat sannaat allanngutsaaliornissaallu sianiginiassammata. Sumiiffimmi geologiia eqqarsaatigalugu eqqissisimatitami, una Inatsisartut inatsisaat naapertorlugu, qanorluunniit ittumik suliaqartoqassanngilaq, imatut inngippat, ataatsimik arlalinnilluunniit aalajangersimasumik /-nik suliaqartoqarsinnaasoq, Inatsisartut eqqissisimatitsinermut inatsimmi aalajangigaanni.

Imm. 2. Inatsisartut una Inatsisartut inatsisaat naapertorlugu, inatsisitigut suliaq /-liat inerteqqutigisinnaavaat imaluunniit killilersorsinnaavaat, soqutigisat nalinginnaasut isumaginissaat siunertaralugu.

Pisortani oqartussat allat oqartussat suliassaannik isumaginninnerat

§ 129. Inatsisartut inatsisaat malillugu oqartussat suliassai pisortani oqartussanit allanit imaluunniit namminersortunit suleqatigisanit erseqqinnerusumik aalajangerneqartumik annertussusilimmik isumagineqassasut pillugu aalajangersakkanik Naalakkersuisut aalajangersaasinnaapput.

Imm. 2. Piginnaatitsissummi allatut aalajangertoqarsimannngippat, pisortani oqartussat imaluunniit namminersortut suleqatigisat piginnaatinneqartut, taakkualu sulisui, Naalakkersuisut aamma Naalakkersuisut sulisuisa suliassanik pineqartunik isumaginninnermi piginnaatitaaffigisassaasa assinginik piginnaatitaaffeqassapput.

Innuttaasunut, najukkami inuiaqatigiinnut aamma kattuffinnut attuumassuteqartunut misissuinernut aamma siunnersuinernut ilaalu ilanngullugit aningaasassanik ataatsimoortunik pilersitsineq

§ 130. Naalakkersuisut aningaasassanik ataatsimoortunik pilersitsissapput, tassunga innuttaasut, najukkami inuiaqatigiit aamma Kalaallit Nunaanni kattuffiit attuumassuteqartut kalluarneqartut, Kalaallit Nunaanni aatsitassanut suliassanut aalajangersimasunut attuumassuteqartunik ajornartorsiutinik immikkuullarissunik qulaajaanissamut misissuinernik aallartitsinissamut aammalu siunnersortissarsiornermut aammalu suliassap inuiaqatigiinni sunniinissaa pillugu ataatsimiinnernik ingerlatsinissamut, aningaasassanik qinnuteqarsinnaassallutik.

Imm. 2. Qinnuteqaatip, suliakkiissutitut najoqqutassap imaluunniit suliassamut nassuiaatip piareersaataasumik tusarniaassutigalugu imaluunniit tusarniaassutigalugu nassiunneqareernerata kingorna, takuuk §§ 35, 44 aamma 107, aningaasassanik qinnuteqarneq aatsaat pisinnaavoq.

Imm. 3. Naalakkersuisut imm. 1 malillugu aningasassat ataatsimoortut pillugit aalajangersakkanik erseqqinnerusunik aalajangersaasinnaapput.

Kapitali 22

Taarsiinissamut akisussaasuuneq aamma sillimasiinerit

§ 131. Ajoqusiinerit suliaqarnerni imaluunniit ingerlatassanit akuersissummi pineqartunut ilaasunit ajoquserneqartut, aamma ajoqusiinerit pisinnaagaluartut, akuersissut malillugu pisinnaatitsissummik pigisaqartup taarsiivigissavai.

Imm. 2. Ajoquserneqartoq piaaraluni imaluunniit mianersuaalliorujussuarluni ajoqusiinermit pegataasimappat, imm. 1 malillugu taarsiissutissaq annikillisinneqarsinnaavoq imaluunniit atorunnaarsinnaalluni.

§ 132. Pisinnaatitsissummik pigisaqartup taarsiinissamut akisussaasuunera sillimasiisummi imaluunniit allatut ilusilimmik qularnaveeqqusiinermit pineqartunut ilaatinneqassasoq, aamma pisinnaatitsissummik pigisaqartup ingerlatassai aamma pissutsit tamatumunnga atasut sillimasiinerni attuumassuteqartuni allani pineqartunut ilaatinneqassasut, pillugu akuersissummi aalajangersakkanik aamma atugassarititaasunik Naalakkersuisut aalajangersaasinnaapput.

§ 133. Isumaqatigiissuteqarfigineqartut sullissineri aamma ingerlatai akuersissut malillugu ingerlatassanik suliarinninnermit atorneqarsimappata, pisinnaatitsissummik pigisaqartup isumaqatigiissuteqarfigisaasa taarsiinissamut akisussaasuunerat sillimasiisummi imaluunniit allatut ilusilimmik qularnaveeqqusiinermit pineqartunut ilaatinneqassasut, pillugu akuersissummi aalajangersakkanik aamma atugassarititaasunik Naalakkersuisut aalajangersaasinnaapput.

Avatangiisini ajoqusiinernut taarsiisarneq

§ 134. Ingerlatassanut Inatsisartut inatsisaanni pineqartunut ilaatillugu ajoqusiinernut nunamik, imaani, immap naqqanik, nunap iluanik, imermik imaluunniit silaannarmik mingutsitsinermeersunut, avatangiisinut ajoqusiinernut taarsiisarneq pillugu Inatsisartut inatsisaanni maleruagassat atuupput.

Imm. 2. Avatangiisinut ajoqusiinernut taarsiisarneq pillugu Inatsisartut inatsisaanni maleruagassat, taamaaqataanik mingutsitsinernut aammalu silap pissusaanut tunngasunut imaluunniit pinngortitamut allatut pitsaanngitsumik sunniinernut aamma nipiliornerit, sajupillatsitsinernit, qaammaqqutinit assigisaanniillu akornusersuinernut, atuupput.

§ 135. § 134-mi aamma §§ 136-139-mi maleruagassat malillugit ajoqusiinerit makkua taarsiivigineqassapput:

- 1) Inummut ajoqusiineq aamma pilersuisumik annaasaqarneq.
- 2) Pigisanut ajoqusiineq.
- 3) Allatut pisuussutitik annaasaqarneq.
- 4) Aningaasartuutit naapertuuttut:
 - a) pitsaaliuinnermut ajoqusiinissamillu pitsaaliuinnermut iliuusissanut,
 - b) avatangiisitik pinngortitamillu iluarseeqqinnermut aamma
 - c) mingutsitsinerup allatullu avatangiisinut, silap pissusaanut tunngasunut pinngortitamullu pitsaanngitsumik sunniinerit pitsaaliornissaannut ajoqusiinnaarsinnissaannullu.

§ 136. § 95, malillugu avatangiisini ajoqusiinnermut akisussaasuusoq, aammalu ingerlatassamut Inatsisartut inatsisaanni pineqartunut ilaasumut atatillugu mingutsitsisimasoq, ajoqusiineq pisinnaagaluarpalluunniit, ajoqusiinnermut mingutsitsinerup malitsigisaanut taarsiissaaq. Pineqartoq akuersissut imaluunniit akuersissuteqarneq malillugu pisinnaatitsissummik pigisaqartuunani allaappat, pisinnaatitsissummik pigisaqartoq aamma ingerlatassamut akisussaasuvoq. Taamaattoqarnerani taakkua marluk ataatsimoorlutik aammalu tamarmik immikkut imm. 2-4-mi aamma §§ 137-139-mi maleruagassat malillugit pisussaaffeqarput aammalu tamakkiisumik akisussaasuullutik.

Imm. 2. Avatangiisini ajoqusiineq mingutsitsinerlu taamaallaat ingerlatassat peqqussutitut saneqqunneqarsinnaanngitsunut pisortani oqartussanit aalajangersagaasunut naapertuuttumik suliarineqarneranni pilersimasut akisussaasuusup uppersarsarpagu, tassani akisussaasuusup nammineq ingerlatassaannik imaluunniit pissutitik tassunga tunngasunik pissuteqartumik peqqussuteqarneq, ilitersuinerit, aalajangiinerit imaluunniit atugassarititaasut malillugit peqqussutaanngippata, imm. 1 malillugu akisussaasuuneq atuutilissanngilaq.

Imm. 3. Ajoqusertoq imaluunniit toqusoq piaarluni ajoqusiinnermut peqataasimappat, inunmut ajoqusiinnermut imaluunniit pilersuisumik annaasaqarnermut taarsiissutissaq annikillisinneqarsinnaavoq. Aammattaaq ajoqusertoq imaluunniit toqusoq mianersuaalliorujussuarluni ajoqusiinnermut peqataasimappat, taarsiissutissaq annikillisinneqarsinnaavoq pisunilu immikkut ittuni atorunnaarsinnaalluni.

Imm. 4. Ajoqusertoq piaarluni imaluunniit mianersuaalliorujussuarluni ajoqusiinnermut peqataasimappat, pisuni allani taasiissutissaq annikillisinneqarsinnaavoq imaluunniit atorunnaarsinnaalluni.

§ 137. Ajoqusiinerup pinissaa sioqqullugu isumaqatigiissuteqartoqarsimappat, aammalu saneqqutsinissaq ajoqusertumut iluaqutaassanngippat, avatangiisinut ajoqusiinnermut taarsiisarneq pillugu Inatsisartut inatsisaanni maleruagassat saneqqunneqarnissaat pillugu isumaqatigiissut atuutissanngilaq.

Imm. 2. Isumaqatigiissut isumaqatigiissuteqartut akornanni pisunut tunngassuteqarpat, imm. 1-mi maleruagassat akisussaasuusup aamma inuussutissarsiorup inuussutissarsiornerminut ilaatillugu

iliuseqartup akornanni isumaqatigiissummut atuutinnigillat. Isumaqatigiissut taamaattoq toqqaannartumik imaluunniit toqqaannangitsumik isumaqatigiissuteqartut allanut attaveqarnerannut tunngassuteqarpat, imm. 1-imi maleruagassat atuutissapput.

§ 138. Kapitalimi matumani avatangiisinut ajoqusiinernut taarsiisarneq pillugu maleruagassat, ajoqusertup isumaqatigiissutip iluani imaluunniit avataani taarsiisarneq pillugu maleruagassat nalinginnaasut imaluunniit Inatsisartut inatsisaanni imaluunniit inatsisini allani maleruagassat allat malillugit taarsiivigineqarsinnaaneranut killiliinnigillat.

§ 139. Naalakkersuisut avatangiisinut ajoqusiinernut taarsiisarneq pissutsillu kapitalimi matumani taaneqartut pillugit aalajangersakkanik erseqqinnerusunik aalajangersaasinnaapput, ilanngullugu avatangiisinut ajoqusiinernut taarsiisarneq pillugu nunami namminermi imaluunniit nunani tamalaani maleruagassat, isumaqatigiissutit imaluunniit malittarisassat atorneqarnissaat pillugu.

Kapitali 23

Pineqaatissiissutit, arsaarinnittarneq aamma atuutilerana

Pineqaatissiissutit

§ 140. Naalakkersuisut makkununga ullut tamaasa imaluunniit sapaatit akunnikkaartumik pinngitsaaliisummik akileeqqusisarsinnaapput:

1) Paasissutissanik taassuma tunniussassaannik imaluunniit § 32, imm. 1, § 39, imm. 1, § 50, imm. 2, takuuk § 39, imm. 1, § 55, imm. 1, § 63, imm. 1, § 68, imm. 1, § 68, imm. 2, § 77, imm. 4, § 81, imm. 5, § 82, imm. 4, § 101, imm. 1, § 101, imm. 3 aamma 4, § 104, imm. 1, § 104, imm. 3 aamma 4 imaluunniit § 124 malillugit Naalakkersuisut piumasarisinnaasaannik, piffissaq eqqorlugu tunniussinngitsoq.

2) § 68, imm. 3, § 123 imaluunniit § 125 malillugit peqqusissuteqarnermik imaluunniit inerteqquteqarnermik malinninngitsoq.

3) § 82, imm. 4 malillugu piffissaq eqqorlugu qularnaveeqqusiinngitsoq.

Imm. 2. Naalakkersuisut imm. 1 naapertorlugu aalajangersakkanik sukumiinerusunik, pinngitsaaliisummik akiliisitsinerit qanoq annertutiginissaannut tunngasunik aalajangiissapput.

§ 141. Inatsisit allat malillugit sukannernerusumik pineqaatissiineq nammineq pisuussutigineqanngippat, § 22, imm. 2-mi imaluunniit 3-mi taaneqartumik tamatumunnga akuersissummik peqarani imaluunniit tamatumunnga Inatsisartut inatsisaanni aalajangersakkat malillugit akuersissuteqarfigneqarani ingerlatassamik suliarinnittoq, akiliisitsinermik pineqaatissinneqassaaq.

Imm. 2. Inatsisit allat malillugit sukannernerusumik pineqaatissiineq nammineq pisuussutigineqanngippat, ingerlataqarnerit tamatumunnga aalajangersakkat Naalakkersuisunit aalajangersarneqartut malillugit ingerlateqqusaanatik, nunap sanaanut sumiiffimmi eqqissisimatitami ingerlataqarnermik suliaqartoq, takuuk § 128, akiliisitsinermik pineqaatissinneqassaaq.

Imm. 3. Inatsisit allat malillugit sukannernerusumik pineqaatissiineq nammineq pisuussutigineqanngippat, akiliisitsinermik pineqaatissinneqassaaq, piaaraluni imaluunniit mianersuaalliorujussuarluni:

- 1) Paasissutissanik eqqunngitsunik imaluunniit paatsoortitsisinnaasunik tunniussisoq imaluunniit paasissutissanik Inatsisartut inatsisaat imaluunniit aalajangersakkat imaluunniit atugassarititaasut Inatsisartut inatsisaat malillugu aalajangersagaasut malillugit oqartussamit piumasariqartunik, nipangiussiinnartoq.
- 2) Aalajangersakkanik imaluunniit akuersissutitut atugassarititaasunik imaluunniit Inatsisartut inatsisaat malillugu akuersissuteqarnermik imaluunniit aalajangersakkanik Inatsisartut inatsisaat malillugu aalajangersagaasunik unioqqutitsisoq.
- 3) § 123 imaluunniit § 125 imaluunniit aalajangersakkat imaluunniit akuersissutitut atugassarititaasut imaluunniit Inatsisartut inatsisaat malillugu akuersissuteqarnerit imaluunniit aalajangersakkat Inatsisartut inatsisaat malillugu aalajangersagaasut malillugit Naalakkersuisut peqqusissuteqarnerannik imaluunniit inerteqquteqarnerannik malinninngitsoq.

Imm. 4. Aalajangersakkanik unioqqutitsisoq Kalaallit Nunaannut pinerluttulerinermut inatsit malillugu akiliisitsinermik imaluunniit allatut pineqaatissiinermik pineqaatissinneqarsinnaasoq, aalajangersakkanni Inatsisartut inatsisaat malillugu aalajangersagaasuni aalajangerneqarsinnaavoq.

Imm. 5. Unioqqutitsineq suliffeqarfimmit tamakkiisumik ilaannaasumilluunniit Namminersorlutik Oqartussanit pigineqartumit, naalagaaffimmit, kommunimit imaluunniit kommunit ataatsimooqatigiiffianit kommunit aqunneqarnerat pillugu Inatsisartut inatsisaanni pineqartunut ilaasumit, aktiaatileqatigiiffimmit, piginneqatigiilluni ingerlatseqatigiiffimmit, piginneqatigiiffimmit assigisaannilluunniit piliarineqarpat, suliffeqarfik ilaalu ilanngullugit taamatut pinerluttulerinermut inatsisitigut akisussaatinneqarsinnaapput. Taamaaqataanik unioqqutitsisoq tassaappat Namminersorlutik Oqartussat, kommuni imaluunniit kommunit ataatsimooqatigiiffiat kommunit aqunneqarnerat pillugu Inatsisartut inatsisaanni pineqartunut ilaasoq, tamanna atuutissaaq.

Imm. 6. Unioqqutitsineq ersarippat, pisariunngippat aammalu annertuunik uppersarsaatitigut nalornissutaasunik apeqqutissaqanngippat, imm. 1-3 imaluunniit aalajangersakkat imaluunniit atugassarititaasut imm. 4 malillugu aalajangersagaasut malillugit akiliisitsilluni pineqaatissiinissaq pillugu suliaq allaffissornikkut akiliisitsinikkut aalajangiiffiginiarneqarsinnaavoq. Suliassani unnerluussutit imaannut piumasaqaatit pillugit, aammalu pasineqartoq oqaaseqarnissamut pisussaaffeqanngitsoq pillugu eqqartuussisarnermut inatsimmi maleruagassat, Inatsisartut inatsisaat malillugu allaffissornikkut akiliisitsinernut taamaaqataanik atuupput.

Imm. 7. Akiliisitsinerit, Inatsisartut inatsisaat imaluunniit aalajangersakkat Inatsisartut inatsisaat malillugu aalajangersagaasut malillugit pisussaatinneqartut, nunap karsianut tutsinneqassapput.

Arsaarinnittarneq

§ 142. Naalakkersuisut aatsitassanik, § 22, imm. 2, nr. 1-4-mik unioqqutitsilluni, imaluunniit aalajangersakkanik imaluunniit atugassarititaasunik akuersissummut imaluunniit akuersissuteqarnermut aalajangersagaasunik imaluunniit aalajangersakkanik Inatsisartut inatsisaat malillugu aalajangersagaasunik unioqqutitsisumik akuersissummik peqarani katersorneqartunik, piiarneqartunik imaluunniit atorineqartunik, arsaarinnissinnaapput.

Imm. 2. Naalakkersuisut aatsitassanik, § 22, imm. 3, nr. 1-imik unioqqutitsilluni, imaluunniit aalajangersakkanik imaluunniit atugassarititaasunik akuersissummut imaluunniit akuersissuteqarnermut aalajangersagaasunik imaluunniit aalajangersakkanik Inatsisartut inatsisaat malillugu

aalajangersagaasunik unioqqutitsilluni, tamatumunnga akuersissuteqarfigineqarani, Kalaallit Nunaanniit anniseriarneqaraluartunik imaluunniit anninneqartunik, arsaarinnissinnaapput.

Imm. 3. Aatsitassanut § 22, imm. 2, nr. 1-4-mut unioqqutitsilluni, imaluunniit aalajangersakkanut imaluunniit atugassarititaasunut akuersissummi aalajangersagaasumut imaluunniit akuersissuteqarnermut imaluunniit aalajangersakkanut Inatsisartut inatsisaat malillugu tunniussisoqarpat, imaluunniit taakkununga pisinnaatitaaffinnut unioqqutitsisumik katersorneqartunut, piiarneqartunut imaluunniit atorluarniarneqartunut atugassiisoqarsimappat, aatsitassat tunniunneqartut imaluunniit taakkua nalingi pissarsisumiit arsaarinnissutigineqarsinnaapput, taassuma tunniunneqartut pinerluttuliornermut attuumassuteqartut ilisimareersimappagu imaluunniit tassunga tunngatillugu mianersuaalliorujussuarsimappat, imaluunniit tunniussineq tunissutitut pisimappat.

Imm. 4. Naalakkersuisut imm. 1-mi, 2-mi imaluunniit 3-mi pineqartunut ilaasunik ingerlataqarnerni pissarsianik imaluunniit aningaasanik tamatumunnga naapertuuttunik arsaarinnissuteqarsinnaapput. Aningaasartaasa annertussusaasa aalajangernissaanut naammattumik tunngavissaqanngikkaanni, aningaasat pissarsiarineqartunut naapertuuttutut missiliorneqartut, Naalakkersuisut arsaarinnissutigisinnaavaat.

Imm. 5. Pinerlunnikkut pissarsianik imaluunniit aningaasanik tamatumunnga naapertuuttunik arsaarinnittarneq pillugu Kalaallit Nunaannut pinerluttulerinermut inatsimmi maleruagassat Naalakkersuisut imm. 1-4 malillugit arsaarinninnerannut taamaaqataanik atuutissapput.

Imm. 6. Imm. 1, 2 aamma 3 malillugu arsaarinninneq Naalakkersuisunit imaluunniit pinerluttulerinermut suliaasani Kalaallit Nunaannut pinerluttulerinermut inatsit malillugu oqartussamit attuumassuteqartumit, ingerlanneqassaaq.

Imm. 7. Aatsitassat arsaarinnissutigineqartut Naalakkersuisunit tuniniarneqassapput. Tunisinermi iluanaarutit nunap karsianut tutsinneqassapput.

Atuutilerneranut, allannguutinit aamma atorunnaarsitsinermut aalajangersakkat

§ 143. Inatsisartut inatsisaat ulloq 1. januar 2024 atuutilerpoq.

Imm. 2. Kalaallit Nunaanni misissueqqaarnissamut, aatsitassarsiorluni misissuinissamut imaluunniit aatsitassanik piiaanissamut akuersissutit imaluunniit Kalaallit Nunaanni aatsitassanut tunngatillugu ilisimatuussutsikkut misissuinerit, Inatsisartut inatsisaata atuutilernerani tunniunneqareersimasut, atuuttussaaginnassapput. Inatsisartut inatsisaata atuutilernerani akuersissutit taamaattunut, akuersissutit taamaattut malillugit pisinnaatitsissummik pigisaqartunut aamma ingerlatassanut akuersissutit taamaattut malillugit suliarineqartunut, Inatsisartut inatsisaat aamma atuuppoq. Inatsisartut inatsisaata atuuffissaasa iluanni aammattaaq aatsitassat pillugit ingerlataqarnernut taanna atuuppoq, ilanngullugit katersineq, piianeq aamma aatsitassanik piianeq, aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) pineqartunut ilaasut aammalu Inatsisartut inatsisaata atuutilernissaa sioqqullugu suliarineqartut. Tamatuma saniatigut ingerlatani taamaattuni aatsitassanut katersorneqartunut, piiarneqartunut imaluunniit atorneqartunut, Inatsisartut inatsisaata atuuffissaasa iluanni taanna atuuppoq. Aammattaaq Inatsisartut inatsisaata atuuffissaanni aatsitassat aatsitassanut ikummatissanullu inatsimmi pineqartunut ilaasut pillugit ingerlataqarnerit aamma pissutsit pillugit aalajangiinernut aammalu Inatsisartut inatsisaata atuutilernissaa sioqqullugu aalajangiiffigineqartunut, taanna atuutissaaq, piffissamut killiliussaq §§ 25-mi

aamma § 73-mi taaneqarluni, taamaattoq Inatsisartut inatsisaata atuutilerneraniit piffissaq naatsorsorlugu.

Imm. 3. Inatsisartut inatsisaanni § 29 misissueqqaarnissamut akuersissutitut Inatsisartut inatsisaata atuutilinnginnerani tunniunneqartunut atuutinngilaq.

Imm. 4. Pisinnaatitsissummik pigisaqartup aatsitassanut ikummatissanullu inatsimmi § 87a malillugu suliasamat nassuiaatip piareersaataasumik tusarniaassutigineqarnissaa Inatsisartut inatsisaata atuutilinnginnerani akuersissuteqarfigitissimappagu, Inatsisartut inatsisaanni § 44 atuutissanngilaq.

Imm. 5. Pisinnaatitsissummik pigisaqartut Inatsisartut inatsisaata atuutilernerata nalaani piiannissamut akuersissummik tunineqarsimasut, Inatsisartut inatsisaata atuutilernerata kingorna kingusinnerpaamik qaammatit 24-t qaangiunneranni Inatsisartut inatsisaanni § 45, imm. 2-mi piumasaqaat naammassereersimassavaat.

Imm. 6. Aatsitassarsiorluni ingerlataqarnernut aamma qinnuteqaatinut suleriaatsinut, atugassarititaasunut nalinginnaasunut aamma aatsitassat pillugit akuersissutitut atugassarititaasunut, Inatsisartut inatsisaata atuuffissaanni pineqartunut ilaasunut, aalajangersakkat ulloq 1. januar 2024 atuuttut, aalajangersakkat ilaalu ilanngullugit atorunnaarsinneqarnissaasa imaluunniit aalajangersakkanit Inatsisartut inatsisaat malillugu aalajangersagaasunit taarserneqarnissaasa tungaanut, Inatsisartut inatsisaat malillugu allannguuteqartillugit, atuutiinnassapput.

Namminersorlutik Oqartussat, ulloq 13. juuni 2023

Múte Bourup Egede (atsior.)

Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

